

# JA' SC'OPLAL LI CAJVALTIC JESUCRISTO LI LA STS'IBA LI LUCASE

**1** <sup>1-4</sup>Ajvalil Teófilo, ep buch'utic la sts'ibaic xa ta jun li c'ustic lec ic'ot ta pasel ta jtojolcutique. Ja' jech chac c'u cha'al laj yalbun ca'icutic li buch'utic iyilic c'alal lic stsac yabtel li Jesuse, ti ja' yabtelic yalel li sc'ope, ja' jech la sts'ibaic ta jun scotol. Jo'on e'uc li Lucasune la jnop ti ja' lec ti chacalbe scotol li c'ustic ica'i ta sliquebe schi'uc c'alal to avie, yu'un ica'i xa scotol li c'ustic ic'ot ta pasele. Jech xchapet chajts'ibabe scotol yo' jech chan'a o ti ja' melel li c'u sba lachanubtasee.

**Ja' sc'oplal ti laj yal jun  
yaj'angel Dios ti ta xvoc' li  
Juan ti ta xac' ta ich'el jo'e**

**5**C'alal ochem ta ajvalilal te ta Judea balumil li Herodese, ja' o ochem ta paleal yu'un li j'israeletic jun vinic, Zacarías sbi. Li paleetic yu'unique oy jayvoq'uic yu'un tsjel sbaic ta abtel. Li Zacaríase ja' schi'iltac ta paleal li jvoc' Abías sbie. Li yajnil Zacaríase Elisabet sbi. Li smoltot ta vo'one li Elisabete Aarón sbi, ja' li sba pale li itiq'ue ta abtel yu'un li Diose. **6**Li Diose sq'ueloj ti tuc' yo'onic schi'uc yajnil li Zacaríase. Yu'un sch'unojic li

c'usi yaloj li Cajvaltic Diose, jech mu'yuc smul i'ileic yu'un Dios. **7**Pero mu'yuc sch'amalic yu'un mu sna' xil yol li Elisabete. Mol me'elic xa scha'va'alic.

**8**Li Zacaríase ista sc'ac'alil ti ja' ta x'abtej ta stojol Dios te ta muc'ta ch'ulna schi'uc li schi'iltac ta paleale. Yu'un li paleetic ta sjel sbaic li jujuvoq'uique. **9**Li jayvo'ic ti ja' yorail ta x'abtejique, stalelic ti ta spasic canal tajimol jujun c'ac'ale ta sq'uelic buch'u junucal ta xc'ot ta stojol ti chba schic' pomriox li te ta yut li muc'ta ch'ulna yu'un li Diose. C'alal jech la spasique, ja' ic'ot ta stojol li Zacaríase. **10**C'alal ta schiq'uic pomriox ta yut li muc'ta ch'ulna li paleetic, li crixchanoetique te va'alic ta amac' ta staic ta na'el Dios. **11**C'alal ja' o te ta schic' pomriox li Zacaríase, ital jun yaj'angel Dios. Te va'al ijul ta nopol scajleb schic'obil pomriox li te ta sbats'ic'ob li Zacaríase. **12**C'alal iyil li ch'ul ángel li Zacaríase, ixi' tajmec, iyal yo'on. **13**Jech i'balat yu'un li ch'ul ángel: —Mu me xaxi', Zacarías. Laj xa ya'ibot ac'op li Diose. Ta xil yol li Elisabete, ja' la avajnile. Querem

ta xil. Juan chavac'be sbi. <sup>14</sup>C'alal mi ivoq'ue, xamuybaj no'ox yu'un. Ep buch'utic xmuybaj e'uc. <sup>15</sup>Yu'un ta xich' tsots yabtel ta stojol Dios. Mu xuch' ya'llel ts'susub li pajubem xae, schi'uc mu xuch' pox. Ich'bil ta venta yu'un li Ch'ul Espíritu li c'alal ta xvoq'ue. <sup>16</sup>Oy ep achi'iltac ta israelal ta xictaic smulic ta sventa li Juane, ja' ta xac' sbaic ta sc'ob li Diose. <sup>17</sup>Li Juane ja' ba'i ta xtal, ja' ts'acal ta xtal la Avajcoltavanejique. Li Juane co'ol sjol yo'onic jech chac c'u cha'al li Elías ta vo'onee yu'un ta smelol no'ox chal batel li c'usi tsc'an li Diose. Ba'i chtal yalbe achi'iltac ti ac'o yictaic li c'ustic chopol tspasique yo' jech jmoj yo'onic schi'uc snich'nabic ta jup'ej snaique. Ta stuq'uibtasbe yo'onic li buch'utic mu sch'unic mantale yo' ac'o yich'ic ta muc' li Cajvaltic li c'alal mi itale —xi li ch'ul ángel.

<sup>18</sup>Li Zacaríase la sjac'be li ch'ul ángel:

—¿C'u sba ta jna' o mi melel li c'usi avalbune? Yu'un molun xa, me'el xa e'uc li cajnile —xut.

<sup>19</sup>Itac'av li ch'ul ángel:

—Jo'on Gabrielun, jo'on te chil'abtej ta stojol li Diose. Tacbilun talel yu'un Dios ti tal jc'oponote. Ja' chacalbe ti chavil jun anich'one. <sup>20</sup>Pero ta scoj ti mu xach'un li c'usi laj calbote chapas ta uma!. Ja' to mi ista sc'ac'alil ta xvoc' la anich'one jech chac c'u cha'al laj calbote, ja' to ta xjam la avee. Yu'un ta ono'ox xc'ot ta pasel ti chavil la anich'one mi ic'ot sc'ac'alil li c'u sba snopoj li Diose —x'utat li Zacaríase.

<sup>21</sup>Li crixchanoetic li te oyic ta amaq'ue, te tsmalaic ta xloc' talel

li Zacaríase. Iyal yo'onic yu'un ijoc'tsaj xa li ta yut li muc'ta ch'ulnae. <sup>22</sup>C'alal iloc' talel li Zacaríase, mu xa xc'opoj, macal xa ye. Jech la sna'ic o ti oy c'usi i'ac'bat yil yu'un Dios te ta yut li muc'ta ch'ulnae. Ja' xa no'ox la sye'ulan sc'ob yo' chac' ta ilel li c'usi ispase, yu'un ipas ta uma!.

<sup>23</sup>C'alal its'aqui ti jayib c'ac'al te ta x'abtej li ta muc'ta ch'ulna li Zacaríase, isut batel ta sna. <sup>24</sup>Lic schi'in yol li yajnile, ja' li Elisabete. C'alal schi'uc xa'ox yole, jo'ob u te icom ta sna. Jech la snopilan: <sup>25</sup>“Iyil li Cajvaltic Dios ti chisna'leic li crixchanoetique, ja' yu'un lisc'uxubin. Ja' yu'un oyun xa ta crixchano”, xi ta yo'on li Elisabete.

**Ja' sc'oplal ti laj yal jun yaj'angel  
Dios ti ta schi'in yol jun tojol tseub**

<sup>26</sup>C'alal svaquibal xa'ox u schi'uc yol li Elisabete, li Diose la stac talel li yaj'angel Gabriele li ta jteclum Nazaret li te ta Galilea balumile.

<sup>27</sup>Li ch'ul ángel Gabriele tacbil batel yu'un Dios ti ac'o ba sc'opon jun tojol tseub, María sbi. Pero macbil xa'ox yu'un jun vinic, José sbi. Li smuc'ta moltot ta vo'one li Josee, ja' li Davide. <sup>28</sup>Li ch'ul ángel te ic'ot li yo' bu oy li tseube, jech laj yalbe:

—Jo'ot t'ujbilot yu'un Dios. Li' achi'uque. Muc buch'u yan tseub jech ta x'ac'bat slequilal yutsilal Dios jech chac c'u cha'al li jo'ote —x'utat.

<sup>29</sup>C'alal iya'i li c'usi i'albat yu'un li ch'ul ángel li Mariæ, ic'opoj yo'on ti c'u cha'al ti jech i'albate.

<sup>30</sup>Laj yal nojtoc li ch'ul ángel:

—Mu xaxi', María, yu'un lec chayil li Diose. <sup>31</sup>A'io li c'usi chacalbee. Chachi'in avol. Chavil jun querem. Jesús chavac'be sbi. <sup>32</sup>Ta x'ich'e ta muc' yu'un ja' Snich'on Dios ta vinajel. Ta x'aq'ue yu'un Dios ti choch ta ajvalilale. Ja' chlic spasoxuc ta mantal jech chac c'u cha'al la spas ta mantal achi'iltac ta vo'one la amoltotic Davide. <sup>33</sup>Sbatel osil chaspasoxuc ta mantal, jo'oxuc li j'israeloxuque. Mu'yuc slajeb ti tspasvan ta mantale —xi li ch'ul ángelo.

<sup>34</sup>Itac'av li Maríae:

—¿C'u sba ta jchi'in col yu'un muc to bu quiloj vinic? —xi.

<sup>35</sup>Itac'av li ch'ul ángelo:

—Yu'un chjul ta atojol li Ch'ul Espíritue. Ta sventa sju'el Dios chachi'in la avole. La avol ti chavile mu'yuc smul chtal yu'un ja' Snich'on Dios. <sup>36</sup>A'io, schi'uc xa yol e'uc la avuts' avalal, ja' li Elisabete. Manchuc mi me'el xa pero svaquibal xa u schi'uc yol, ja' li mu ono'ox sna' xil yole. <sup>37</sup>Li Diose scotol xu' yu'un —xi li ch'ul ángelo.

<sup>38</sup>Itac'av li Maríae:

—Jechuc, ac'o tuncun yu'un li Diose. Ac'o spasbun li c'usi la avalbune —xut.

Ibat li ch'ul ángelo.

### Ja' sc'oplal ti ba sc'opon Elisabet li Maríae

<sup>39</sup>Ts'acal to iloc' batel li Maríae, ibat ta anil ta jun jteclum li ta vitstic li te ta Judea balumile. <sup>40</sup>Ja' to te nacal li Zacaríase. Ja' te ic'ot li Maríae. I'och ta na. “Yaa”, xut c'otel li Elisabete. <sup>41</sup>C'alal iya'i li Elisabet

ti ic'oponat yu'un li Maríae, tsots inic li yol li schi'uque. Li Elisabete i'ac'bat ta sjol ta yo'on yu'un li Ch'ul Espíritue ti c'u sba chc'opoj ta orae. <sup>42</sup>Jech tsots ic'opoj li Elisabete:

—Muc buch'u yan tseub ta x'ac'bat slequilal yutsilal Dios jech chac c'u cha'al li jo'ote. Toj lec la avol ti chavile. <sup>43</sup>¿C'uxi jo'ot tal ajula'anun li sme'ot li Cajvaltique yu'un mu'yuc tsots cabtel ma jo'one?

<sup>44</sup>Yu'un c'alal la ac'oponune, inic li col li jchi'uque yu'un xmuyabaj xa. <sup>45</sup>Toj lec ti la ach'un ti chc'ot ta pasel li c'usi la'albat yu'un li Cajvaltice Diose —xi li Elisabete.

<sup>46</sup>Li Maríae jech laj yal:

Toj ech'em slequilal yutsilal li Diose.

<sup>47</sup>Ximuyabaj no'ox ta stojol yu'un ja' Cajcoltavanej.

<sup>48</sup>Ac'o mi mu c'usi xitun o pero iyil ti chitun yu'une.

Li crixchanoetique jech ta xalic ti c'alal ta x'ech'ic li' ta balumile:

“Xmuyabaj no'ox ti i'ac'bat schi'in svoq'ues li Cajvaltique”, xi jc'oplal yu'unic.

<sup>49</sup>Li Diose oy stsatsal sju'el.

Toj lec li c'usi ic'ot ta jtojol yu'une jech ac'o ich'euc ta muc'.

<sup>50</sup>Li crixchanoetic li ta x'ech'ic li' ta balumile,

mi ta xich'ic ta muc' li Diose, ta xich'ic c'uxubinel.

<sup>51</sup>Li Diose yac'oj ta ilel ti scotol xu' yu'une.

Xu' yu'un ta spajesbe yabtel li buch'utic ta stoy sbaique, ja' li buch'utic p'ij cha'i sbaique,

- jech mu xu' ta spasic li c'ustic snopojique.
- 52** Li Diose xu' yu'un ta sloq'ues ta yabtel li muc'ta ajvaliletique. Xu' yu'un ta xac'be tsots yabtel li buch'utic mu c'usi bal o ch-ileique.
- 53** Naca lec li c'ustic ta x'ac'bat ta yo'onic li buch'utic sna'ic ti muc bu lequic li stuquique. Yan li buch'utic ti lec sp'isoj sbaique ja' mu c'usi ta staic o.
- 54** Jo'otic li j'israelutique chiscoltautic ono'ox li jayvo'utic li quich'oxtic ta muq'ue.
- Mu xch'ay ta yo'on ti jech ono'ox laj yalbe li jtotic jme'tic ta vo'onee.
- 55** Yu'un laj yalbe ono'ox li jtotic jme'tic Abraham ta vo'onee ti ta sc'uxubin sbatel osil schi'uc li snitilultaque, xi li Maríae.
- 56** Li Maríae te la schi'in sbaic oxib u schi'uc li Elisabete, isut batel ta sna.
- Ja' sc'oplal ti ivoc' li Juan ti ta xac' ta ich'el jo'**
- 57** C'alal ista yual ta xcux li Elisabete, quereme iyil. **58** Li yuts' yalaltaque li Elisabete schi'uc li slac'nataque, iya'iic ti iyil xa li yole yu'un ic'uxubinat yu'un li Diose. Jech co'ol xmuybajic scotolic schi'uc li Elisabete. **59** C'alal iloc' vaxaquib c'ac'al svog'uel li unen quereme, ba yac'beic yich' circuncisión. Li yuts' yalaltaque la snopic ti ja' ta xich'be sbi stot li unen quereme. **60** Pero li sme'e jech laj yal: —Ma'uc chcac'becuteic sbi li stote. Juan ta xcac'becuteic sbi —xi.
- 61** Jech i'albat:  
—¿C'u cha'al Juan chavac'beic sbi? Yu'un muc buch'u jech sbi cu'untic li'i —x'utat yu'un li yuts' yalaltaque.
- 62** La sjac'beic stot li unene. Laj yac'beic senya ta sc'obic yo' ac'o yal ti c'usi sbi ta xac'be li snich'one.
- 63** Li Zacaríase la sc'an jpech unen tenelte', la sts'iba: “Juan ta xcac'be sbi”, xi. Jech toj ch'ayel no'ox yo'onic scotolic. **64** Ijam ye ta ora, lic c'opojuç li Zacaríase. Laj yalbe coliyal Dios ti jech ic'uxubinatique. **65** Ixi'ic tajmec scotolic li slac'nataque. Li buch'utic te nacallic ta vitstic ta Judea balumile, iya'li scotolic. **66** Scotol li buch'utic iya'lique jech la snopilanice ta yo'onic: “¿C'usi yabtel ta stsac li querem taje?” xi ta yo'onic.
- Yu'un li quereme q'uelbil chabibil yu'un li Cajvaltic Diose.
- Ja' sc'oplal ti laj yal sc'op  
Dios li Zacaríase**
- 67** Li Zacaríase, ja' li stot li unen quereme, ijulesbat ta sjol ta yo'on yu'un li Ch'ul Espíritue li c'usi ta xc'ot ta pasale. Jech laj yal:
- 68** Coliyal li Cajvaltic Diose, ja'  
li Dios cu'untic, jo'otic  
li j'israelutique, chtal xa  
sq'uelutic, jo'otic ti t'ujbilutic  
ono'ox yu'une.
- Chtal xa scoltautic.
- 69** Ta xtal xa li Cajcoltavanejtique,  
ja' li oy sju'el oy stsatsale.  
Ja' snitilul li Davide, ja' li lec  
itune yu'un Dios ta vo'onee.
- 70** Li Diose vo'one ono'ox la  
sch'amunbe ye li buch'utic  
iyalic ba li sc'ope.
- 71** Ja' laj yalic ti chijcolutic  
loq'uel ta sc'ob li buch'utic

- chiscontrainutique, ti xti'et no'ox yo'onic ta jtojoltique.
- 72** Chisc'uxubinutic jech chac c'u cha'al i'albatic ono'ox li jtotic jme'tic ta vo'onee.  
Jech ta xquiltic o ti mu xch'ay ta yo'on li c'usi laj yalbe li jtotic jme'tic ta vo'onee.
- 73-74** Ja' jo'otic jc'oplaltic ti laj yalbe li jtotic jme'tic Abraham ti ta j'ech'el chiscoltautic loq'uel ta sc'ob li buch'utic snacojutique, jech mu'yuc xa xi'el ta xca'itic, xu' xa chijtun yu'un.
- 75** Jech jun no'ox co'ontic ta xquich'tic ta muc' li jayib c'ac'al li' cuxulutique.
- 76** Li jnich'one ja' ta xal li sc'op Diose.  
Ja' ba'i chlic abtejuc; ja' ts'acal chlic abtejuc li Cajvaltique.  
Ja' chlic yalbe jchi'iltactic ti ac'o yictaic li c'ustic chopol ta spasique,  
ja' jech chich'ic o ta muc' li Cajvaltique.
- 77** Ja' ta xalbe ti ta spasbatic perton yu'un li smulique, ja' jech chcolic o mi ta sch'unic ti ja' Yajcoltavanejec li Cajvaltique, yu'un t'ujbilutic ono'ox yu'un Dios.
- 78** Ta slequil no'ox yo'on chisc'uxubinutic li Dios cu'untique;  
ta xa xistacbutic talel li Cajcoltavanejtique.  
Toj lec ti li' ta xtal ta jtojoltique.
- 79** Ja' chiscoltautic yo' ja' lec chijyilutic o li Diose, ti ja' chlaj o sc'oplal ti chijch'ayutic o sbatel osile,

xi li Zacaríase.

**80** C'alal ich'i li quereme, i'ayan stsatsal yo'on. Jech stuc te ba nacluc ta taqui jamaltic. C'alal ic'ot sc'ac'alil lic yal li sc'op Diose, te ba ya'iic li schi'iltac ta israelale.

### Ja' sc'oplal ti ivoc' li Jesuse

(Mt. 1.18-25)

**2** Li Augusto Césare ja' o ajvalil ta sventa sp'ejel balumil li c'alal ivoc' li Juane. Iyal mantal ti ac'o yac' ta tsael ta jun sbiic scotol li crixchanoetique. **2** Ja' sba to'ox jech ispasic li c'alal tiq'uil ta gobernador te ta Siria balumil li Cirenioe. **3** Jech scotol crixchanoetic ba yac' ta tsael sbiic ta slumal stuquic.

**4** Li Josee iloc' batel ta jteclum Nazaret li te ta Galilea balumile, ibat ta Judea balumil. Te ic'ot ta jteclum Belén yu'un te ivoc' li smoltot ta vo'onee, ja' li Davide.

**5** Yu'un ja' slumal ic'ot e'uc li Josee, ja' yu'un te ba yac' ta tsael sbiic ta Belén schi'uc li yajnile, ja' li Maríae. Pero muc to'ox bu xcuxoj li Maríae. **6** C'alal te oyic ta Belene, ja' o ista yual ta xcux li Maríae.

**7** Querem li sba yole. La spix ta poc', la spuch'an ta ve'eb vacax. Yu'un muc bu xocol istaic li snail vayebal ti chaq'uc ta loq'uele, yu'un jp'ej no'ox.

### Ja' sc'oplal ti ic'oponatic yu'un yaj'angel Dios li jchabiejchijetique

**8** Te ta nopol ti' Belén te oy jayvo' jchabiejchijetic. Te ta schabi schijic ta ac'ubaltic. **9** Te ivinaj ta ora jun yaj'angel Dios. Joybil ic'otic ta xojabal Dios. C'alal iyilic

li jchabiejchijetique, ixi'ic tajmec.

**10** Xi i'albatic yu'un li ch'ul ángele:  
—Mu xaxi'ic. Oy c'usi lec  
chacalbeic yo' jech xamuyabajic  
o acotolic. Ac'o ya'iic scotol la  
achi'iltaquic ta israelale. **11** Nax ivoc'  
ta Belén Avajcoltavanejic, ja' t'ujbil  
yu'un Dios ti ta x'och ta muc'ta  
ajvalil avu'unique. Ja' Cajvaltic.  
**12** Chacalbeic li c'u sba chataic li  
unene. Pixbil ta poc' chataic, te  
puch'ul ta ve'eb vacax —x'utatic.  
**13** Te ivinaj ta ora ep tajmec  
yaj'angeltac Dios. Laj yalic slequilal  
Dios. Jech laj yalic:  
**14** iToj ech'em slequilal Dios ta  
vinajel!  
Ac'o pasuc ta jun yo'onic li  
crixchanoetic ta sventa ti  
oy slequil yo'on li Dios ta  
stojolique, xiic.  
**15** C'alal isutic ta vinajel li ch'ul  
ángeletique, xi laj yalbe sbaic li  
jchabiejchijetique:  
—Batic ta Belén cha'a. Ba jq'ueltic  
c'usi li lec ic'ot ta pasel li lijyalbutic  
li Diose —xut sbaic.  
**16** Ibatic ta anil. Te istaic li  
María schi'uc li Josee, schi'uc li  
unen li te puch'ul ta ve'eb vacaxe.  
**17** C'alal iyilic li unene, ba spucbeic  
sc'oplal. Ba yalic li c'usi i'albatic  
yu'un li ch'ul ángele. **18** Scotol li  
buch'utic iya'iic li c'u sba laj yalic li  
jchabiejchijetique, toj ch'ayel no'ox  
yo'onic. **19** Li Maríae muc xch'ay  
ta yo'on scotol li c'usi laj yalic li  
jchabiejchijetique, la snopilan li c'usi  
smelole. **20** Isutic li jchabiejchijetique.  
Iyich'ic ta muc' li Diose, laj yalbeic  
slequilal. Yu'un iya'iic xa, iyilic xa  
scotol jech chac c'u cha'al i'albatic  
yu'un li yaj'angel li Diose.

Ja' sc'oplal ti iyaq'uic ta  
sc'ob Dios li Jesuse

**21** C'alal iloc' vaxaqueb c'ac'al  
svoq'uel li unen quereme, laj yich'  
circuncisión. Jesús laj yac'beic sbi  
yu'un jech ono'ox i'albatic yu'un li  
yaj'angel Dios li c'alal muc to'ox bu  
schi'uc yol li Maríae.

**22** Ta xal ta smantaltac Dios li  
la sts'iba Moisés ta vo'onee, mi  
querem yol li antse, ja' to xu' ta  
xbat ta muc'ta ch'ulna mi its'aqui  
oxlajuneb scha'vinic (33) c'ac'al  
svoq'uele. Li Maríae its'aqui xa  
yu'un li oxlajuneb scha'vinic  
c'ac'ale, ibatic ta muc'ta ch'ulna  
li te ta Jerusalén schi'uc li Josee,  
yu'un ba yaq'uic ta sc'ob Dios li  
squeremique. **23** Yu'un jech ta xal  
li smantal Dios li ts'ibabil comele:  
“Scotol li sba ach'amalique, mi  
quereme, ja' cu'un”, xi ono'ox li  
Diose. **24** Laj yac'beic smoton Dios  
nojtoc yu'un jech yaloj ta mantal li  
Diose: “Mi mu'yuc schije, ac'o yic'  
talel cha'cot pruvoc, mi cha'cot stsu,  
sventa jmoton”, xi ono'ox li Diose.

**25** Oy jun j'israelal vinic te ta  
Jerusalén, Simeón sbi. Tuc' yo'on  
ta stojol Dios, lec yich'oj ta muc'.  
Smalaoj ti ta xtal jun ajvalil  
yu'unique yu'un ja' ta xcolic loq'uel  
ta sc'ob li yan ajvalile. Li Simeone  
ventainbil yo'on yu'un li Ch'ul  
Espíritue. **26** Ac'bil xa sna' yu'un  
li Ch'ul Espíritu ti ja' to ta xcham  
mi iyilbe sat li Cristo li t'ujbil  
yu'un Dios ti ta x'och ta ajvalilal  
yu'unique. **27** Li Simeone ijulesbat ta  
sjol ta yo'on yu'un li Ch'ul Espíritu  
ti ac'o batuc li ta muc'ta ch'ulna li  
te ta Jerusalene. Jech c'alal ibatic

li ta muc'ta ch'ulna li José schi'uc li Maríae, schi'uc li unene, yu'un ba spasic jech chac c'u cha'al ta xal li mantaletique, te xa'ox oy ta yamaq'uil li muc'ta ch'ulna li Simeone. <sup>28</sup>Li Simeone la spet li unene, laj yalbe coliyal Dios. Xi laj yal:

<sup>29</sup> Cajval, jun xa co'on, ic'un me ta atojol te ta vinajel jech chac c'u cha'al avalojbun ono'oxe, jo'on la avajtunelune.

<sup>30-31</sup> Yu'un iquil xa ta jsat li Cajcoltavanejcutive ti la atac talel ta jtojolcutic jcotolcutique.

<sup>32</sup> Ja' saquil ch'ul osil yu'unic ya'el li jyanlumal crixchanoetique yu'un chilic e'uc ti xu' ta xcolique.

Jo'oncutic li j'israeluncutic ti t'ujbiluncutic ono'ox avu'une, avich'ojuncutic ta muc' yu'un li' ijul ta jtojolcutic li Jcoltavaneje,

xi li Simeone.

<sup>33</sup> Li José schi'uc sme' li unene toj ch'ayel no'ox yo'onic ti oy sc'oplal li unene. <sup>34-35</sup> Li Simeone la sc'anbe slequial yutsilal Dios ta stojolic. Jech laj yalbe nojtoc li sme' li unene, ja' li Maríae:

—A'io me, ta sventa la avol li'i ja' ta xvinaj o c'u sba yo'onic li jchi'iltactic ta israelale. Ep ta xich' contrainel la avole yu'un mu xc'ane yu'un ep jchi'iltactic. Jech chlic avat avo'on ta scoj ti mu xc'anee. Pero oy yan jchi'iltactic ta xtuq'uib yo'onic ta sventa la avole —xi li Simeone.

<sup>36</sup> Te oy ta yamaq'uil li muc'ta ch'ulna jun j'israelal ants, Ana

sbi. Ja' ta xal sc'op Dios e'uc. Ja' yantsilnich'on Fanuel, ja' smoltot ta vo'one li Asere. Me'el xa li Anae. Jucub no'ox jabil laj yic' sbaic schi'uc li smalale yu'un icham.

<sup>37</sup> Li Anae chanib xa yo'vinic (84) jabil yich'oj. Ep xa jabil ti mu'yuc smalale. Scotol c'ac'al te ta xc'otilan ta yamaq'uil li muc'ta ch'ulnae. C'ac'al ac'ubal te ta xtune yu'un li Diose yu'un ta xicta yixim, schi'uc ta sta ta na'el li Diose. <sup>38</sup> Li Simeone ja' o yacal ta xal li c'usi yabtel li unen li c'alal ic'ot li Anae. Li Anae laj yalbe coliyal Dios e'uc yu'un ital xa li Jcoltavaneje. Ts'acal to lic spucbe sc'oplal li unene. Laj yalbe scotol schi'iltac li te ta Jerusalene, ja' li buch'utic smalaojic ti ta xcolique.

**Ja' sc'oplal ti isutic batel ta Nazaret li Josee, schi'uc li Maríae, schi'uc li unene**

<sup>39</sup> C'alal la spasic scotol li c'usi yaloj Dios li José schi'uc li Maríae, isutic batel ta slumalic ta Nazaret ta Galilea balumil. <sup>40</sup> Lec sba ich'i li quereme, ja' li Jesuse. Lec oy sch'ulel ich'i, lec p'ij, yu'un coltabil yu'un Dios.

**Ja' sc'oplal ti te icom ta Jerusalén li Jesuse**

<sup>41</sup> Li stot sme' li Jesuse scotol jabil te ta xc'otilanic ta Jerusalén li c'alal q'uin o Coltaele. <sup>42</sup> C'alal yich'oj xa'ox lajchaeb jabil li Jesuse, ibatic ta q'uin ta Jerusalén yu'un jech smantal Dios ti persa ta xbat scotol li viniquetique. <sup>43</sup> C'alal i'ech' q'uine, isut batel ta snaic li José schi'uc li Maríae, pero mu sna'ic mi

te icom ta Jerusalén li squeremique.  
**44** Xalic no'ox ti te xbat schi'uquic  
 li yuts' yalaltaque. C'alal ixanavic  
 xa batel jun c'ac'ale, la sjac'beic li  
 yuts' yalaltaque schi'uc li buch'utic  
 xojaquinic li quereme. **45** Pero muc  
 bu staic. Icha'sutic batel c'alal ta  
 Jerusalén, te c'ot sa'ic.

**46** Ta yoxibal to c'ac'al te istaic ta  
 yut jun na li te ta muc'ta ch'ulna ta  
 Jerusalene. Li Jesuse te chotol ta  
 o'lol li yo' bu tsobolic li buch'utic  
 sp'isoj sbaic ta jchanubtasvanej ta  
 smantaltac li Diose. Te cha'i li c'usi  
 chalic li jchanubtasvanejetique  
 schi'uc oy c'usi ta sjac'ulan li Jesuse.  
**47** Scotol li jchanubtasvanejetique  
 ich'ay o yo'onic ta sventa ti toj  
 lec ta smelol ta xtac'av li Jesuse,  
 schi'uc ti oy c'usi lec tsjaq'ue. **48** Li  
 José schi'uc li Maríae, c'alal iyilic ti  
 te schi'uc li jchanubtasvanejetic li  
 squeremique, ich'ay yo'onic e'uc. Li  
 Jesuse jech i'albat yu'un li sme'e:

—Querem, ¿c'u cha'al jech  
 chapasbuncutic? La jsa'otcutic  
 tajmec. Icat co'oncutic yu'un muc  
 bu xajtacutic ta sa'el —x'utat yu'un  
 li sme'e.

**49** Itac'av li Jesuse:  
 —¿c'u cha'al chasa'icun? ¿Mi  
 mu xana'ic ti li' oyun li yo' bu  
 ta spasbat yabtel li Jtote? —xi li  
 Jesuse.

**50** Li José schi'uc li Maríae muc  
 bu xa'ibeic smelol li c'usi laj yal li  
 Jesuse.

**51** Li Jesuse schi'uc sutel ta  
 Nazaret li stot sme'e. Ti jayib  
 jabil te schi'uc li stot sme'e la  
 sch'unbe scotol li smantalique. Li  
 Maríae muc xch'ay ta yo'on li c'u  
 sba itac'av li te ta muc'ta ch'ulna

li yole, schi'uc ti lec ich'unbat li  
 smantalique. **52** C'alal ich'i li Jesuse,  
 lec i'ile yu'un Dios, lec i'ile  
 nojtoc yu'un li crixchanoetique.

**Ja' sc'opla** **ti lic yal sc'op** **Dios li**  
**Juan li iyac' ta ich'el jo'**  
*(Mt. 3.1-12; Mr. 1.1-8; Jn. 1.19-28)*

**3** **1-2** Li Tiberio Césare  
 sjo'lajunebal xa jabil yochel  
 ta muc'ta ajvalil li te ta jteclum  
 Roma li c'alal lic stsac yabtel li  
 Juane. Ta Judea balumile ja' te  
 ochem ta gobernador li Poncio  
 Pilatoe. Ta Galilea balumile ja' te  
 ochem ta gobernador li Herodese.  
 Ta Iturea balumile schi'uc ta  
 Traconite balumile, ja' te ochem ta  
 gobernador li yits'in Herodese, ja'  
 li Felipe sbie. Ta Abilinia balumile  
 ja' te ochem ta gobernador li  
 Lisániase. Li banquilar paleetic  
 yu'un li j'israelétique ja' ochemic  
 li Anás schi'uc Caifase. C'alal ja' o  
 jech yich'anoj yabtelique, ja' o te  
 oy ta taqui jamaltic li Juane, ja' li  
 snich'on Zacaríase. Ja' o ista yora  
 i'ac'bat sna' yu'un Dios ti ac'o  
 yalbe li schi'iltac li sc'op Diose. **3** Li  
 Juane te ixanav batel ta ti'ti' uc'um  
 Jordán. Jech laj ya:

—Ictaic scotol li c'ustic chopol  
 chapasique, ich'ic jo' jech  
 chaspasboxuc perton yu'un amulic  
 li Diose —xi.

**4** Li Juane jech ono'ox ts'ibabil  
 comel sc'opla yu'un li Isaías li  
 iyal sc'op Dios ta vo'onee. Jech la  
 sts'iba:

Chlic jun jchi'iltic ta israelal,  
 tsots chal ta taqui jamaltic ti  
 chtal li Cajvaltique.  
 Ja' yu'un chal nojtoc:

“Ictaic scotol li c'ustic chopol chapasique.

**5** Ja' ich'beic ta muc' li sc'ope yo' ja' lec chabatic yu'un ja' tstuq'uibtas co'ontic.

**6** Yu'un ja' Cajcoltavanejtic li tacbil talel yu'un li Diose. Ja' chtal scolta scotol li crixchanoetique”,

xi chalbe li jchi'iltaqtique, xi ono'ox li Isaíase.

**7** Toj ep buch'utic ba sc'anbeic ti ac'o x'ac'batic yich'ic jo' yu'un li Juane. Li Juane jech laj yalbe:

—Li jo'oxuque jun chac sts'unbaloxuc li orachone. Li orachone ta xjatav loq'uel ta anil li c'alal mi iya'i ti ta xtal c'eq'ue. Ja' jechoxuc li jo'oxuque. ¿Mi yu'un ava'iic ti ta ono'ox xavich'ic vocal yu'un Dios ti latalic ta anile, yo' tal ac'anic avich'ic jo'e? **8** Pero sc'an ba'i xavaq'uic ta ilel mi avictaojic xa li c'ustic chopol chapasique. Mu me xanopic: “Ja' jmuc'ta moltocutic ta vo'one li Abrahame, ja' jech ta ono'ox xijcolcutic”, mu me xachiic. Chacalbeic, li Diose xu' yu'un ta sc'atajesbe ta snitilul Abraham li tonetic li'l'i. **9** Li jo'oxuque ja' jechoxuc jech chac c'u cha'al te'etic ti muc bu lec li sat ta xaq'ue. Te xa metsel yec'l'lal li ta yoque yu'un ta xa xich' ts'etel. Ta xich' chiq'uel ta c'oc' —xi li Juane.

**10** Li crixchanoetique jech la sjac'beic li Juane:

—¿C'usi sc'an ti ta jpascutique cha'a? —xiic.

**11** Itac'av li Juane:

—Li buch'u oy cha'lic sc'u'e ac'o yac'be jlicue li buch'u mu'yuc sc'u'e. Li buch'u oy sve'ele ac'o yac'be li buch'u mu'yuc sve'ele —xut.

**12** Italic jayvo' jtsobpatanetic yu'un tsc'an chich'ic jo' e'uc. Jech c'ot sjac'beic li Juane:

—Jchanubtasvanej, li jo'oncutique ¿c'usi ta jpascutic e'uc? —xiic.

**13** Li Juane jech laj yalbe:

—Mu me xac'anbeic ta más li spatanic ti chatsobique. Ja' no'ox jech yepal xac'anbeic ti c'u sba avich'ojic mantale —xut.

**14** Te oy nojtoc jayvo' soltaroetic. Jech la sjac'beic e'uc li Juane:

—Li jo'oncutique ¿c'usi ta jpascutic e'uc? —xiic.

Itac'av li Juane:

—Mu me buch'u xasibtesic, mu me buch'u xasa'beic smul yo' jech xu' chac'anbeic o li staq'uinique. Muyabajanic no'ox ti c'u yepal chavich' atojolique —xut.

**15** Scotol li crixchanoetique ta xal ta yo'onic mi ja' xa nan li buch'u t'ujbil yu'un Dios ti ta x'och ta ajvalilal li Juane. **16** Li Juane jech laj yalbe scotol li crixchanoetique:

—Li jo'one ja' no'ox cabtel ta xcac'be yich'ic jo' li buch'utic chictaic li c'ustic chopol ta spasique. Pero oy to buch'u ts'acal ta xtal, ja' más tsots yabtel yich'oj. Li jo'one muc bu tsots cabtel quich'oj. Mu c'usi xu' cu'un ta jcolta o. Ac'o mi sloc'beel xonob, mu xu' chca'i yu'un mu c'usi xitun o. Yan li buch'u ts'acal ta xtale, ja' chayac'beic avich'ic li Ch'ul Espíritu ti co'ol schi'uc c'eq'ue yu'un ta sloq'ues scotol li c'ustic chopol ta avo'onique. **17** Li buch'utic ta sc'an loq'uesbeel li c'ustic chopol ta yo'onic, ja' ta x'iq'ueic o sbatel osil. Yan li buch'utic mu sc'an loq'uesbeel ja' ta xbatic o ta c'oc'

li yo' bu mu ono'ox xtup'e. Jech  
chac c'u cha'al li buch'u ta xic'a  
strigoe. Mi ilaj yo'on ta yic'ale, ta  
stsob scotol li strigoe, ta stic' ochel  
ta snail. Scotol li ste'ele schi'uc li  
solile ta schic' ta c'oc' —xi li Juane.

<sup>18</sup>Li Juane oy ep c'ustic lec laj  
yalbe li schi'iltac ta israelale. Ja' laj  
yalbe ti li' xa oy li buch'u sc'opla  
ono'ox chtal ventainvanuque. <sup>19</sup>Laj  
yalbe nojtoc li ajvalil Herodes ti ep  
li c'ustic chopol ta spase. Laj yalbe  
nojtoc ti chopol ti la spojbe yajnil  
li yits'ine. Herodías sbi li antse.  
Ja' Felipe sbi li yits'in li Herodese.  
<sup>20</sup>Pero muc sch'un. Más to chopol  
li c'usi la spas li Herodese yu'un la  
stic' ta chuquel li Juane.

**Ja' sc'opla ti laj yich' jo' li Jesuse**

(Mt. 3.13-17; Mr. 1.9-11)

<sup>21</sup>C'alal ja' o te ta xac'be yich'ic jo'  
ep crixchanoetic li Juane, te ic'ot li  
Jesuse, i'ac'bat yich' jo' e'uc. La sta  
ta na'el Dios li Jesuse. C'alal ja' o ta  
sta ta na'el Diose, ijam li vinajele.  
<sup>22</sup>Iyal talel ta sba Jesús li Ch'ul  
Espíritue. Co'ol schi'uc jcot jculajte'  
yilel. Jech iyich' o li Ch'ul Espíritue.  
Li Diose ic'opoj talel ta vinajel, jech  
laj yal:

—Jo'ot Jnich'onot, toj c'uxot ta  
co'on. Ximuybaj no'ox avu'un —xi.

**Ja' sc'opla li c'usi sbiic snitilultac li  
sme' li Jesuse**

(Mt. 1.1-17)

<sup>23</sup>C'alal lic stsac li yabtel li  
Jesuse, yich'oj lajuneb scha'vinic  
(30) jabil. Ta xalic li crixchanoetic  
ti ja' snich'on Josee pero ma'uc. Li  
Jesuse ja' smom li Elí ti ja' stot li  
Maríae. <sup>24</sup>Li stot li Elie ja' Matat.

Li stot li Matate ja' Leví. Li stot li  
Levie ja' Melqui. Li stot li Melquie  
ja' Jana. Li stot li Janae ja' José.  
<sup>25</sup>Li stot li Josee ja' Matatías. Li  
stot li Matatíase ja' Amós. Li stot  
li Amose ja' Nahúm. Li stot li  
Nahume ja' Esli. Li stot li Eslie  
ja' Nagai. <sup>26</sup>Li stot li Nagaie ja'  
Maat. Li stot li Maate ja' Matatías.  
Li stot li Matatíase ja' Semei. Li  
stot li Semeie ja' José. Li stot li  
Josee ja' Judá. <sup>27</sup>Li stot li Judae  
ja' Joana. Li stot li Joanae ja' Resa.  
Li stot li Resae ja' Zorobabel. Li  
stot li Zorobabele ja' Salatiel. Li  
stot li Salatiele ja' Neri. <sup>28</sup>Li stot li  
Nerie ja' Melqui. Li stot li Melquie  
ja' Adi. Li stot li Adie ja' Cosam.  
Li stot li Cosame ja' Elmodam. Li  
stot li Elmodame ja' Er. <sup>29</sup>Li stot  
li Ere ja' Josué. Li stot li Josuee ja'  
Eliezer. Li stot li Eliezere ja' Jorim.  
Li stot li Jorime ja' Matat. <sup>30</sup>Li stot  
li Matate ja' Leví. Li stot li Levie ja'  
Simeón. Li stot li Simeone ja' Judá.  
Li stot li Judae ja' José. Li stot li  
Josee ja' Jonán. Li stot li Jonane ja'  
Eliaquim. <sup>31</sup>Li stot li Eliaquime ja'  
Melea. Li stot li Meleae ja' Mainán.  
Li stot li Mainane ja' Matata. Li  
stot li Matatae ja' Natán. <sup>32</sup>Li stot li  
Natane ja' David. Li stot li Davide  
ja' Isaí. Li stot li Isaie ja' Obed. Li  
stot li Obede ja' Booz. Li stot li  
Booze ja' Salmón. Li stot li Salmone  
ja' Naasón. <sup>33</sup>Li stot li Naasone ja'  
Aminadab. Li stot li Aminadabe ja'  
Aram. Li stot li Arame ja' Esrom. Li  
stot li Esrome ja' Fares. Li stot li  
Farese ja' Judá. <sup>34</sup>Li stot li Judae ja'  
Jacov. Li stot li Jacove ja' Isaac. Li  
stot li Isaaque ja' Abraham. Li stot  
li Abrahame ja' Taré. Li stot li Taree

ja' Nacor. <sup>35</sup>Li stot li Nacore ja'  
Serug. Li stot li Serugue ja' Ragau.  
Li stot li Ragaue ja' Peleg. Li stot li  
Pelegue ja' Heber. Li stot li Hebere  
ja' Sala. <sup>36</sup>Li stot li Salae ja' Cainán.  
Li stot li Cainane ja' Arfajad. Li stot  
li Arfajade ja' Sem. Li stot li Seme  
ja' Noé. Li stot li Noee ja' Lamec.  
<sup>37</sup>Li stot li Lameque ja' Matusalén.  
Li stot li Matusalene ja' Enoc. Li  
stot li Enoque ja' Jared. Li stot li  
Jareda ja' Mahalaleel. Li stot li  
Mahalaleele ja' Cainán. <sup>38</sup>Li stot li  
Cainane ja' Enós. Li stot li Enose ja'  
Set. Li stot li Sete ja' Adán. Li stot li  
Adane ja' li Diose.

**Ja' sc'oplal ti ta'ox slo'lo Jesús li  
banquilar pucuje**

(Mt. 4.1-11; Mr. 1.12-13)

**4** Li Jesuse ventainbil yo'on  
yu'un li Ch'ul Espíritu li  
c'alal laj yicta li Juan li te ta uc'um  
Jordane. Il'iq'ue batel ta taqui  
jamaltic yu'un li Ch'ul Espíritue.  
<sup>2</sup>Cha'vinic c'ac'al te oy ta taqui  
jamaltic. Muc bu xve' pero muc  
xvi'naj. Ts'acal to ital vi'nal iya'i  
jehc ital li banquilar pucuje, tal  
slo'lo Jesús ti yaloje. <sup>3</sup>Jech i'albat  
yu'un li banquilar pucuje:

—Mi jo'ot Snich'onot li Diose, albo  
li ton li'lí ti ac'o c'atajuc ta vaje  
—x'utat.

<sup>4</sup>Itac'av li Jesuse:

—Jech ts'ibabil ta sc'op Dios:  
“Mu ta vajuc no'ox chijcuxiutic. Ja'  
sc'an ta jch'unbetic nojtoc li c'ustic  
chijyalbutic li Diose”, xi ts'ibabil —  
xi li Jesuse.

<sup>5</sup>Li banquilar pucuje laj yic' batel  
ta jun toyol vits li Jesuse. Ta sju'el  
no'ox iyac'be yil sp'ejel balumil ta

ora no'ox schi'uc li c'u sba ta spasic  
mantal li ajvaliletique. <sup>6</sup>Jech laj yal  
li banquilar pucuje:

—Jo'ot chacac'be aventain scotol li  
c'usi chavile jech cha'ich'e o ta muc'  
yu'un scotol li crixchanoetique.  
Yu'un jo'on ac'bil jventain scotol,  
jech xu' chcac'be e'uc li buch'utic  
ta jc'an chcac'bee. <sup>7</sup>Scotol li  
c'usi chavile ja' avu'un scotol mi  
chavich'un ta muq'ue, mi chaquejan  
aba ta jtojole —xi li banquilar  
pucuje.

<sup>8</sup>Itac'av li Jesuse:

—Batan, Satanás, mu jch'un  
li c'usi chavalbune. Yu'un jech  
ts'ibabil ta sc'op Dios: “Ja' no'ox  
xavich'ic ta muc' stuc li Cajvaltic  
Diose. Ja' no'ox xapasic li c'usi ta  
sc'an”, xi ts'ibabil —xut.

<sup>9</sup>Li banquilar pucuje laj yic' batel  
ta Jerusalén li Jesuse. Laj yic'  
muyel ta sjol li muc'ta ch'ulnae.  
C'alal te xa'ox va'alic ta jol ch'ulnae,  
xi iyal li banquilar pucuje:

—Mi jo'ot Snich'onot li Diose, jip  
aba yalel li'i. <sup>10</sup>Yu'un jech ts'ibabil  
ta sc'op li Diose:

Dios chastacbe yalel  
yaj'angeltac, ja' chaschabi.

<sup>11</sup>Ja' chastsac ba ta sc'obic li ch'ul  
ángelétique  
yo' jech mu xamaj aba ta ton,  
xi ts'ibabil —x'utat li Jesuse.

<sup>12</sup>Itac'av li Jesuse:

—Pero jech ts'ibabil ta sc'op li  
Dios nojtoque: “Mu me xaq'uelbeic  
yo'on li Cajvaltic Diose”, xi ts'ibabil.  
Mi ta jip jba yalele, yu'un ta  
jq'uelbe yo'on Dios mi ta melel  
chiscoltae —xi li Jesuse.

<sup>13</sup>C'alal iyil li banquilar pucuj ti  
muc spas ta canal li Jesuse, ibat. Li

banquial pucuje ta smala sq'uel c'u ora ta spas ta canal li Jesuse.

**Ja' sc'oplad ti te la sliques yabtel ta**

**Galilea balumil li Jesuse**

(Mt. 4.12–17; Mr. 1.14–15)

**14** Li Jesuse isut batel ta Galilea. Scotol xu' yu'un ta spas ta sventa stsatsal li Ch'ul Espíritue. Ipuc sc'oplad ta sp'ejel Galilea balumil ti naca lec li c'ustic la spase schi'uc li c'ustic laj yale. **15** Te ichanubtasvan ta sch'ulnaic li schi'iltaç ta israelale. Lec sc'oplad yu'unic Jesús li crizchanoetique.

**Ja' sc'oplad ti muc bu x'ich'e ta muc'**

**li te ta Nazaret li Jesuse**

(Mt. 13.53–58; Mr. 6.1–6)

**16** Li Jesuse isut batel ta jteclum Nazaret li yo' bu ich'ie. C'alal ja' o sc'ac'alil ta xcuxic li j'israelétique, te ibat ta ch'ulna e'uc li Jesuse. Yu'un nopem ono'ox te chc'otilan ta ch'ulna li c'alal ja' o sc'ac'alil ta xcuxique. Li Jesuse iva'i yu'un ta sc'an ta xapta li sc'op Dios.

**17** I'ac'bat li balbil jun li ts'ibabil comel yu'un li Isaías li iyal sc'op Dios ta vo'onee. C'alal la sjilch'un li balbil june, ja' la sta li bu jech ts'ibabile:

**18** Ja' sventainojun li Ch'ul Espíritu ti junic schi'uc li Diose.

T'ujbilun yu'un Dios yo' ta xcalbeic ti ta xc'uxubinatic yu'un Dios li me'onétique.

Li buch'utic ta xat yo'onique, tal calbeic ti ta jventa jo'on ta stsatsubtasbat yo'onique.

Li buch'utic ochemic ta jtunel yu'un li mulile, tal calbeic ti ta jventa jo'on chloq'uc ta j'ech'ele.

Li buch'utic ma'satetic ya'el ta scoj li smulique, tal calbeic ti ta jventa jo'on ta xjam li satique.

Li buch'utic chopol ta x'ileique, tal calbeic ti jo'on tal jcoltae.

**19** Listac talel yo' ta xcalbeic ti ista xa sc'ac'alil ta xcoltaatic yu'un li Diose,

xi ta xal li bu la sq'uel li Jesuse.

**20** C'alal ilaj yo'on ta sq'uelel li sc'op Dios li Jesuse, la sbal li june, laj yac'be li buch'u ti ja' yabtel ta schabie. Ichoti Jesús ta stojol scotolic. Scotol li buch'utic te oyic ta yut li ch'ulnae la sq'uelbeic sat li Jesuse. **21** Li Jesuse jech laj yal:

—Li avie ic'ot xa ta pasel li c'usi ts'ibabil ta sc'op Dios li ava'iique —xi laj yalbe scotol li crizchanoetique.

**22** Scotolic lec iyalbeic sc'oplad li Jesuse. Ich'ay o yo'onic ta sventa ti toj lec li c'usi laj yale. Jech laj yalbe sbaic:

—Li'i xcojtaquintic. Ja' snich'on li Josee —xut sbaic.

**23** Li Jesuse jech laj yal:

—Oy buch'utic jech ta xalic: “Mi melel ti jo'ot jpoxtavanejote, poxta aba atuc. Ja' to ta jch'uncutic o ti ta melel jo'ot jpoxtavanejote”, xiic. Jech chac'an chavalbecun ya'el yu'un chac'anic ti ac'o jpas li' ta jlumaltic li c'usi ava'iic ti la jpas li te ta jteclum Capernaume. Yu'un ja' to chach'unic o ti avalojique mi avilic icac' ta ilel li jtsatsal ju'ele ti jo'on ac'bil cabtel yu'un li Diose —xi li Jesuse.

**24** Jech laj yalbe nojtoc:

—Melel li c'usi chascalbeique, li butic ch'otic li buch'utic ta xalic

li sc'op Diose ja' ac'bilic ta venta. Pero ta yosilal stuquique mu x'aq'ueic ta venta. <sup>25</sup> Melel li c'usi chacalbeique, c'alal li' to'ox oy ta balumil li Elías li iyal sc'op Dios ta vo'onee, o'lol schanibal jabil muc bu xac' jo' li' ta cosilaltique. Jech itsaqueic ta vi'nal scotol li crixchanoetique. Li ta jchi'iltactic ta israelale oy ep me'anal antsetic. <sup>26</sup> Pero li Elíase muc bu te xtaque batel li yo' bu oyic li me'anal antsetic li ta jlumaltique. Ja' te itaque batel ta sna jun me'anal ants ti ma'uc jchi'iltic ta israelale. Ja' te nacal ta jteclum Sarepta, ja' nopol xil sbaic schi'uc li jteclum Sidone. <sup>27</sup> Jech nojtoc c'alal li' to'ox oy ta balumil li Eliséo li iyal sc'op Dios ta vo'onee, ep jchi'iltactic tsacbilic ta c'a'el chamel. Pero mu junuc icoltaatic. Ja' no'ox icoltaat li Naamán li liquem talel ta Siria balumile —xi li Jesuse.

<sup>28</sup> C'alal laj ya'ibeic sc'op Jesús li j'israeletic li te tsobolic ta ch'ulnae, chopol iya'iic, i'ilinic. <sup>29</sup> Laj yi'q'uic loq'uel ta ti' jteclum li Jesuse. Li jteclume te oy ta ch'ut vits. Laj yi'q'uic batel ta jol vits li Jesuse yu'un tsc'an ta sjipic yael ta ch'entic. <sup>30</sup> Li Jesuse te ijelav batel ta o'lol li crixchanoetique, ibat.

**Ja' sc'oplal ti la sloq'uesbe pucuj ta yo'on jun vinic li Jesuse**

(Mr. 1.21–28)

<sup>31</sup> Li Jesuse te ibat ta jteclum Capernaum li te ta Galilea balumile. C'alal ista sc'ac'alil ta xcuxic li j'israeletic, li Jesuse te i'ochic ta ch'ulna schi'uc li yajchanbalajeltaque.

Te ichanubtasvan li Jesuse. <sup>32</sup> Li crixchanoetique toj ch'ayel no'ox yo'onic ti c'u sba ichanubtasvan li Jesuse. Toj lec ichanubtasvan yu'un lec sna' li c'usi ta sc'an li Diose.

<sup>33</sup> Te oy ta yut ch'ulna jun j'israelal vinic ochem pucujetic ta yo'on. Tsots ic'opoj li vinique.

<sup>34</sup> Jech laj yal:

—¿C'u cha'al tal atic' aba ta jtojolcutic, jo'ot Jesusot ti liquemot talel ta Nazarete? ¿Mi yu'un tal atacuncutic batel li yo' bu ta xquich'cutic o vocole? Xacojtaquin buch'uot. Jo'ot Snich'onot li Diose, jo'ot ti mu'yuc amule —xut.

<sup>35</sup> Li Jesuse la spajes li pucujetic li te sch'amunojbe ye li vinique, jech laj yalbe:

—Anchanic, loc'anic batel ta yo'on li vinique —xut.

Iyal ta lum li vinic ta scoj li pucujetique, jech laj loc'uc ta yo'on li vinic li pucujetique. Muc bu xya'ij li vinique. <sup>36</sup> Li crixchanoetique toj ch'ayel no'ox yo'onic scotolic, jech laj yalbe sbaic:

—¿Buch'u li li' taleme? Oy stsatsal sju'el. Xu' yu'un ta sloq'ues li pucujetique. Ch'unbil smantal —xut sbaic.

<sup>37</sup> C'alal jech la spas li Jesuse, ipuc sc'oplal ta scotol li bic'tal jteclumetic li te nopol ta Capernaume.

**Ja' sc'oplal ti icol yu'un Jesús li sme'ni' li Pedro**

(Mt. 8.14–15; Mr. 1.29–31)

<sup>38</sup> C'alal iloc' ta ch'ulna li Jesuse, te ibat ta sna Simón Pedro. Te oy sme'ni' li Pedro, ip ta c'oc!. Li Pedro jech laj yalbe li Jesuse:

—Avocoluc coltabun li jme'ni'e  
—xut.

<sup>39</sup>Li Jesuse inopoj ba li yo'  
bu puch'ul li antse, laj yal ti  
ac'o tup'uc li sc'ac'ale. Itup' ta  
ora li sc'ac'ale. Ilic ta stem, lic  
mac'lanvanuc.

**Ja' sc'oplal ti icol yu'un Jesús ep  
jchamelajeletic**

(Mt. 8.16–17; Mr. 1.32–34)

<sup>40</sup>C'alal yu'un xa'ox chch'ay  
c'ac'ale, laj yiql'uic talel ta stojol  
Jesús scotol li jchamelajeletique,  
c'usiuc no'ox chamelal ip cha'iic. Li  
Jesuse laj yac'anbe sc'ob ta sbaic,  
icol o scotolic. <sup>41</sup>Oy ep buch'utic  
iloc' pucujetique ta yo'onic. Li  
pucujetique tsots ic'opojic li c'alal  
iloq'uique. Jech laj yalic:

—Jo'ot Snich'onot li Diose —xiic.

Li Jesuse laj yalbe li pucujetique  
ti ac'o mu xc'opojique. Yu'un li  
pucujetique sna'ojic ti ja' t'ujbil  
yu'un Dios ti ta x'och ta ajvalilal li  
Jesuse.

**Ja' sc'oplal ti laj yal sc'op Dios li te  
ta Galilea balumil li Jesuse**

(Mr. 1.35–39)

<sup>42</sup>Ta yoc'omal c'alal isacub  
osile, iloc' batel li Jesuse, ibat li  
yo' bu mu'yuc crixchanoetique.  
C'alal iloc' batele, isa'e yu'un li  
crixchanoetique. C'alal istaigue,  
tsc'an ta spajesic yo' ac'o joc'tsajuc  
li te ta slumalique. <sup>43</sup>Li Jesuse jech  
laj yalbe:

—Persa chba calbeic li jchi'iltactic  
ta yan jteclumetic ti ista xa  
sc'ac'alil ti chventainvan li Diose.  
Yu'un ja' cabtel ti tacbilun talel li'i  
—xi.

<sup>44</sup>Li Jesuse ibat ta sch'ulnaic li  
sch'iiltac li te ta Galilea balumile,  
ba yal ti ista xa sc'ac'alil ti  
chventainvan li Diose.

**Ja' sc'oplal ti istaic ep choy li  
yajchanbalajeltac li Jesuse**

(Mt. 4.18–22; Mr. 1.16–20)

**5** Li Jesuse te ic'ot ta ti'nab ta  
Galilea balumil. Genesaret  
sbi li nabe. Li crixchanoetique  
toj ep la stsob sbaic talel li yo' bu  
oy li Jesuse yu'un tsc'an cha'iic li  
sc'op Diose. <sup>2</sup>Li Jesuse iyil te chib  
canava ta nopol ti'nab. Li yajvaltac  
li chib canavae ja' jtsac-choyetic.  
Loq'uemic batel ta schuq'uel snuti'ic  
li stsacobil schoyique. <sup>3</sup>Li Jesuse  
i'och ta jun canava, ja' scanava li  
Simón Pedro. Laj yalbe Pedro ti  
ac'o xanubtas batel jutuc ta nab  
li scanavae. Li Jesuse te ichoti  
ta yut li canavae, la schanubtas  
scotol li crixchanoetic li te tsobolic  
ta ti'nabe. <sup>4</sup>C'alal ilaj yo'on ta  
schanubtasel li crixchanoetic li  
Jesuse, jech laj yalbe li Pedro:

—Xanubtaso batel la acanavae,  
batic li yo' bu lec nat li nabe. Ja' te  
xatiq'uic ochel la atsacobchoyique  
yu'un ja' te chataic ep li choye —xi  
li Jesuse.

<sup>5</sup>Itac'av li Pedro:

—Jchanubtasvanej, sjunul  
ac'ubal ijsa'cutic li choye pero  
muc bu ijtagutic jcotuc. Pero ta  
sventa ti jo'ot chaval mantale,  
jech ta jtic'cutic ochel nojtoc li  
jtsacobchoyutique —xi.

<sup>6</sup>C'alal la stic' ochel ta yut nab  
li stsacob schoyique, toj ep tajmec  
i'och li choye. Ijat li stsacob  
schoyique yu'un toj ol li choye. <sup>7</sup>La

svelc'abtaic talel li yan schi'iltaquic li te tiq'uilic ta yan canavae yo' ac'o xtal coltaaticuc. Italic. Li chib canavae inoj ta choy. Jutuc xa mu imuquij ta nab li canavaetique yu'un toj ol li choye. <sup>8</sup>C'alal iyil Simón Pedro ti inoj ta choy schibal li canavae, la squejan sba ta stojol li Jesuse. Jech laj yalbe:

—Cajval, mu xachi'inun yu'un li jo'one jpasmulilun —xi li Pedroe.

<sup>9</sup>Ti jech laj yale, yu'un toj ch'ayel no'ox yo'onic, toj labal iya'iic schi'uc li schi'iltac ti toj ep istaic li choye. <sup>10</sup>Toj labal iya'iic e'uc li Jacobo schi'uc Juan, ja' li snich'nab li Zebedeo, ja' li schi'il sbaic ta tsac'choy schi'uc li Simone. Li Jesuse jech laj yalbe li Pedroe:

—Mu me xaxi!. Chajeltabe avabtel. Chajchanubtas li c'u sba chba asa'bun talel crixchanoetique — x'utat yu'un li Jesuse.

<sup>11</sup>C'alal iloq'uic ta ti'nabe, iloq'uic ta canava. Laj yictaic o li yabtelique, la schi'inic batel li Jesuse.

**Ja' sc'oplal ti icol yu'un Jesús jun vinic ti tsacbil ta c'a'el chamele**

(Mt. 8.1–4; Mr. 1.40–45)

<sup>12</sup>Ta yan o c'ac'al c'alal te oy ta jun jteclum li Jesuse, ital jun j'israelal vinic tsacbil ta c'a'el chamel. C'alal iyil ti te oy li Jesuse, tal squejan sba ta stojol. Jech laj yalbe:

—Cajval, mi xac'an xacoltabun li jchamele, coltaun. Jna'oj ti scotol xu' avu'une —xi.

<sup>13</sup>Li Jesuse laj yac'be sc'ob ta sba li jchamelajeje, jech laj yalbe:

—Ta jcolta la achamele. Colan cha'a —xut.

Icol ta ora. <sup>14</sup>Li Jesuse jech laj yalbe nojtoc:

—Mu me buch'u xavalbe ti la jcoltaote. Ja' no'ox ba ac' aba ta ilel ta stojol li palee. Ac'bo li smoton Dios jech chac c'u cha'al yaloj ono'ox li Moisés ta vo'onee, ja' ta sna'ic o li jchi'iltactic ti icol xa la achamele —xut.

<sup>15</sup>Jech ipuc o sc'oplal li Jesuse. Toj ep crixchanoetic ta xtalulanic ta stojol li Jesuse yu'un tsc'an ta xa'ibeic sc'op, schi'uc tsc'anic coltael ta schamelic. <sup>16</sup>Li Jesuse oy la svoc' sba batel ta taqui jamaltic yu'un ba sta ta na'el Dios stuc.

**Ja' sc'oplal ti icol yu'un Jesús jun vinic ti mu'yuc yipal jun yoc sc'obe**

(Mt. 9.1–8; Mr. 2.1–12)

<sup>17</sup>Ta yan o c'ac'al c'alal ja' o ta xchanubtasvan li Jesuse, te chotolic e'uc jayvo' jfariseotic schi'uc jayvo' li buch'utic sp'isoj sbaic ta jchanubtasvanej ta smantaltac li Diose. Ja' te liquemic talel ta jujun jteclum ta Galilea balumil, schi'uc ta Judea balumil, schi'uc li ta jteclum Jerusalene. Li Jesuse i'ac'bat stsatsal sju'el yu'un Dios jech icol yu'un scotol li jchamelajeletique. <sup>18</sup>Te italic ta stojol Jesús jayvo' j'israeletic, la sq'uechic talel jun schi'il ti mu'yuc yipal jun yoc sc'obe. Tsc'an ch-ochic ta yut na li yo' bu oy li Jesuse yu'un chba spuch'anbeic ta stojol Jesús li jchamelajeje. <sup>19</sup>Pero mu xu' x'ochic yu'un stsinoj sbaic tajmec ochel li crixchanoetique. Te imuyic ta jolna yu'un pach'al li jolnae. La sjomic jutuc li jolnae yu'un ja' te la schechic yalel schi'uc spop li

jchamelajeje. Te ic'ot yu'unic li yo' bu oy li Jesuse. <sup>20</sup>Li Jesuse iyil ti sch'unojic ti oy sju'ele, jech laj yalbe li jchamelajeje:

—Tata, pasbilot xa perton yu'un scotol amul —xut.

<sup>21</sup>Li buch'utic sp'isoj sbaic ta jchanubtasvanej ta smantaltac li Diose schi'uc li jfariseoetique jech la snop ta yo'onic: “Li vinic li'l'i ta sp'is sba ta Dios. Muc buch'u xu' chispasbutic perton yu'un jmultic, ja' no'ox Dios stuc”, xi ta yo'onic.

<sup>22</sup>Li Jesuse sq'ueloj li c'usi la snop ta yo'onic, jech laj yalbe:

—¿C'u cha'al ti muc bu lec li c'usi chanopique? <sup>23</sup>Ta melel buch'uuc no'ox xu' ta xal: “Pasbilot xa perton yu'un amul”, ti xie, yu'un mu vocluc ta alel. Jech nojtoc mu vocluc ta alel: “Lican, xanavan”, ti xijchie. Pero ja' sc'an chaq'uelic mi melel ta xc'ot ta pasel yu'un li buch'u jech ta xale. <sup>24</sup>Jo'one laj cal xa ti pasbil xa perton yu'un li smul li vinique. Q'uelic me li c'usi ta jpas li avie yo' jech chana'ic o ti jo'on no'ox ta jpasbe perton yu'un smulic li crixchanoetic li' ta balumile, jo'on li co'ol crixchanoutique —xi li Jesuse.

Li Jesuse jech laj yalbe li jchamelajeje:

—Jo'on chacalbe, lican, ich'o batel la apope, batan ta ana —xut.

<sup>25</sup>Ilic ta ora li jchamelajeje. Te sq'uelojic scotolic ti laj yich' batel li spope, ibat ta sna. Laj yal batel slequilal Dios. <sup>26</sup>C'alal iyilic li crixchanoetic, toj ch'ayel no'ox yo'onic. Laj yalic coliyal Dios. Ta sventa ti toj ch'ayel yo'onic, ixi'ic. Jech laj yalbe sbaic:

—Muc bu jech quilojtic jech chac c'u cha'al iquiltic li avie —xut sbaic.

**Ja' sc'oplal ti i'iq'ue ta yajchanbalajel yu'un Jesús li Levie, ja' li Mateo sbi nojtoque**  
(Mt. 9.9–13; Mr. 2.13–17)

<sup>27</sup>C'alal la spas jech li Jesuse, iloc' batel. Te iyil jun jtsobpatan, Leví sbi. Te chotol ta schotleb li yo' bu ta stoj spatanic li crixchanoetique. Li Jesuse jech laj yalbe:

—La' chi'inun batel —xut.

<sup>28</sup>Li Levie laj yicta o li yabtele, la schi'in batel li Jesuse.

<sup>29</sup>Ta ts'acale laj yic' ta ve'el Jesús li Levie yu'un chich' ta muc'. Schi'uc laj yic' ep schi'iltac nojtoc li co'ol jtsobpatanetic schi'uque. Schi'uc oy buch'utic yan laj yic'an nojtoc. Te co'ol la schi'inic ta chotlej ta mexa li Jesuse. <sup>30</sup>Li buch'utic sp'isoj sbaic ta jchanubtasvanej ta smantaltac li Diose, schi'uc li jfariseoetique, chopol iyilic li c'usi ta spas Jesús schi'uc li yajchanbalajeltaque. Ja' yu'un laj yalbeic li yajchanbalajeltaque:

—¿C'u cha'al chachi'inic ta ve'el li jtsobpatanetic schi'uc li jpasmuliletique? —xiic.

<sup>31</sup>Itac'av li Jesuse:

—Li buch'utic muc bu ipique mu sc'anic poxtael. Ja' no'ox ta sc'anic poxtael li buch'utic ipique. <sup>32</sup>Li jo'one ma'uc tal jsa' li buch'utic mu'yuc smulic ti yalojique. Ja' tal jsa' li jpasmuliletique yo' jech chictaic o li smulique —xi li Jesuse.

**Ja' sc'opla ti ijac'bat Jesús  
c'u cha'al mu xicta yiximic li  
yajchanbalajeltaque  
(Mt. 9.14–17; Mr. 2.18–22)**

**33** Oy buch'utic jech la sjac'beic li Jesuse:

—Li yajchanbalajeltac li Juane ep ta velta ta xicta yiximic yu'un ta staic ta na'el Dios. Jech ta spasic e'uc li yajchanbalajeltac li jfariseoetique. ¿C'u cha'al mu jechuc ta spasic e'uc la avajchanbalajeltaque yu'un scotol c'ac'al chve'ic? —xutic li Jesuse.

**34** Li Jesuse jech laj yalbe:

—C'alal yacal nupunele, te oy li jnupunel quereme, ja' yu'un mu xu' ta xicta yiximic li yuts' yalaltac li jnupunel quereme yu'un te to schi'uquic. **35** Ja' no'ox jechic e'uc li cajchanbalajeltaque, mu jechuc o smelol ti ta xicta yiximique, ti ta xat yo'onique, yu'un li'to jchi'uquique. Ja' to mi ic'ot sc'ac'alil ti chismilic li buch'utic chiscontrainique, ja' to xu' ta xat yo'onic, xu' ta xicta yiximic li cajchanbalajeltaque —xi li Jesuse.

**36** Li Jesuse jech laj yalbe jun lo'il:

—Li buch'u ta sch'un li c'usi ta xcale, persa ta xicta li c'usi sch'unoj to'ox ti jech ta xcol o ti yaloje. Persa ta sloq'uel yo'on ta sch'un li c'usi ta xcale yo' jech ta xcol o. Jech chac c'u cha'al li buch'u ta xpac'omaje, ma'uc yu'un ta stuch' loq'uel jset'uc yach'c'u' yo' ta spac' o li se'a'c'u'e. Ti mi jech tspase, altic chixtalan li yach'c'u'e. Yu'un li ach' poq'ue ta sjat más li poco c'u'ile yu'un muc to'ox bu mutsem. **37** Jech nojtoc li ach' ya'llel ts'usub ti

ta xa xpajube, muc buch'u ta sch'ol ta poco yav li pasbil ta nucule. Mi jech ta spasique, c'alal ta xvocan stuc li ya'llel ts'usube, ta xt'om li yave. Altic ta xmal scotol li ya'llel ts'usube. Li yave altic ta xch'ay. **38** Li ach' ya'llel ts'usub li ta xa xpajube, ja' sc'an ti ta ach' yav ta xich' ch'olele. Jech lec ta xcom o schi'uc yav li ya'llel ts'usub li pajubem xae. **39** Li buch'u yuch'oj xa li poco ya'llel ts'usub li pajubem xae, mu sc'an xuch' li ach' ya'llel ts'usube. Jech ta xal: “Ja' toj lec li poco ya'llel ts'usube”, xiic —xi li Jesuse.

**Ja' sc'opla ti isa'bat smulic li  
yajchanbalajeltac Jesús ta scoj ti la  
sc'asic jaychex trigo li ta sc'ac'alil ta  
xcuxique**

*(Mt. 12.1–8; Mr. 2.23–28)*

**6** Ta sc'ac'alil ta xcuxic li j'israeletique, te ijelavic ta be ta trigotic schi'uc li yajchanbalajeltac li Jesuse. Li yajchanbalajeltaque la sc'asic jaychex trigo, la sju' sc'uxic. **2** I'ileic yu'un jayvo' jfariseoetic, jech laj yalic:

—¿C'u cha'al chapasic li c'usi mu xu' jpastic li ta sc'ac'alil ta jcuxique? —x'utatic.

**3** Itac'av li Jesuse:

—Aq'uelojic ta sc'op Dios li c'usi la spas li David li c'alal ivi'najic schi'uc li schi'iltac ta xanbale. **4** Te ic'otic ta ch'ulna. Li Davide la sve' li pan li te oy ta mexa ta svonta smoton li Diose. Ac'o mi yaloj Dios ti ja' no'ox xu' ta sve'ic li paleetique, pero la sve'ic schi'uc li schi'iltac li Davide. Pero muc bu sta o smul ti jech la spase —xi li Jesuse.

**5** Jech laj yal nojtoc li Jesuse:  
—Jo'on li co'ol crixchanoutique,  
jo'on yajvalun li sc'ac'alil ti ta  
jcuxtique. Jo'on chcal li c'ustic xu'  
ta pasele —xi li Jesuse.

**Ja' sc'opla ti icol yu'un Jesús jun  
vinic ti smoch'oj sba sbic'taltac  
sbats'ic'obe**  
(Mt. 12.9–14; Mr. 3.1–6)

**6** Ta yan o c'ac'al c'ac'al ja' o  
sc'ac'alil ta xcuxic li j'israelétique,  
li Jesuse i'och ta sch'ulnaic,  
ichanubtasvan. Te oy jun vinic ti  
smoch'oj sba sbic'taltac sbats'ic'obe.  
**7** Te oyic e'uc jayvo' li buch'utic  
sp'isoj sbaic ta jchanubtasvanej  
ta smantaltac li Diose, schi'uc  
jayvo' jfariseoetic. Tal sq'uelic mi  
ta xcoltavan Jesuse li ta sc'ac'alil ta  
xcuxique yu'un tsc'an ta sa'beic smul.  
**8** Li Jesuse sna'oj li c'usi ta snop ta  
yo'onique, jech laj yalbe li vinic ti  
smoch'oj sba sbic'taltac sbats'ic'obe:

—La' va'lán li' ta o'lole —xut.

Li vinique ba va'luc ta o'lol. **9** Li  
Jesuse jech laj yalbe li buch'utic  
sp'isoj sbaic ta jchanubtasvanej  
ta smantaltac Dios schi'uc li  
jfariseoetique:

—Oy c'usi chajac'beic. Li sc'ac'alil  
ta jcuxtique ¿c'usi yaloj Dios ti  
ac'o jpastique? ¿Mi xu' ta jpastic  
li c'usi leque, mi ja' ta jpastic li  
c'usi chopole? ¿Mi chijcoltavan, mi  
chijmilvan? —xut.

**10** Li Jesuse la sq'uelanbe satic li  
buch'utic te chotolique. Jech laj  
yalbe li jchamelajele:

—Tuq'uibtasano li sbic'taltac ac'obe  
—xut.

La stuq'uibtasano li sbic'taltac  
sbats'ic'obe, icol ta ora li sc'obe.

**11** Li jchanubtasvanejetic schi'uc li  
jfariseoetique isoc sjolic ta ora. La  
snopbeic sc'opla Jesúe ti c'u sba xu'  
tsmilique.

**Ja' sc'opla ti la st'uj lajchavo'  
yajchanbalajeltac li Jesuse**  
(Mt. 10.1–4; Mr. 3.13–19)

**12** C'ac'al jech ic'ot ta pasele, ja' o  
ba sta ta na'el Dios ta vits li Jesuse.  
Sjunul ac'ubal te ista ta na'el Dios.

**13** C'ac'al isacub osile, laj yic' scotol  
li buch'utic la schi'in scotol c'ac'ale.  
La st'uj lajchavo' yajchanbalajeltac  
yu'un ja' ta sventainic comel ta  
yalel li sc'ope. Ja' yajtacbalaltac.

**14** La st'uj Simón, ja' Pedro laj  
yac'be yan sbi. Schi'uc Andrés, ja'  
yits'in li Pedroe. Schi'uc Jacobo,  
schi'uc Juan, schi'uc Felipe, schi'uc  
Bartolomé. **15** Schi'uc Mateo, schi'uc  
Tomás, schi'uc otro jun Jacobo,  
ja' snich'on Alfeo. Schi'uc Simón  
ti la schi'in to'ox li jzeloteetique.

**16** Schi'uc Judas, ja' schi'il sbaic ta  
voq'uel schi'uc li Jacoboe. Schi'uc  
Judas Iscariote li buch'u ts'acal to  
iyac' ta c'abal li Jesuse.

**Ja' sc'opla ti icol yu'un Jesús ep  
jchamelajeletic**  
(Mt. 4.23–25)

**17** C'ac'al iyal talel ta vits schi'uc li  
yajchanbalajeltac li Jesuse, schi'uc  
li buch'utic la schi'inic c'ac'al i'ay ta  
vitse, te c'ot staic ep crixchanoetic  
ta stenlejaltic. Te liquemic talel ta  
Judea balumil schi'uc ta jteclum  
Jerusalén, schi'uc ta chib jteclum  
Tiro schi'uc Sidón sbiic, te oy ta  
nopol ti'nab. Yu'un tal ya'ibeic  
sc'lop li Jesuse schi'uc ta sc'anic ti  
ac'o coltaaticuc li ta schameliique.

<sup>18</sup>Italic e'uc li buch'utic ochem pucujetic ta yo'onique. Scotol icol yu'un li Jesuse. <sup>19</sup>Scotol li crixchanoetique tsc'an ta spiquic li Jesuse yu'un iyilic ti ta stsatsal sju'el no'ox Jesús icolic scotol li jchamelajeletique.

**Ja' sc'oplal li buch'utic xmuybajic no'oxe schi'uc li buch'utic ta xich'ic vocole**  
(Mt. 5.1–12)

<sup>20</sup>Li Jesuse la sq'uelanbe sat li yajchanbalajeltaque schi'uc li crixchanoetic li te tsobolique, jech laj yalte:

—Jo'oxuc ti mu c'usi x'ayan avu'unique chavilic ti xamuybajic no'oxe yu'un ja' chasventainoxuc li Diose.

<sup>21</sup>Jo'oxuc ti chavi'najic li avie, chavilic ti xamuybajic no'oxe yu'un cha'ac'bat ave'elic yu'un li Diose.

'Jo'oxuc ti cha'oq'uic li avie, chavilic ti xamuybajic no'oxe yu'un ja' chastsatsubtasboxuc avo'onic li Diose.

<sup>22</sup>Jo'oxuc ti chopol chayiloxuc li crixchanoetique, ti chasp'ajoxuque, ti chayutoxuque, ti chaslabanoxuque, ja' ta jventa jo'on li co'ol crixchanoutique, pero chavilic ti xamuybajic no'oxe. <sup>23</sup>C'alal jech ta xc'ot ta pasel ta atojolique, mu me xavat avo'onic. Muybajanic no'ox yu'un toj lec li c'usi chc'ot avich'ic li te ta vinajele. Jech ono'ox la spasic e'uc li smoltotic ta vo'onee, ep laj yilbajinic li buch'utic iyalic sc'op Dios ta vo'onee.

<sup>24</sup>Yan li jo'oxuc ti jc'ulejoxuque, chavich'ic vocal ta ts'acal. Yu'un oy

avu'unic li c'ustic chac'anic li avie, ja' yu'un mu xa c'usi chanopic.

<sup>25</sup>Jo'oxuc ti noj ach'utic li avie, chavich'ic vocal ta ts'acal yu'un mu c'usi cha'ac'batic yu'un li Diose.

'Jo'oxuc ti xamuybajic no'ox li avie, chavich'ic vocal yu'un chavat avo'onic cha'oq'uic ta ts'acal.

<sup>26</sup>Jo'oxuc ti lec chayiloxuc scotol li crixchanoetic li avie, chavich'ic vocal ta ts'acal. Yu'un ja' jechoxuc jech chac c'u cha'al li buch'utic la sp'is sbaic ta yalel li sc'op Dios ta vo'onee ti lec i'ileic yu'un scotol li crixchanoetique.

**Ja' sc'oplal ti sc'an ta jc'uxubintic li buch'utic chiscontrainutique**

(Mt. 5.38–48; 7.12)

<sup>27</sup>Jo'oxuc ti chava'ibecun jc'op li avie jech chacalbeic: C'uxubino la avajcontraique. Mi chayiltaoxuque, ac'beic yil li slequil avo'onic. <sup>28</sup>Mi chopol chasc'oponoxuque, lec me xac'oponic. Mi chayilbajinoxuque, c'oponbeic Dios yu'un mu sna!. <sup>29</sup>Mi chasmajbeic jot xocon asatique, ac'o smajboxuc scha'jotol. Mi chaspojboxuc apuychijique, ac'o yich!. Ac'o yich' batel ac'u'ic nojtoc. <sup>30</sup>Mi chasc'anboxuc li c'usi oy avu'unique, ac'beic. Mi chaspojboxuc li c'ustic oy avu'unique, mu me xba ac'anbeic sutel. <sup>31</sup>Mi chac'an ti lec li c'usi chaspasbeic li crixchanoetique, ja' sc'an ti ja' no'ox jechoxuc e'uhe.

<sup>32</sup>Mi ja' no'ox oy ta avo'onic li buch'utic lec xavil aba achi'uunque, mu xvinaj o mi más lec la avo'onic. Yu'un ja' no'ox jechoxuc jech chac c'u cha'al li

buch'utic chopol scuxleje. <sup>33</sup>Mi ja' no'ox chac'uxubinic li buch'utic lec xavil aba achi'uquique, mu xvinaj o mi más lec la avo'onique. Yu'un ja' no'ox jechoxuc jech chac c'u cha'al li buch'utic chopol scuxleje. <sup>34</sup>Mi ja' no'ox chavac'be sq'uex ataq'uinic li buch'u sna' sutesele, mu xvinaj o mi más lec la avo'onique. Yu'un ja' no'ox jechoxuc jech chac c'u cha'al li buch'utic chopol yo'one. Yu'un ja' no'ox chac'be sq'uex staq'uinic li buch'u sna' sutesele. <sup>35</sup>Li jo'oxuque sc'an chac'uxubinic li buch'u chascontrainoxuque. Sc'an ti lec chavil scotol li crixchanoetique. Ac'o ta q'uxel li c'usi ta sc'anique ac'o mi mu sutes. Ja' más chataic o ti lequilal ta vinajele. Ja' chavaq'uic o ta ilel ti jo'oxuc snich'naboxic li Diose. Yu'un li Diose ta sc'uxubin e'uc li buch'utic chopol yo'onique ti mu sna' xalbeic coliyal Dios ti jech ic'uxubinatique. <sup>36</sup>Ja' lec c'uxubinvananic jech chac c'u cha'al ta xc'uxubinvan li Jtotic Dios ta vinajele.

**Ja' sc'oplal ti sc'an ti mu me jsa'betic  
smul li jchi'iltique**

(Mt. 7.1–5)

<sup>37</sup>'Mu me chopluc xavil achi'ilic yo' jech mu xc'ot avich'ic ich'beel ac'opic yu'un li Diose. Mu me xasa'beic smul achi'ilic yo' jech mu xa'albat amulic e'uc yu'un li Diose. Pasbeic perton yo' jech chaspasboxuc perton e'uc li Diose. <sup>38</sup>Ac'beic smoton achi'ilic yo' jech chayac'boxuc amotonic e'uc li Diose. Más to ep cha'ac'batic li jo'oxuque. Ja' jech chac c'u cha'al li buch'utic ti lec ts'acal ta xac' li

c'usi ta xaq'ue, ti lec ta snojese, ti ta xtanij xa loq'uel ta sti'e, ja' jech chavich'ic e'uc li jo'oxuque. Mi ep chavaq'uique, ja' no'ox jech ep cha'ac'batic e'uc. Mi jutuc no'ox chavaq'uique, ja' no'ox jech jutuc no'ox chayac'beic e'uc li Diose —xi li Jesuse.

<sup>39</sup>Li Jesuse jech laj yal ta lo'il:  
—Li buch'u ma'sate ñmi xu' ta xac'be yil be li schi'il ta ma'satile?  
¿Mi mu co'oluc ta sts'ujic yalel ta lom ch'en? <sup>40</sup>Li jchanjune muc bu co'olic schi'uc li yajchanubtasvaneje yu'un ja' to tschan. Mi ischan xa scotol li c'u sba ichanubtasat yu'un li yajchanubtasvaneje, co'olic xa. Ja' yu'un li jo'oxuque sc'an chat'ujic lec li buch'u chaschanubtasoxuque.

<sup>41</sup>'Li jo'oxuque ac'o mi jutuc no'ox ti c'usi chopol ta spas la achi'ilique, pero ja' te batem o asatic. Pero mu xava'i abaic ti más to toj chopol li c'usi chapasic li jo'oxuque. <sup>42</sup>Jech chavalbe la achi'ilique: "Mu me xapas jech", xavutic. Pero ñc'u sba chap'ijubasic la achi'ilic mi jo'oxuc más to toj chopol li c'ustic chapasique? Ap'isoj sbaic ti mu c'usi palta avu'unique. Ja' sc'an ti ba'i chavictaic spasel li c'ustic chopole, ts'acal to xu' chap'ijubasic la achi'ilique.

**Ja' sc'oplal ti laj yal Jesús li c'u  
sba ta xcojtaquintic o li buch'utic  
jlo'lovanejetique**

(Mt. 7.17–20; 12.33–35)

<sup>43</sup>'Li te'li bu lec ono'oxe, lec li sat ta xaq'ue. Li te'li bu chopol ono'oxe, ja' no'ox jech chopol li sat ta xaq'ue. Mu xu' ta scap sbaic li bu leque schi'uc li bu chopole. <sup>44</sup>Ti c'u sba sat li te'ja' ta

xquiltic o mi lec, mi chopol. Jech chac c'u cha'al muc bu chataic sat higo ta jtec' ch'ix, schi'uc muc bu chataic sat ts'usub ta ch'ix, ja' jechic li buch'utic sp'isoj sbaic ti ta xalic li sc'op Diose, mu c'usi lec chataic o yu'unic. <sup>45</sup> Li buch'u lec yo'one lec li c'u sba ta xc'opoje, yu'un lec li c'usi snopoje. Li buch'u chopol yo'one chopol li c'u sba ta xc'opoje, yu'un chopol li c'usi snopoje. Yu'un li c'u sba chal ta avo'onique ja' jech chloc' ta aveic.

**Ja' svinajeb ti la sva'an snaic ya'el  
cha'vo' viniquetique**

(Mt. 7.24-27)

<sup>46</sup> Li jo'oxuque altic ti "Cajval, Cajval" xavuticune, yu'un mu xapasic li c'ustic chacalbeique. <sup>47</sup> Li buch'u chiya'ibe li c'usi ta xcale, mi ta sch'une, chacalbeic c'u sba. <sup>48</sup> Ja' jech chac c'u cha'al jun vinic li la sva'an sna ta ba tone. La sjom yael nat li balumile ja' to ti ista li tone. Ja' te la sliquesbe muyel li yoc li nae. C'alal ital tsots jo'e, inoj tajmec li uc'ume, imal loq'uel ta sti', ic'ot ta spat xocon li snae. Pero muc bu xjin li snae yu'un ta ba ton sva'anoj. <sup>49</sup> Li buch'u chiya'ibe li c'usi ta xcale, mi mu sch'une, ja' jech chac c'u cha'al jun vinic li la sva'an sna ti naca noj te juchul ta sba balumile. C'alal ital tsots jo'e, inoj tajmec li uc'ume, imal loq'uel ta sti', ic'ot ta spat xocon li snae. Toj jinel no'ox li snae — xi li Jesuse.

**Ja' sc'oplal ti la scoltabe schamel  
li yajtunel jun banquilal soltaroe li**

**Jesuse**

(Mt. 8.5-13)

**7** C'alal ilaj yo'on ta schanubtasel li crixchanoetic

li te ta yoc vits li Jesuse,  
ibat ta jteclum Capernaum.

<sup>2</sup> Oy jun jyanlum vinic te nacal ta Capernaum, ja' banquilal soltaroe. Ja' te liquem talel li ta muc'ta jteclum Romae. Oy jun yajtunel toj lec c'ux ta yo'on. Itsaque ta chamel li yajtunele, ta xa'ox xham. <sup>3</sup> C'alal iya'ibe sc'oplal Jesúis li banquilal soltaroe, la stac batel jayvo' banquilaetic yu'un li j'israeletic li te ta Capernaume, ba yalbeic Jesúis mi x'abolaj chba coltabatuc li yajtunele. <sup>4</sup> Li banquilaletique ibatic li yo' bu oy li Jesuse, jech c'ot yalbeic:

—Abolajan c'uxubinbun li banquilal soltaroe. <sup>5</sup> Yu'un c'uxutic ta yo'on jcotoltic, jo'otic li j'israelutique. Ja' la stoj scotol li sva'anobil li jch'ulnacutic li li' ta jteclume —xutic c'otel li Jesuse.

<sup>6</sup> Li Jesuse la schi'in batel li banquilaetic yu'unic li j'israeletique. C'alal jutuc xa'ox sc'an xc'otic ta sna li banquilal soltaroe, li banquilal soltaroe la stac talel jayvo' li buch'utic lec sc'opon sba schi'uque yu'un tal spajesic li Jesuse. Jech laj yalbeic:

—Tata, mu la xba avac' avocol yu'un jech laj yalbuncutic talel li banquilal soltaroe: "Li jo'one mu tsotsuc cabtel ti ja' chisch'unbe ta jmantal ti ja' chtal ta jnae. <sup>7</sup> Ja' yu'un muc bu x'a jc'opon jtuc. Xu' ja' no'ox ac'o yal talel jp'eluc ti ac'o coluc li cajtunele. <sup>8</sup> Li jo'one ta mantal noj oyun ti ta jpas ta mantal li soltaroe. Batan, mi xcut li june, ta xbat. La' li'i, mi xcut li yane, ta xtal. Paso jech, mi xcut li cajtunele, ta spas", xijyutcutic talel —xutic c'otel li Jesuse.

**9** C'alal iya'i li Jesuse, xmuyabaj o. Ijoyp'ij, jech laj yalbe li crixchanoetic li te tijilic talel ta spate:

—Ta melel muc to bu jech jtaoj junuc jchi'iltic ta israelal ti jech ta sch'un jech chac c'u cha'al li banquilar soltaroe —xi.

**10** Li buch'utic itaqueic talel yu'un li banquilar soltaroe isutic batel. C'alal ic'otique, colem xa'ox c'ot staic li yajtunel li banquilar soltaroe.

**Ja' sc'opla** **ti la scha'cuxesbe**  
**yol jun me'anal ants li te ta**  
**jteclum Naín li Jesuse**

**11** Li Jesuse ts'acal to ibat schi'uc li yajchanbalajeltac ta jteclum Naín. Ep crixchanoetic ibatic nojtoc. **12** C'alal nopolic xa'ox batel ta ti' jteclume, iyil Jesúus ti oy buch'utic stelojic talel jun ánima yu'un chba smuquic. Ja' squerem jun me'anal ants. C'ajomal jun li yole. Ep buch'utic schi'uc batel li antse, ja'ic li buch'utic te nacalic ta jteclume. **13** C'alal iyil li ants li Cajvaltique, toj abol sba iyil, iyich' ta c'ux. Xi laj yalbe:

—Mu xa'oc! —xut.

**14** Inopojo li Jesuse, la spicbe stenelte'al li ánimaes. Li buch'utic stelojic batele iva'iic. Li Jesuse jech laj yalbe li ánimaes:

—Querem, jo'on chacalbe, lican —xut.

**15** Ichoti ta ora li quereme, lic lo'ilajuc. Li Jesuse jech laj yalbe li antse:

—Ic'o batel la avole —xut.

**16** Scotol li buch'utic te xbatique toj labal iya'iic. Laj yalbeic coliyal Dios. Oy jech laj yalic:

—Toj tsots yabtel yich'oj li jchi'iltique. Ja' jun banquilar yu'unic li buch'utic ta xalic sc'op Dios li' talem ta jtojoltique —xiic.

Oy yan jech laj yalic:

—Ja' tacbil talel yu'un Dios yo' chiscoltautic, jo'otic ti t'ujbilutic ono'ox yu'une —xiic.

**17** Ipuc batel sc'opla Jesús ta sp'ejel Judea balumil schi'uc ta yan o balumil ti sts'aquinoj sbaic schi'uc li Judea balumile.

**Ja' sc'opla** **ti tal sc'oponic** Jesús li yajchanbalajeltac li Juan li iyac' ta ich'el jo'e  
*(Mt. 11.2-19)*

**18** Li Juan li iyac' ta ich'el jo'e, i'labat yu'un li yajchanbalajeltac li c'ustic ta spas li Jesúus. **19** C'alal iya'i li Juane, laj yic' talel cha'vo' yajchanbalajeltac. Jech laj yalbe:

—Ba jac'beic Jesús mi ta melel ja' t'ujbil yu'un Dios ti chisventainutic ti sc'opla chtale, mi ta to jmalatic yan —xut batel.

**20** C'alal ic'otic li bu oy li Jesuse, jech laj yalbeic:

—La stacuncutic talel li Juan li iyac' ta ich'el jo'e. Chajac'becutic mi jo'ot li buch'u t'ujbil yu'un Dios ti sc'opla ono'ox chtal sventainuncutique, mi ta to jmalatic yan —xutic c'otel.

**21** Li Jesuse ja' o yacal ta scoltaanbe schamel ep jchamelajeletic li c'alal ic'otique. Ta scolta li buch'utic ch'iem chin ta sbec'talique, ta sloq'uesbe pucujetic ta yo'onic li buch'utic ochem pucuj ta yo'onique, ta sjambe sat li buch'utic ma'satetique. **22** Itac'av li Jesuse:

—Ba albeic Juan scotol li c'ustic avilic ti yacun spasele schi'uc li c'ustic ava'lic ti laj cale. “Li ma'satetic to'oxe xilic xa osil. Li coxoetic to'oxe lec xa chanavic. Icolic xa li buch'utic tsacbilic to'ox ta c'a'el chamele. Ijam xa schiquinic li buch'utic macal to'ox schiquinique. Li buch'utic telelic xa'oxe icha'cuxiic xa cu'un. Li me'onetique i'albatic xa ya'iic ti ta xc'uxubinatic yu'un li Diose. <sup>23</sup>Mu me xhibaj yo'on ta jtojol li Juane, ac'o muyabajuc no'ox, xijyutcutic talel li Jesuse”, utic c'otel li Juane —x'utatic yu'un li Jesuse.

<sup>24</sup>C'alal isutic batel li cha'vo'ic ti itaqueic talel yu'un li Juane, li Jesuse lic yalbe li epal crixchanoetic li c'u sba sc'opla li Juane. Jech laj yal:

—Li buch'u a aq'uelic li te ta taqui jamaltique, xana'ic xa ono'ox ti ta yav oy li c'u sba ichanubtasvane, ti ma'uc jech chac c'u cha'al jtec' aj ti chbat ta jujot ta iq'ue. <sup>25</sup>Avilic ti mu'yuc lec sc'u'e. Yu'un li buch'utic ti toj lec sc'u'ique, ja' li buch'utic te oyic ta sna ajvaliletique. <sup>26</sup>C'alal a aq'uelique, xana'ic xa ono'ox ti ja' li buch'u laj yal li sc'op Diose. Melel chacalbeic, li Juan li a aq'uelique, ja' más banquilar yu'unic li buch'utic iyalic sc'op Dios ta vo'onee. <sup>27</sup>Li Juane ja' ono'ox ti ts'ibabil sc'opla ta sc'op Dios ti ba'i ta xtal cu'une. Jech ts'ibabil:

Ba'i ta jtac batel li cajtacbalale.  
Ja' ta xalbe crixchanoetic ti  
chabate yo' jech chayich'ic ta  
muc',

xiyut li Jtote, xi ono'ox ts'ibabil.

<sup>28</sup>Chacalbeic, ta scotol li

crixchanoetique muc buch'u jech yich'oj tsots yabtel jech chac c'u cha'al yich'oj li Juan li chac' ta ich'el jo'e. Pero li buch'u ta xac' sba ta sc'ob li Diose, ac'o mi muc bu yich'oj tsots yabtel, ja' más ta x'ac'bat yil li c'u sba sju'el li Diose. Li Juane ja' jutuc no'ox iyil.

<sup>29</sup>Li buch'utic iya'iic li c'usi laj yal li Juane schi'uc li jtsobpatanetic nojtoque, laj yich'ic jo' yu'un li Juane. Jech laj yalic: “Ta melel lec li c'usi ta xal li Diose ti sc'an ti ac'o quictatic li c'ustic chopol ta jpastique, ti ac'o quich'tic jo'e yo' jech chispasbutic perton”, xiic.

<sup>30</sup>Yan li buch'utic sp'isoj sbaic ta jchanubtasvanej ta smantaltac li Diose schi'uc li jfariseoetic ti muc bu ac'bilib yich'ic jo' yu'un li Juane, muc bu xaq'uc ta venta ti jech ta sc'an li Diose.

<sup>31</sup>'Chacalbeic li c'u sba atalelic li li' oyoxuc ta balumile. <sup>32</sup>Ja' jechoxuc jech chac c'u cha'al li unetic ti te chotolic ta xtajinic ta ch'ivite, jech chalanbeic li schi'ilique: “La jupancutic amay sventa nupunel pero muc bu xa'ac'otajic. C'alal xijuetcutic ta oq'uel ta scoj ti oy buch'u icham cu'uncutique, muc bu xa'oq'uc nojtoc. Mu c'usi xac'anic”, xut li schi'iltac ta tajimole. <sup>33</sup>Yu'un c'alal ital li Juan li iyac' ta ich'el jo'e, muc bu xaschi'inic ta ve'el. Ja' jech sba la avalic: “Ochem pucuj ta yo'on”, xachiic. <sup>34</sup>C'alal lital, jo'on li co'ol crixchanoutique, la jchi'innoxuc ta ve'el. Pero ja' jech sba la avalic nojtoc: “Q'uelavil toj ech'em xve', toj ech'em xuch' ya'l el ts'usub. Lec xil sbaic nojtoc schi'uc li buch'utic

chopol c'ustic tspasic jech chac c'u cha'al li jtsobpatanetique schi'uc li yan jpasmuliletique", xachiic. <sup>35</sup>Ti ac'biluc ap'ijilic yu'un li Diose, la avich'icuncutic ta muc' schi'uc li Juan ti jechuque. Ja' xana'ic o ti ac'bil jp'ijilcutic yu'un Dios ti la jpascutic li c'ustic la jpascutique —xi li Jesuse.

**Ja' sc'oplal ti i'och Jesús ta sna jun fariseoal vinic, Simón sbi**

<sup>36</sup>Li Jesuse i'iq'ue ta ve'el yu'un jun vinic li ochem ta fariseoale. Li Jesuse ibat ta sna li vinique, ba ve'uc. Li schotlebique jech chac c'u cha'al tem. Ja' te ta spatan sbaic li c'alal ta xve'ic ta mexae. Li Jesuse te ba spatan sba. <sup>37</sup>Ja' o te yac ta ve'el ta mexa li Jesuse ital jun jmivilajel ants, yu'un iyal'i ti te ta xve' ta sna li jfariseo li Jesuse. Yich'oj talel slimeta ti noj ta muil vomole. <sup>38</sup>Li antse te ival'i ta nopol yoc Jesús. Lic yoq'uita sba. La spocbe yoc Jesús ta ya'llel sat. C'alal la spoque, la scusbe ta stsotsil sjol. La sts'uts'unbe yoc. La smalbe ta yoc nojtoc li sbel li limetae yu'un ta xich' ta muc' li Jesuse. <sup>39</sup>C'alal iyil li jfariseoe, ja' li buch'u laj yic' ta ve'el li Jesuse, jech iyal ta yo'on: "Ti ja'uc li buch'u ta xal sc'op Dios li vinic li'i, sna' ti ja' jmivilajel li ants ti jechuque", xi. <sup>40</sup>Li Jesuse jech laj yalbe li jfariseoe:

—Simón, oy c'usi chacalbe —xut.

<sup>41</sup>Li Jesuse jech laj yal:

—Oy jun vinic iq'uxebat staq'uin yu'un cha'vo' viniquetic. Li june jo'ob ciento la sq'uxex. Li june lajuneb yoxvinic (50) la sq'uxex. <sup>42</sup>Pero mu sut yu'unic li sq'uxex,

ja' yu'un li yajval taq'uine la sch'ay ta yo'on li staq'uine, la sch'aybe yilic scha'va'alic. Li jo'ote c'c'usi chanop? Li cha'vo' vinic ti ich'aybat li yilique, c'mi co'ol c'ux ta yo'onic li yajval taq'uine, mi oy buch'u ti más c'ux ta yo'one? —xi li Jesuse.

<sup>43</sup>Itac'av li Simone:

—Ja' nan más c'ux ta yo'on li buch'u más ep yil ti ich'aybate —xi.

Jech i'albat yu'un li Jesuse:

—Ja' melel li c'usi chavale —xut.

<sup>44</sup>Li Jesuse la sq'uelbe sat li antse, jech laj yalbe li Simone:

—Q'uelavil li ants li'i. C'alal li'och ta anae, muc buch'u la spocbun coc. Li ants li'i lispocbe coc ta ya'llel sat. Liscusbe ta stsotsil sjol nojtoc. <sup>45</sup>Li jo'ote muc bu xats'uts'unun li c'alal ijule. Li ants li'i jul sts'uts'unbun coc li c'alal ijule. Chavil ti yacal to chispasbune. <sup>46</sup>Li jo'ote muc bu xamalbun asete ta jol. Li ants li'i lismalbe muil vomol ta coc.

<sup>47</sup>Chacalbe, ac'o mi ep smul li antse, li avie pasbil xa perton yu'un smul yu'un toj c'uxun ta yo'on. Li buch'u ta snap ti muc bu ep smul la jpasbe pertone, ja' jutuc no'ox c'uxun ta yo'on —x'utat yu'un li Jesuse li Simone.

<sup>48</sup>Li Jesuse jech laj yalbe li antse:

—Pasbilot xa perton yu'un scotol amul —xi li Jesuse.

<sup>49</sup>Li buch'utic li te co'ol oyic ta mexa schi'uc li Jesuse, jech laj yalbe sbaic:

—¿Bu ilic talel li vinic ti c'alal ta smul crixchanoetic xu' ta spasbe perton ti yaloje? —xut sbaic.

<sup>50</sup>Li Jesuse jech laj yalbe li antse:

—Lapasbat xa perton yu'un amul yu'un ta sloq'uel avo'on avich'un ta

muc!. Jech junuc xa avo'on batan —xut.

**Ja' sc'opla ti oy jayvo' antsetic  
ti la smac'lanic Jesús schi'uc  
li yajchanbalajeltaque**

**8** Ts'acal to ixanav batel ta scotol jteclumetic schi'uc coloniaetic li Jesuse. Laj yal batel li lequil ach' c'ope, ja' ti ista xa sc'ac'alil ta xventainatic yu'un li Diose. Te schi'uc batel li lajchavo' yajchanbalajeltaque. **2**Oy jayvo' antsetic nojtoc la schi'inic li Jesuse, ja' li iloq'uesbat pucuj ta yo'onic yu'un li Jesuse schi'uc li icoltaatic ta schamelique. Te schi'uquic jun ants, María sbi, ja' li te liquem talel ta jteclum Magdalae. Ja' li iloq'uesbat jucub pucuj ta yo'on yu'un li Jesuse. **3**Te oy e'uc li Juanae, ja' yajnil jun vinic Chuza sbi. Li Chuzae ja' yich'ojbe ta venta sna li ajvalil Herodese. Te oy e'uc li Susanae schi'uc oy ep yan antsetic li la smac'lanic Jesús schi'uc li yajchanbalajeltaque. Pero stuquic la sloq'uesic li ve'lil li antsetique.

**Ja' lo'il sventa jvajtrigo**

(Mt. 13.1-9; Mr. 4.1-9)

**4**C'alal la stsob sbaic ta stojol Jesús ep tajmec crixchanoetic li liquemic talel ta jujun jteclume, li Jesuse oy c'usi laj yal ta lo'il. Jech laj yal:

**5**—Oy jun vinic iloc' batel ta vajtrigo. C'alal la svaj li strigoe, oy jayp'ej ic'ot ta be. Te la spech'ulanic ta teq'uel li crixchanoetique. Ital mutetic, la stam sbic'anic. **6**Oy jayp'ej ic'ot ta tontic. C'alal ich'i jutuque, itaquij ta ora yu'un mu'yuc

lec slumal. **7**Oy jayp'ej ic'ot ta yolon ch'ixtic. C'alal ich'i li ch'ixe, inet'e comel, ja' ic'oxib o. **8**Oy jayp'ej ic'ot ta lequil balumil. Lec ich'i, lec isatin. Laj yac! jo'vinic (100) ta p'ej li jup'ej bec' trigoe —xi li Jesuse.

C'alal laj yal jech li Jesuse, tsots lic c'opojuç. Jech laj yal:

—Li jo'oxuc ti ava'iic li c'usi laj cale, nopbeic lec smelol —x'utatic yu'un li Jesuse.

**Ja' sc'opla ti c'u cha'al ta lo'il no'ox  
laj yalanbe li crixchanoetic li Jesuse**

(Mt. 13.10-17; Mr. 4.10-12)

**9**Li Jesuse ijac'bat yu'un li yajchanbalajeltaque:

—¿C'usi smelol li lo'il la avalbuncutique? —xutic.

**10**Jech itac'av li Jesuse:

—Li jo'oxuque ac'biloxuc analic li c'u sba ta sventainan crixchanoetic li Diose, pero li yanetique ta lo'il no'ox chcalbeic. Yu'un altic no'ox ti iyilic xa ti scotol xu' cu'une, yu'un muc xac' ta yo'onic. Altic ti iya'iic xa li c'usi laj cale, muc xa'ibeic smelol yu'un mu ono'ox sc'an xa'iic.

**Ja' sc'opla ti i'albatic smelol li lo'il  
sventa li jvajtrigoe**

(Mt. 13.18-23; Mr. 4.13-20)

**11**'A'ibeic me smelol li lo'il li laj calboxuque. Li sat trigoe ja' senyail li sc'op Diose. **12**Li bec' trigo li ic'ot ta bee, ja' senyail li buch'utic li c'alal ta xa'iic li sc'op Diose, mu xaq'usic ta venta. Ta xtal ta ora li pucuje, chtal ch'aybatuc ta sjolic ta ora li sc'op Dios li iya'iique yo' jech mu sch'unic, jech mu xcolic o. **13**Li bec' trigo li ic'ot ta tontique, ja' senyail li buch'utic li c'alal ta xa'iic li sc'op Diose, ta

ora no'ox ta sch'unic, xmuyabajic no'ox. Pero mu ta sloq'ueluc yo'onic la sch'unic jech mu'yuc stsatsal yo'onic o. C'alal chich'ic vocol c'alal sch'unojique, ta xchibaj yo'onic ta ora. <sup>14</sup>Li bec' trigo li ic'ot ta yolon ch'ixtique, ja' senyail li buch'utic ja' no'ox batem ta yo'onic li c'ustic oy li ta balumile. Ja' te lo'lobilic o yu'un li c'ustic ta sc'anique. Te net'bil icom o ya'el li sc'op Dios li laj ya'lique, jech muc sch'unic o. <sup>15</sup>Li bec' trigo li ic'ot ta lequil balumile, ti iyac' jo'vinic ta p'ej sbeq'ue, ja' senyail li buch'utic ta xac' ta yo'onic li sc'op Diose. Ta satin ta yo'onic ya'el li sc'op Diose. Ac'o mi ta xich'ic vocol, mu xchibaj o yo'onic.

**Ja' sc'oplal ti ta sc'an li Cajvaltic ti  
jamal ta xcaltic ba li sc'ope**  
(Mr. 4.21-25)

<sup>16</sup>'Mi ta jtsan jcantiltique, muc bu ta njujmaquitic, mu jmuctic ta yolon tem nojtoc. Ta jcxantic ta scuxanobil ja' chilic o lec osil scotol li buch'utic ta x'ochic talel ta yut jnatique. <sup>17</sup>Ja' no'ox jech persa ono'ox ta xvinaj li c'ustic laj calboxuque. Ja' avabtelic ti jamal chavalic batele.

<sup>18</sup>'Ja' yu'un a'ibeic lec smelol li c'ustic chacalbeique. Li buch'utic jutuc to sch'unojique, más to chcoltaatic yu'un Dios ti ac'o sch'unic leque, yu'un chac' ta yo'onic. Li buch'utic mu sc'an sch'unique, li c'u yepal sna'ique ta xpojbatic ta j'ech'el —xi li Jesuse.

**Ja' sc'oplal ti chac c'oponatuc yu'un  
sme' li Jesuse schi'uc li schi'iltac ta  
voq'uel li Jesuse**

(Mt. 12.46-50; Mr. 3.31-35)

<sup>19</sup>Te ic'otic li sme' li Jesuse schi'uc li yits'inab li Jesuse. Pero

muc bu staic ta c'oponel li Jesuse yu'un te tsinil epal crixchano ta yut na, ja' yu'un mu xu' x'ochic li yo' bu oy li Jesuse. <sup>20</sup>Oy buch'u tal albatuc ta ora li Jesuse:

—Te oyic ta amac' ame' schi'uc la avits'inabe yu'un chac sc'oponicot —xi.

<sup>21</sup>Itac'av li Jesuse:

—Melel ja' jme', ja' quits'inab li te oyique. Pero li buch'utic cha'iic schi'uc ti ta spasic li c'usi ta xal li Diose, ja' co'ol schi'uc jme' ya'el. Ja' co'ol schi'uc jchi'iltac ta voq'uel ya'el —xi li Jesuse.

**Ja' sc'oplal ti ipaj yu'un ic' schi'uc  
nab li Jesuse**

(Mt. 8.23-27; Mr. 4.35-41)

<sup>22</sup>Ta yan o c'ac'al i'ochic ta canava schi'uc li yajchanbalajeltac li Jesuse. Jech laj yalbe:

—Batic ta jot nab —xut.

Ibatis. <sup>23</sup>C'alal ja' o chanav batel ta ba nab li canavae, ivay li Jesuse. Ja' o ital tsots ic'. Tsots la syuq'uilan li nabe. I'och ep jo' ta yut li canavae, yu'un xa'ox ta xmuquij yalel ta yut nab. <sup>24</sup>Li Jesuse itije yu'un li yajchanbalajeltaque. Jech laj yalbeic:

—Jchanubtasvanej, ta xa xijmuquij yalel ta yut nab —xic.

Ilic li Jesuse, la spajes li iq'ue schi'uc li nabe, jliquel ich'ab ta ora. <sup>25</sup>Li Jesuse jech laj yalbe li yajchanbalajeltaque:

—Muc to bu ach'unojic lec —xut.

Toj ch'ayel no'ox yo'onic, ixil'ic.

Jech laj yalbe sbaic:

—¿C'u nan cha'al li vinic li'i?

Yu'un c'alal ta ic', c'alal ta nab chpaj yu'un —xut sbaic.

**Ja' sc'oplad ti iloq'uesbat pucujetic ta yo'on jun jgadáral vinique**  
(Mt. 8.28–34; Mr. 5.1–20)

**26** Ic'otic ta jot nab ta yosilalic li jgadáraetique, te iloq'uic ta canava schi'uc yajchanbalajeltac li Jesuse. Li Galileae ta jot nab icom yu'unic. **27** C'alal lic xanavuc batel li Jesuse, tal nupatuc ta be ta ora yu'un jun jgadáral vinic. Vo'one xa'ox ochem pucujetic ta yo'on. Mu'yuc xa sc'u', mu'yuc xa sna. Ja' xa snainoj li jombil ch'enetic li bu chmuqueic li ánimaetique. **28** Li vinique, c'alal iyil li Jesuse, tal spatan sba ta balumil ta stojol. Tsots ic'opojoj li pucujetic li ochem ta yo'one, jech laj yalic:

—Jesús, jo'ot Snich'onot Dios ta vinajel, ¿c'u cha'al tal atic' aba ta jtojolcutic? Avocoluc mu me xavac'buncutic quich'cutic vocal —xiic.

**29** Ti jech iyalic li pucujetic, yu'un albatemic xa yu'un Jesúis ti ac'o loq'uicuc ta yo'on li vinique. Yu'un ep xa ta velta jech laj yilbajinic li vinic li pucujetic. Li crizchanoetique la schucbeic ta carena taq'uin li yoc sc'obe yo' jech mu xmajvan o, pero ta xtuch' yu'un. Ta x'iq'ue batel ta taqui jamaltic yu'un li pucujetic. **30** Li Jesuse jech la sjac'be li vinique:

—¿C'usi abi? —xut.

Itac'av:

—Legionuncutic, yu'un ep ta mil li' ochemuncutique —xiic li pucujetic.

**31** Li pucujetic ta sloq'uel yo'onic laj yalbeic Jesúis ti mu me xtaqueic sutel ta xab li bu ono'ox

oyique. **32** Oy ep chitometric te ta xve'ic ta ch'ut vits. Li pucujetique laj yalbeic Jesúis ti ja' te ac'o ba ochicuc li ta chitometric. Li Jesuse laj yal ti ac'o baticuque.

**33** Li pucujetique iloq'uic batel ta yo'on li vinique, te ba ochicuc li ta chitometric. Li chitometric iloq'uic ta anil scotol, iyalic ta yalebaltic. Its'ujic ochel ta nab, te ijic'av scotolic.

**34** Li jchabiechchitometric, c'alal iyilic li c'usi ispas li chitometric, ixi'ic. Ibatic ta anil ta jteclum schi'uc ibatic ta coloniaetic, ba yalic ti icham scotol li chitometric schi'uc ti icol xa ta schamel li vinic li ochem to'ox pucujetic ta yo'one.

**35** Li jgadáral crizchanoetique tal sq'uelic ta ora li c'usi ic'ot ta pasale. C'alal ic'otic li yo' bu oy li Jesuse, te istaic li schi'ilique, ja' li iloc' ep pucujetic ta yo'one. Te xa chotol ta nopol yoc li Jesuse, slapoj xa sc'u', meltsajem xa, tuq'uibem xa. Pero li crizchanoetique ixi'ic o. **36** Li buch'utic iyilic li c'u sba icol li vinic ti ochem to'ox pucujetic ta yo'one, laj yalbeic li buch'utic te ic'otique.

**37** Scotol li jgadáral crizchanoetique laj yalbeic Jesúis ti ac'o loc'uc ba te ta yosilalique, yu'un ixi'ic tajmec. Ja' yu'un i'och ta canava schi'uc li yajchanbalajeltac li Jesuse, isutic batel ta jot nab. **38** Li vinic li iloc' ep pucujetic ta yo'one laj yalbe li Jesuse:

—Chajchi'in batel —xi.

Li Jesuse laj yalbe ti ac'o comunque. Jech laj yalbe:

**39** —Batan ta ana, ba albo achi'iltac ti laj xa scoltaot li Diose —x'utat yu'un li Jesuse.

Isut batel li vinique, ba yal ta scotol slumal ti icolataat yu'un li Jesuse.

**Ja' sc'oplad ti la scha'cuxesbe stseub Jairo li Jesuse schi'uc icol jun ants ti tal spicbe spuychij li Jesuse**  
(Mt. 9.18–26; Mr. 5.21–43)

**40** C'alal isut batel ta jot nab schi'uc li yajchanbalajeltac li Jesuse, oy ep j'israeletic te ta smalaic ta ti'nab. Xmuabajic xa scotolic li c'alal ic'ot li Jesuse. **41** Te ital ta stojol Jesús jun vinic, Jairo sbi. Ja' jmeltsanejc'op li ta sch'ulnaique. La spatan sba ta balumil ta stojol li Jesuse. Laj yalbe ti ac'o batuc ta snae. **42** Yu'un ta xham xa li stseube. C'ajomal jun li snich'one, lajchaeb to jabil yich'oj.

Li Jesuse ibat schi'uc li yajchanbalajeltaque. C'alal yacal ta xanbal batele, ep crixchanoetic ibatic e'uc. Snet'net' sbaic batel. **43** Te schi'uquic batel jun ants oy xa slajchaebal jabil ti mu xmac li schamele. Ilaj yo'on ta poxtael ta jpoxtavanejetic. Ilaj scotol li c'ustic oy yu'une pero muc bu xcol o. **44** Li antse inopojoj batel ta spat li Jesuse, la spicbe sti' spuychij, ja' icol o ta ora. **45** Li Jesuse jech laj yal:

—¿Buch'u lispicbe jpuychij? —xi.  
Itac'avic scotolic:

—Mu jna', muc bu la jpic apuychij —xiic scotolic.

Li Pedroe jech laj yal schi'uc laj yalic nojtoc li schi'iltaque:

—Jchanubtasvanej, toj snet'net' sbaic talel li crixchanoetic chavile. Ta xnet'vanic talel ta jujot. ¿C'u cha'al “buch'u lispicbe jpuychij” xachi? —xutic.

**46** Li Jesuse jech laj yal:  
—Oy buch'u lispicbe jpuychij yu'un ica'li ti oy buch'u icol ta ju'ele —xi.

**47** Li antse, c'alal iyil ti sna'oj Jesús li c'usi la spase, xt'elt'un xa ta xi'el tal spatan sba ta balumil ta stojol li Jesuse. Jamal laj yalbe ti c'u cha'al la spicbe li spuychije. Iya'iic scotol li crixchanoetic ti jech laj yal li antse:

—C'alal jech la jpase, licol o ta ora —xi.

**48** Li Jesuse jech laj yalbe:  
—Jnich'on, yu'un la ach'un ti oy ju'ele, ja' yu'un lacol. Junuc avo'on batan —xut.

**49** C'alal ja' o yacal ta lo'il li Jesuse, ital jun vinic. Ja' te ilic talel ta sna li Jairoe. Jech tal albatuc li Jairoe:

—Icham xa la atseube. Mu xa xavac'be svocol li jchanubtasvaneje —x'utat.

**50** C'alal iya'i li Jesuse, laj yalbe li Jairoe:

—Mu xavat avo'on. Ja' no'ox ch'uno ti xu' cu'un ta jcolta la atseube —xut.

**51** C'alal ic'ot ta sna Jairo li Jesuse, mu sc'an ti ep buch'u ta schi'in ochele. Laj yal ti ja' no'ox ta xic' ochel li Pedroe, schi'uc Jacobo, schi'uc Juan, schi'uc stot sme' li tseube. **52** Oy ep buch'utic te x'avetic ta oq'uel ta amac!. Li Jesuse jech laj yalbe:

—Mu xa'oq'uic. Muc bu chamem li tseube, yu'un no'ox chvay —xi.

**53** C'alal jech iya'iic li buch'utic te oyique, la stse'inic li Jesuse yu'un sna'ic ti chamem li tseube. **54** Li Jesuse i'och ta yut na, la stsacbe

sc'ob li á anima tseube, tsots la sc'opon, jech laj yalbe:

—Tseub, lican —xut.

**55** Icha'cuxi ta ora, itots li tseube.

Li Jesuse laj yal mantal ti ac'o yac'beic sve'ele. **56** Li stot sme' li tseube toj ch'ayel o yo'onic. Li Jesuse laj yalbe li stot sme' li tseube ti mu me buch'u xalbeic batel ti la scha'cuxesbe li stseubique.

**Ja' sc'oplal ti itaqueic batel ta yael sc'op Jesús li lajchavo' yajchanbalajeltaque**

(Mt. 10.5-15; Mr. 6.7-13)

**9** Li Jesuse la stsob li lajchavo' yajchanbalajeltaque. Laj yac'anbe stsatsal sju'elic ti ta sloq'uesanbeic pucujetic ta yo'onic li schi'iltaquique, schi'uc ta scoltaanic ta schamelic. **2** La stac batel yo' chba yalbeic schi'iltaquique ti ista xa sc'ac'alil ta xventainatic yu'un li Diose, schi'uc ac'o scoltaanic li buch'utic tsacbilic ta chamele. **3** Jech laj yalbe:

—Mu me xavich'ic batel li c'ustic chtun avu'unic ta sventa abeique. Mu me xavich'ic batel anamte'ic, schi'uc anuti'ic, schi'uc ave'elic, schi'uc ataq'uinic. Mu me xavich'ic batel cha'llic ac'u'ic. **4** Li bu junucal na cha'otesatique, te me oyanic o ja' to mi laloq'uic ta slumalic teye. **5** Li bu junucal jteclum ti mu xasc'anoxuque loc'anic batel. C'alal chaloq'uic batele, llinic comel spucual la avoquique. Ja' senyail ti ja' xa icom ta sba stuquic ti muc bu xich'ic ta muc' li jc'op li la avalique —xi li Jesuse.

**6** Iloq'uic batel li yajchanbalajeltaque li Jesuse. I'ech'ic ba ta jujun colonia.

Laj yalanbeic li schi'iltaquique ti ista xa sc'ac'alil ta xventainatic yu'un li Diose. Schi'uc la scoltaanic li buch'utic tsacbilic ta chamele.

**Ja' sc'oplal ti c'u sba imile li Juan li iyac' ta ich'el jo'e**

(Mt. 14.1-12; Mr. 6.14-29)

**7** Li ajvalil ta Galilea balumile, ja' li Herodese, iyal'i li c'ustic tspas li Jesuse. Iyal yo'on yu'un oy buch'u iyalic ti ja' icha'cuxi li Juan li iyac' ta ich'el jo'e. **8** Oy yan iyalic ti ja' li Elías ti iyal sc'op Dios ta vo'one ti sc'oplal ono'ox chtal nojtoque. Oy yan iyalic ti ja' icha'cuxi junuc li buch'utic iyalic sc'op Dios ta vo'onee. **9** Li Herodese jech laj yal: —Jo'on laj cac' ta tuch'beel sjol li Juane. ¿Buch'u nan taj nojtoc ti ta xca'ibe sc'oplal ti ep li c'ustic lec ta spase? —xi.

Ja' yu'un chac sq'uelbe sat ya'i li Herodese.

**Ja' sc'oplal ti la smac'lan jo'mil viniquetic li Jesuse**

(Mt. 14.13-21; Mr. 6.30-44; Jn. 6.1-14)

**10** C'alal isutic batel ta stojol Jesús li yajchanbalajeltaque, c'ot yalbeic scotol li c'ustic la spasique. Li Jesuse la svoc' sba batel ta taqui jamaltic schi'uc li yajchanbalajeltaque. Te ibatic ta nopol jteclum Betsáida.

**11** C'alal iya'iic li crixchanoetic li bu ibat li Jesuse, ba sa'ic. Li Jesuse lec iya'i li c'alal ic'otic li crixchanoetique. Laj yalbe ya'iic ti ista xa sc'ac'alil ta xventainatic yu'un li Diose. La scoltaan nojtoc li jchamelajeletique.

**12** C'alal mal xa'ox c'ac'ale, li lajchavo'ique jech laj yalbeic li Jesuse:

—Ja' lec tacano me batel li crixchanoetique, ac'o baticuc ta coloniaetic li li' no'ox nopole. Ac'o ba sch'amunic na, ac'o ba sman sve'elic yu'un taqui jamaltic li'i, mu c'usi x'ayan —xiic.

<sup>13</sup>Itac'av li Jesuse:

—Mac'lanic li jo'oxuque —xut.

Itac'avic li yajchanbalajeltaque:

—Mu c'usi oy cu'uncutic. Ja' no'ox jo'p'ej pan schi'uc cha'cot choy li' quich'ojcutique. ¿Mi chba jmanbecutic talel li sve'elique? —xiic.

<sup>14</sup>Li c'u yepal viniquetic te stsoboj sbaique oy nan jo'miluc. Ja' slecoj li antsetique schi'uc li unetique, muc bu atbil. Li Jesuse jech laj yalbe li yajchanbalajeltaque:

—Albeic li crixchanoetique ti ac'o stsob sbaic ta lajlajuneb yoxvinic (50) jutsobe, ac'o chotlicuc —xut.

<sup>15</sup>Laj yalic mantal li yajchanbalajeltaque. Lic stsob sbaic ta lajlajuneb yoxvinic li crixchanoetique, ichotiotic scotolic.

<sup>16</sup>Li Jesuse la stsac li jo'p'lej pane schi'uc li cha'cot choye. La sq'uel muyel ta vinajel, laj yalbe coliyal Dios. La xutilan li pane schi'uc li choye, laj yac'be li yajchanbalajeltaque. Li yajchanbalajeltaque la spucbeic li epal crixchanoetique. <sup>17</sup>Ive' scotolic, inojic o lec. La stsobic li scomenal li pane schi'uc li scomenal li choye, inoj lajchamoch.

**Ja' sc'opla ti jamal laj yal Pedro ti ja' t'ujbil yu'un Dios ti chventainvan li Jesuse**

(Mt. 16.13–19; Mr. 8.27–29)

<sup>18</sup>Ta yan o c'ac'al la svoc' sba loq'uel li ta crixchanoetic li Jesús

schi'uc li yajchanbalajeltaque yu'un ba sta ta na'el Dios stuc. C'alal ilaj yo'on ta stael ta na'el Dios li Jesuse, la sjac'be li yajchanbalajeltaque:

—¿C'usi la cabtel ta xalic li jchi'iltactique? —xut.

<sup>19</sup>Itac'avic:

—Oy buch'utic ta xalic ti jo'ot Juanot li iyac' ta ich'el jo' to'oxe. Oy yan ta xalic ti jo'ot jun li buch'utic iyalic sc'op Dios ta vo'onee ti yu'un nan icha'cuxie —xutic.

<sup>20</sup>Li Jesuse jech laj yal:

—Li jo'oxuque ¿c'usi cabtel ti avalojic e'uhe? —xut.

Itac'av li Pedroe:

—Jo'ot t'ujbilot yu'un Dios ti chaventainuncutique —xi.

**Ja' sc'opla ti laj yal li Jesús ti ta xmilee**

(Mt. 16.20–28; Mr. 8.30–9.1)

<sup>21</sup>Li Jesuse jech laj yalbe li yajchanbalajeltaque:

—Mu to me buch'u xavalbeic ti jo'on t'ujbilun yu'un Dios ti chaventainique —xi li Jesuse.

<sup>22</sup>Jech laj yalbe nojtoc li yajchanbalajeltaque:

—Jo'on li co'ol crixchanoutique jna'oj ti ta ono'ox xquich' ep vocole. Mu xisc'anic li j'abteletique, schi'uc li banquilal paleetique, schi'uc li buch'utic sp'isoj sbaic ta jchanubtasvanej ta smantaltac li Diose. Chiyaq'uic ta milel. Chimuque, pero ta yoxibal c'ac'al chicha'cuxi loq'uel ta jmuquenal —xi.

<sup>23</sup>Li Jesuse jech laj yalbe scotol li crixchanoetique:

—Li buch'u tscl'an chtal ta jtojole, mu me sc'uxubin sba. Scotol c'ac'al

ac'o cuchuc yu'un vocal jech chac c'u cha'al ta xcuch cu'une. <sup>24</sup>Li buch'u tsc'uxubin li scuxlejal li' ta balumile, ti mu sc'an xcham ta jventa jo'one, ja' ta xch'ay o sbatel osil. Yan li buch'u mu xich' ta c'ux li scuxlejal li' ta balumile, ti mu sventauc mi te ta xcham ta jventa jo'one, ja' ta xcuxi o sbatel osil.

<sup>25</sup>Ac'o mi oy buch'u ti chal ti tsbain scotol li c'ustic oy li' ta balumile, pero mu c'usi ta xtun o li sc'ulejal li c'alal ta xchame. Yu'un ma'uc ta sta o scuxlejal sbatel osil li sc'ulejale.

<sup>26</sup>Li buch'u ta xq'uxexav ta sch'unel li jc'op ta stojol li crizchanoetic li avie, ti mu junuc yo'on ta stojol li Diose, "ma'uc jnich'on", xichi li c'alal chtal ochcun ta ajvalilale, jo'on li co'l crizchanoutique. Schi'uc xa stsatsal sjuel li Jtot chitale, schi'uc chischi'inic talel li ángeletique. <sup>27</sup>Melel li c'usi chacalbeique, oy jayvo'oxuc li'i ti muc to bu chachamique ja' to mi avilic ti ta sventainan xa crizchanoetic li Diose —xi li Jesuse.

Ja' sc'oplal ti iyac' xojabal sat Jesús ta stojol li oxvo' yajchanbalajeltaque

(Mt. 17.1-8; Mr. 9.2-8)

<sup>28</sup>C'alal jech laj li Jesuse, ta svaxaqibal to c'ac'al ba sta ta na'el Dios ta jp'ej vits li Jesuse. Laj yic' batel Pedro, schi'uc Jacobo, schi'uc Juan. <sup>29</sup>C'alal yacal ta stael ta na'el Dios li Jesuse, iyac' xojabal li sate. Isacub tajmec li sc'u'e, xleblun tajmec saquil. <sup>30</sup>C'alal isacub tajmec li sc'u'e, ja' o te ivinaj cha'vo' viniquetic ti chlo'ilajic schi'uc li Jesuse. Ja'ic Moisés schi'uc Elías li iyalic sc'op Dios ta

vo'onee. <sup>31</sup>Oy xojobalic e'uc. Li c'usi laj yalic schi'uc li Jesuse, ja' ti c'u sba ta xham te ta Jerusalene.

<sup>32</sup>Li Pedroe schi'uc li schi'iltaque te chnicavic, pero te ivic' o satic. Laj yilbeic xojabal li Jesuse schi'uc li cha'vo' viniquetic li te schi'uque. <sup>33</sup>C'alal iyilic ti ta xa xbat li cha'vo' viniquetique, li Pedroe jech laj yalbe li Jesuse:

—Jchanubtasvanej, lec ti li' oyutique. Ja' lec ta jpascutic oxp'ej yaxna li'i, jp'ej avu'un, jp'ej yu'un Moisés, jp'ej yu'un Elías —xi li Pedroe yu'un muc xnop yu'un lec li c'usi laj yale.

<sup>34</sup>C'alal yac to'ox ta lo'il li Pedroe, ital toc, imaqic ta toc scotolic. Ixi'ic tajmec li c'alal imaqic ta toque. <sup>35</sup>Iya'iic ic'opoj ta yut toc li Diose, jech laj yal:

—Li'i ja' Jnich'on ti toj c'ux ta co'one. A'ibeic sc'op —xi.

<sup>36</sup>C'alal ilaj yo'on ta lo'il li Diose, stuc xa no'ox te va'al iyilic li Jesuse. Li yajchanbalajeltaque muc xalbeic ta ora li yan schi'iltaquique li c'u sba iyilique.

Ja' sc'oplal ti la sloq'uesbe pucuj ta yo'on jun querem li Jesuse

(Mt. 17.14-21; Mr. 9.14-29)

<sup>37</sup>Ta yoc'omal c'alal iyalic talel ta vitse, te tsobol istaic epal crizchanoetic. <sup>38</sup>Te schi'uquic jun vinic, tsots ic'opoj, jech laj yal:

—Jchanubtasvanej, avocoluc coltabun jnich'on yu'un c'ajomal yo jun li jnich'one. <sup>39</sup>Yu'un ta x'ilbajinat yu'un pucuj. Ta x'avan, ta xtup' yic', ta xvocan ye. Julquel no'ox ta xch'abulun ba pero ta xcha'llic. <sup>40</sup>Laj calbeic vocal la avajchanbalajeltac ti

ac'o sloq'uesbecun li pucuj li ochem ta yo'one, pero mu xloc' yu'unic —xi li vinique.

**41** Li Jesuse jech laj yal:

—Toj tsots avo'onic, mu xac'an xach'unic. Oy xa sc'ac'alil li' jchi'ucoxuque pero muc to bu chc'ot ta avo'onic. Oy xa sc'ac'alil la jts'icboxuc li c'u abaique —xi.

Jech laj yalbe li vinique:

—Ic'o talel la anich'one —xut.

**42** C'alal inopoj talel li quereme, ijipe ta lum yu'un li pucuje, itup'bat yic'. Li Jesuse la stac loq'uel li pucuje, icol ta ora li quereme. Li Jesuse jech laj yalbe li stot li quereme:

—Ic'o batel la anich'one —xut.

**43** Scotolic toj ch'ayel no'ox yo'onic li c'alal iyilic ti toj ech'lem sju'el li Diose.

**Ja' sc'oplal ti la scha'al Jesús ti ta xmilee**

(Mt. 17.22–23; Mr. 9.30–32)

C'alal te to'ox ch'ayem yo'on scotolic ta sventa li c'usi la spas li Jesuse, li Jesuse jech laj yalbe li yajchanbalajeltaque:

**44** —A'iic li c'usi chacalbeique, mu me xch'ay ta avo'onic. Jo'on li co'ol crixchanoutique chi'aq'ue ta sc'ob crixchanoetic —xi.

**45** Li yajchanbalajeltaque muc bu xa'ibeic smelol li c'usi laj yale yu'un muc bu x'ac'bat ya'iic yu'un li Diose. Ixi'ic ta sjaq'uel li c'u sba smelol li c'usi i'albatique.

**Ja' sc'oplal "ibuch'u más banquilar ta xcom cu'untic?" xut sbaic li yajchanbalajeltac li Jesuse**

(Mt. 18.1–5; Mr. 9.33–37)

**46** Li yajchanbalajeltac li Jesuse lic svulilan o sbaic ta sventa buch'u

junucal más banquilar ta xcom yu'unic. **47** Li Jesuse sna'ojo li c'usi ta snopique ja' yu'un laj yic' talel jun unen. La sva'an ta xocon. **48** Jech laj yalbe li yajchanbalajeltaque:

—Li buch'utic ti ta jventa jo'on ta xich'ic ta muc' li buch'u ti jech yo'on jech chac c'u cha'al li unen li'i, jo'on chiyich'ic ta muc' ya'el. Mi chiyich'ic ta muq'ue, ja' ch-ich'e ta muc' li Jtot ya'ele ti listac talele. Ja' no'ox jechoxuc e'uc li jo'oxuque, li buch'u ta sbic'tajes sba ta atojolique ja' banquilar ta xcom avu'unic —xi li Jesuse.

**Ja' sc'oplal c'u sba li buch'utic jmoj cabtel jchi'uctique**

(Mr. 9.38–40)

**49** Li Juane jech laj yalbe li Jesuse:

—Jchanubtasvanej, oy buch'u iquicutic ta sloq'uesbe pucujetic ta yo'onic li crixchanoetique. Ta xal abi li c'alal ta sloq'uese. Pero la jpajescutic yu'un mu bac'ne jchi'intic —xi li Juane.

**50** Itac'av li Jesuse:

—Mu me xapajesic. Yu'un li buch'u ta sloq'ues pucuj jech chac c'u cha'al ta jloq'uestique, ja' jmoj cabtel jchi'uctic —xi.

**Ja' sc'oplal ti ipajesatic yu'un Jesús li Jacobo schi'uc li Juane**

**51** C'alal jutuc xa'ox sc'an sta sc'ac'alil ta x'iq'ue muyel ta vinajel li Jesuse, muc bu xi' ti ta xbat ta Jerusalene. **52** Oy buch'u ba'i la stac jelavel yo' ac'o ba sch'amunic na li yo' bu ta xc'otique schi'uc ac'o sman sve'elic. Ibatic, te ic'otic ta jun colonia te ta Samaria balumil. **53** Li jsamariaetic li te nacalique muc bu

xaq'uic ta ch'om snaic yu'un iya'iic ti te chbatic ta Jerusalén schi'uc li yajchanbalajeltaque, ja' li Jacobo schi'uc li Juane, c'alal iyilic ti muc xaq'uic ta ch'om snaique, jech laj yalbeic li Jesuse:

—Cajval, ¿mi chac'an ti ta jpascutic mantal ti ac'o yaluc talel c'oc' ta vinajele yo' jech ac'o chamicuc jech chac c'u cha'al la spas li Elíase? —xiic.

<sup>55</sup>Li Jesuse la sq'uelbe sat li cha'vo' li yajchanbalajeltaque, jech laj yalbe:

—Mu me xavalic jech chac taje. Yu'un ma'uc Dios ti sventainojoxucti mi jech chavalique. <sup>56</sup>Jo'on li co'ol crixchanoutique mu me yu'unuc tal jmilic yo' ac'o ch'ayicuc o sbatel osil li crixchanoetique. Yu'un me tal jcoltaic —xi li Jesuse.

C'alal laj yalbe jech, ibatic ta yan o colonia.

**Ja' sc'opla! li buch'utic tsc'an tschi'inic batel li Jesuse**  
(Mt. 8.19-22)

<sup>57</sup>C'alal yacalic ta xanbal ta bee, li Jesuse jech i'albat yu'un jun vinic:

—Cajval, chajchi'in batel ti butic chabate —xi.

<sup>58</sup>Itac'av li Jesuse:

—Li vete ja' oy to sch'en, li mute ja' oy to stas ya'el. Jo'on li co'ol crixchanoutique mu'yuc jna. Nopo lec mi chac'an chachil'inun batele —xi li Jesuse.

<sup>59</sup>Li Jesuse jech laj yalbe jun vinic:

—Chi'inun batel —xut.  
Itac'av li vinique:

—Cajval, chavac' xibat yu'un chba jchi'in li jtote. Mi ichame, ta jmuc comel, ja' to chba jchi'inot —xi.

<sup>60</sup>Itac'av li Jesuse:

—Li buch'utic ti mu xiyich'ic ta muq'ue, co'ol schi'uc chamemic ya'el. Te ac'o smuc sba stuquic. Li jo'ote ba albo ya'iic li crixchanoetic ti ista xa sc'ac'alil ta xventainatic yu'un li Diose —xi li Jesuse.

<sup>61</sup>Oy buch'u yan jech laj yal:

—Cajval, chba jchi'inot. Pero ta chavac' xibat yu'un chba jc'opon comel scotol li buch'utic te ta jnae —xi.

<sup>62</sup>Itac'av li Jesuse:

—Mi mu ta sloq'ueluc avo'on chach'un li c'usi chacalbee, ja' jechot jech chac c'u cha'al li buch'u mu teuc batem sat li c'u sba ta sloc li yosile. Mu xlaj o li yabtele. Ja' jech mu xu' chatun yu'un Dios mi mu ta yavuc oy avo'on ta stojol li Diose —xi li Jesuse.

**Ja' sc'opla! ti itaqueic batel ta yalbeel sc'op Jesús lajuneb schanvinic j'israelietique**

**10** Ta ts'acal la st'uj yan lajuneb schanvinic (70) j'israelietic li Cajvaltique. Ta cha'cha'vo' la stac batel ta jujun jteclum schi'uc ta jujun colonia yu'un snopoj ti ts'acal to te ta xjelav e'uc li Cajvaltique.

<sup>2</sup>Xi laj yalbe scotolic:

—Melel oy ep li buch'utic chac ya'iic li sc'op Diose pero ja' muc bu ep li buch'utic chal li sc'op Diose. Jech chac c'u cha'al mi ep li c'ajoje pero ja' muc bu ep li jc'ajavile. Ja' yu'un c'anbeic Dios ti ac'o stac batel li buch'utic chba yalbeic li

sc'ope yu'un ja' Yajval li abtele.  
**3** Batanic. Chajtaquic batel jech chac c'u cha'al chijetic ti chc'ot staic oq'uiletique yu'un te chc'ot ataic jchi'iltactic ti chac smiloxuque. Ja' yu'un p'ijanic me. **4** Mu me xavich'ic batel ataq'uinic, mu me xavich'ic batel ave'elic. Mu me xavich'ic batel yan axonobic. Li buch'u chanupic ta bee mu me jaluc xalo'lilaj achi'uquic.  
**5** Li bu junucal na cha'ochique ba'i jech xavalbeic: "Ac'o spasboxuc ta jun avo'onic li Diose", utic c'otel.  
**6** Mi ta sc'an ti jun yo'onique, chilic ti jun yo'onique. Mi mu sc'anique, mu xilic o ti jun yo'onique. **7** Li na li bu cha'otesatique te me oyanic o. Mu me xajelulanic la anailique. Scotol li c'usi cha'ac'batique, lajesic. Yu'un li buch'u ta xtaque batel ta abtele te ta x'ac'bat sve'el. **8** C'alal chac'otic ta jujun jteclume, mi oy buch'u chayotesic ta snae, lajesic scotol li c'ustic chayac'beique. **9** Mi oy jchamelajeletic teye, coltaanic. Xi xavalbeique: "Na'ic ti ista xa sc'ac'alil chasventainic li Diose, yu'un avilic xa ti la scoltaoxuque", utic. **10** Mi oy bu junucal jteclum ti mu xayotesic ta snaique, xanavanic batel ta cayaetic, xi xavalique:  
**11** "Ta jlilincutic comel li spucual coccutic li' ta atojolique. Ja' senyail ti icom xa ta aba atuquic ti muc xavich'uncutic ta muq'ue. Ava'iic xa ti ista xa sc'ac'alil chasventainic li Diose", utic comel. **12** Chacalbeic, c'alal ta xc'ot sc'ac'alil ta xich'c'op li Diose, ja' más tsots vocal ta xich'ic li jchi'iltactic li te ta jteclum li bu muc xayotesique. Li vocal ti ta xich'ic li crixchanoetic li ta Sodoma ta vo'onee, ja' mu sta jech.

**Ja' sc'oplal ti ta ono'ox xich'ic tsots  
vocol li buch'utic muc bu xich'ic  
ta muc' Jesú li c'alal laj yilbeic li  
stsatsal sju'ele**

(Mt. 11.20-24)

**13** 'Ta ono'ox xich'ic tsots vocal li jchi'iltactic li te nacalic ta jteclum Corazine schi'uc li jchi'iltactic li te nacalic ta jteclum Betsáidae, yu'un iyilic jayib velta ti oy jtsatsal ju'ele pero muc bu xiyich'ic ta muc'. Li jyanlumal crixchanoetic li te nacalic ta jteclum Tiro schi'uc ta jteclum Sidón ta vo'onee, muc bu xiyilbeic li jtsatsal ju'ele. Ti iyilicuque, la slapic jalbil tsotsil tentsun ti ch'ixaltic ta lapele, schi'uc la sbon sbaic ta tanil c'oc' ti jechue. Ja' senyail ti ta xat o yo'onic li c'ustic chopol spasojique, jech ta xictaic o. **14** C'alal ta xc'ot sc'ac'alil ta xich'c'op li Diose, ja' tsots ta xich'ic vocal li jchi'iltactic li te nacalic ta Corazín schi'uc ta Betsáida li avie. Li vocal ti ta xich'ic li jyanlumal crixchanoetic li te nacalic ta Tiro schi'uc ta Sidón ta vo'onee, ja' mu sta jech. **15** Li jchi'iltactic li te nacalic ta jteclum Capernaume, ta snopic ti ja' ep ta xich'beic slequial yutsilal li Diose, pero altic. Ja' tsots ta xich'ic vocal yu'un iyilic jayib velta ti oy jtsatsal ju'ele pero muc bu xiyich'ic ta muc'—xi li Jesuse.

**16** Li Jesuse jech laj yalbe li yajchanbalajeltaque:  
 —Li buch'utic chayich'ic ta muq'ue jo'on ich'bilun ta muc' ya'el. Yan li buch'utic mu xayich'ic ta muq'ue jo'on mu xiyich'ic ta muc' ya'el. Li buch'utic mu xiyich'ic ta

muq'ue ja' mu xich'ic ta muc' e'uc li Jtot ti listac talele —xi.

**Ja' sc'oplal ti isutic talel  
ta stojol Jesús li lajuneb  
schanvinic li itaqueic batele**

**17** Li lajuneb schanvinic (70) li itaqueic batele xmuybajic no'ox isutic talel. Jech c'ot yalbeic li Jesuse:

—Cajval, ta ach'ulju'el c'alal ta pucujetic la jloq'uescutic —xutic.

**18** Li Jesuse jech laj yal:

—Ja' jech chac c'u cha'al ta xlebu'j chauc ti toj ch'ayel ta orae, ja' jech iquil ilaj stsatsal yabtel li Satanase. **19** A'iic, laj xa cac'boxuc aju'elic yo' jech xu' avu'unic chapasic ta canal li buch'utic chiscontrainutique, ja' ti toj chopolique, ti ta sc'an ti co'ol chach'ayic o sbatel osil achi'uunque. Ja' jech chac c'u cha'al chaju'ic ta teq'uel stsec schi'uc yan chonetic, ja' jech chapasic ta canal scotol li buch'utic chiscontrainutique. Mu c'usi xu' chaspasbeic. **20** Pero mu me xamuybajic no'ox ti ch'unbil amantalic yu'un li pucujetique. Ja' me ac'o muybajanic o ta sventa ti te xa ts'ibabil abiic ta vinajele —xi li Jesuse.

**Ja' sc'oplal ti xmuybaj no'ox Jesús ta sventa li c'u sba ta x'abtej li Stote**  
(Mt. 11.25-27; 13.16-17)

**21** Li Jesuse xmuybaj no'ox ta ora ta sventa li Ch'ul Espíritu li oy ta yo'one, jech lic sc'opon Stot:

—Tata, jo'ot yajvalot li vinajel balumile. Colaval ti muc bu xavac'be ya'ibeic smelol li c'usi laj cal schi'uc li c'usi la jpas

li buch'utic p'ijique schi'uc li buch'utic lec sna'ic ti yalojique. Ja' no'ox la avac'be ya'ibeic smelol li buch'utic ta sc'anic coltaele jech chac c'u cha'al ta sc'anic coltael li unetique. Tata, lec ti jech la ac'ané —xi.

**22** Li Jesuse xi lic yalanbe li crixchanoetique:

—Scotol yac'objun ta jc'ob li Jtote. Jo'on li Snich'onune muc buch'u sna' li c'u sba li co'one. Ja' no'ox stuc Jtot sna'oj li c'u sba li co'one. Ja' no'ox jech e'uc li Jtote muc buch'u sna'be li c'u sba yo'one. Jo'on no'ox jna'obje li c'u sba yo'on li Jtote, schi'uc sna'ic e'uc li buch'utic ta xcac'be sna'ique —xi li Jesuse.

**23** Li Jesuse ja' lic sc'oponan li yajchanbalajeltaque, xi laj yalbe:

—Jo'oxuc li cajchanbalajeltacoxuque la sc'uxubinoxuc xa li Diose yu'un avilic xa li c'ustic ta jpase.

**24** Chacalbeic, ep li buch'utic iyalic sc'op Dios ta vo'onee schi'uc ep li ajvaliletic ta vo'onee chac ox sq'uelic e'uc li c'usi ta jpase, pero muc xa xilic. Chac ox ya'iic e'uc li c'usi ta xcale, pero muc xa xa'iic —xi li Jesuse.

**Ja' lo'il sventa jun jsamariail vinic**

**25** Te oy jun li buch'utic sp'isoj sbaic ta jchanubtasvanej ta smantaltac li Diose. La sva'an sba yu'un oy c'usi ta sjac'be li Jesuse. Yu'un no'ox tsq'uel c'u sba chtac'av. Jech laj yalbe:

—Jchanubtasvanej, ¿c'usi ti lec ta jpase yo' jech chicuxi o sbatel osile? —xut.

**26** Li Jesuse jech laj yalbe li vinique:

—¿C'usi ts'ibabil ta smantaltac li Diose yu'un aq'ueloj xa? —xut.

<sup>27</sup>Itac'av li vinique:

—“Sloq'ueluc me avo'onic c'anic me li Dios cu'unique. Ac'bo sventain avo'onic, schi'uc atsatsalic, schi'uc ap'ijilic. Ac'o tunuc yu'un. C'uxubino me achi'ilic jech chac c'u cha'al c'ux chava'i aba atuque”, xi li smantal Diose —xi li vinique.

<sup>28</sup>Itac'av li Jesuse:

—Lec latac'av. Ti mi ja' chapas taje, chacuxi o sbatel osil —xut.

<sup>29</sup>Li vinique ta sc'an ta spoj sba, jech laj yalbe li Jesuse:

—¿Buch'u li jchi'ile? —xut.

<sup>30</sup>Li Jesuse oy c'usi laj yal ta lo'il, jech laj yal:

—Oy jun jchi'iltic ta israelal iloc' batel ta Jerusalén, ibat ta Jericó. C'alal yac ta xanbal batel ta bee, te isnup ta be j'eleq'uetic. Ipojbát scotol li c'ustic oy yu'une, schi'uc iloc'bat sc'u', schi'uc imaje. Ep iyaij. Ibatic li j'eleq'uetic. Chamem xa icom yilel li vinique. <sup>31</sup>Ts'acal to te i'ech' batel jun pale cu'untic. C'alal iyil ti te puch'ul li jchi'iltique, la sjoy sbe li palee, ijelav o batel.

<sup>32</sup>Ts'acal to te i'ech' batel jun yajcoltaob paleetic li ta muc'ta ch'ulnae. C'alal ic'ot li bu puch'ul li jchi'iltique, la sjoy sbe e'uc, ijelav o batel. <sup>33</sup>Ts'acal to te i'ech' batel jun jyanlum vinic liquem talel ta Samaria balumil. C'alal iyil ti te puch'ul li jchi'iltique, li jsamariail vinique iyich' ta c'ux. <sup>34</sup>Inopoj batel li bu puch'ule. La spoxtabe scotol li bu yajjeme, la sjaxbe asete schi'uc vino, la spixbe lec ta poc'. La scajan batel ta sba sburro, laj yic' batel li yo' bu chaq'uic ta loq'uel nae.

Te la schabi. <sup>35</sup>Ta yoc'omal c'alal iloc' batel li jsamariail vinique, laj yac'be comel chib denario taq'uin li yajval nae. Jech laj yalbe comel: “Chabibun me lec li vinique. Mi oy c'usi más ta xlaj avu'une, chajtojbe scotol c'alal mi lisut talele”, xut comel li yajval nae. <sup>36</sup>Li jo'ote ¿c'usi chanop? Li oxvo'ique ñbuch'u junucal la sp'is ta schi'il li jchi'iltic ti imaje comel yu'un li j'eleq'uetique? —xi li Jesuse.

<sup>37</sup>Itac'av li jun ti sp'isoj sba ta jchanubtasvanej ta smantaltac li Diose:

—Ja' li buch'u ic'uxubinvane —xi.

Li Jesuse jech laj yalbe:

—Batan, ba c'uxubinvanan jech e'uc li jo'ote —xut.

### Ja' sc'oplal ti ibat Jesús ta snaic Marta schi'uc María

<sup>38</sup>Li Jesuse te ic'ot ta jun colonia schi'uc li yajchanbalajeltaque. Te nacal jun ants, Marta sbi. Te i'otesat ta na li Jesuse. <sup>39</sup>Oy smuc li Martae, María sbi. Li Maríae te tal chotluc ta nopol yoc li Jesuse yu'un tsc'an cha'ibe sc'op. <sup>40</sup>Li Martae ja' no'ox batem ta yo'on li c'usi ta spas ta snae yu'un ta xmac'lánvan. Inopoj talel ta stojol li Jesuse, jech laj yalbe:

—Cajval, ¿mi mu c'usi ta xal avo'on ti jtuc no'ox chiyac'be jmeltsan li ve'lil li jmuque? Ja' lec albo ac'o tal scoltaun e'uc —xut.

<sup>41</sup>Itac'av li Jesuse:

—Marta, ta sventa ti ja' no'ox batem ta avo'on la avabtele jech muc bu jun avo'on. <sup>42</sup>Pero ja' persa chava'ibun li jc'ope. Li Maríae laj xa snop ti ja' cha'i li jc'ope, jech muc buch'u xu' chpojbat —xut.

**Ja' sc'oplal ti c'u sba ta tael ta na'el  
li Diose**  
(Mt. 6.9-15; 7.7-11)

**11** Ta yan o c'ac'al c'alal ilaj  
yo'on ta stael ta na'el Dios  
li Jesuse, jech i'albat yu'un jun li  
yajchanbalajeltaque:

—Cajval, chanubtasuncutic  
ta stael ta na'el Dios e'uc jech  
chac c'u cha'al la schanubtas  
yajchanbalajeltac li Juan li iyac' ta  
ich'el jo'e —xi.

**2 Itac'av li Jesuse:**

—C'alal chataic ta na'el li Diose,  
xi xac'opojoque:

“Jtotic Dios ti te oyot ta vinajele,  
ac'o me quich'otcutic ta muc'  
jcotolcutic li' ta balumile.

Ac'o me c'otuc sc'ac'alil chtal  
apas mantal atuc li' ta  
balumile.

Ac'o me ja'uc jpascutic li  
c'usi chac'an li' ta balumile  
jech chac c'u cha'al li te ta  
vinajele.

**3 Ac'buncutic talel jve'elcutic li  
avi c'ac'ale.**

**4 Pasbuncutic** perton yu'un  
li jmulcutique jech chac  
c'u cha'al ta jpasbecutic  
pertón li buch'utic oy smul  
cu'uncutique.

Mu me xavac'uncutic ta pasel ta  
canal li ta mulile.

Coltauncutic me”,

xachi xac'opojoic li c'alal chataic ta  
na'el li Diose —xi li Jesuse.

**5-6 Jech laj yal ta lo'il nojtoc li  
Jesuse:**

—Ti jechuc ti oy buch'u lec  
xac'opon aba achi'uc ti te chc'ot  
sch'amun ana yu'un te chvaye, pero

mu c'usi oy avu'un ti chamac'lán  
oe. Pero oy jun achi'il ti chba  
ac'opon ta o'lol ac'ubale yu'un  
chba aq'uexbe oxibuc span sventa  
chamac'lán o la avulo' li ic'ot ta  
anae. Jech chc'ot avalbe: “Jq'uextic  
oxibuc apan yu'un naca to ic'ot  
culo!. Pero mu c'usi xcac'be slajes”,  
xavut. **7** Jech chayalbe: “Mu xu',  
yu'un jmacoj xa lec li sti' jnae.  
Chijvaycutic xa jchi'uc jnich'nab  
jech mu xu' chlic cac'bot”, xayut.  
**8** Pero mi mu xlaj avo'on ta  
sjac'beeble, chlic yac'bot scotol li  
c'ustic ta xtun avu'une. **9** Ja' no'ox  
jech li Diose mi mu xlaj co'ontic  
ta sc'anulanbeeble, ta ono'ox  
xijyac'butic. **10** Yu'un li buch'utic ta  
sc'anique ta x'ac'batic.

**11** Li jo'oxuque, mi chasc'anbeic  
vaj sve' anich'onique, mu tonuc  
chavac'beic slajes. Mi chasc'anbeic  
choy sti'e, mu chonuc chavac'beic  
sti!. **12** Mi chasc'anbeic ton caxlan  
slo'e, mu jcotuc stsec chavac'beic  
sti!. **13** Li jo'oxuque chopoloxuc  
ono'ox pero xana'ic li c'usi lec  
chavac'beic la anich'nabique. Li  
Jtotic Dios ta vinajele ja' sna'o  
lec li c'usi ta xac'be li buch'utic  
ta xc'anbate. Ja' ta xac'be li Ch'ul  
Espíritue —xi li Jesuse.

**Ja' sc'oplal ti laj yalic ti ta sju'el  
banquial pucuj ta sloq'ues pucujetic  
li Jesuse**

(Mt. 12.22-30; Mr. 3.20-27)

**14** Li Jesuse la sloq'uesbe pucuj  
ta yo'on jun uma' vinic. Ti jech  
uma' li vinique, ja' ta scoj li pucuj  
li ochem ta yo'one. C'alal iloc' li  
pucuj ta yo'one, ijam li yee. Li  
crixchanoetique toj ch'ayel no'ox

yo'onic ti c'alal iyilic ti ijam ye li vinique. <sup>15</sup>Pero oy jayvo' jech iyalic:

—Li vinic li'i ta sju'el banquilar pucuj ta sloq'ues li pucujetic li ochem ta yo'onic li crixchanoetique —xiic.

<sup>16</sup>Oy yan ja' no'ox tsc'an ta sq'uelbeic yo'on li Jesuse, jech laj yalbeic:

—Jchanubtasvanej, ac'bun quilcutic ta vinajel la atsatsal aju'ele yo' jech ta jch'uncutic o ti tsots avabtele —xutic.

<sup>17</sup>Li Jesuse sna'oj li c'usi ta snop ta yo'onique, jech laj yalbe:

—Mi ta scontrain sbaic jun ajavalil schi'uc schi'iltac ta abtele, ta soquic o. Mi ta scontrain sbaic ta jp'ej no'ox snailique, ta soquic o nojtoc.

<sup>18</sup>Ja' no'ox jech e'uc li Satanase, mi ta sloq'ues schi'il ta pucujal ta yo'onic li crixchanoetique, mu xu' spas mantal mi jech ta spase. Ti jech chacalbeique, yu'un chavalic ti ta sju'el Satanás ta jloq'ues li pucujetique. <sup>19</sup>Ti meleluque, ¿buch'u ta sventa ta sloq'uesic pucujetic e'uc la avajchanbalajeltaquique? La avajchanbalajeltaquique xu' ta xallic ti mu meleluc li c'usi chavaliique.

<sup>20</sup>Li jo'one ta sventa stsatsal sju'el Dios ta jloq'ues li pucujetique, ja' ta xvinaj o ti li' xa ta spas mantal ta atojolic li Diose.

<sup>21</sup>Li buch'u tsatsal vinic schi'uc ti oy lec yabtejeb ti ta schabi o li snae, muc buch'u xu' ta xpojbun li c'ustic oy ta snae. <sup>22</sup>Pero ti mi ipase ta canal yu'un li buch'u más tsotse, ta xpojbati yabtejeb ti ja' spatoj o yo'one, jech ta xpojbati o li c'ustic oy yu'une. Li Satanase ja' jech chac

c'u cha'al li tsatsal vinique yu'un ja' sventainoj li crixchanoetique. Pero li jo'one ja' jechun jech chac c'u cha'al li más tsatsal vinique yu'un la jpas xa ta canal. Yu'un la jpojbe li vinic li te to'ox oy ta sc'obe.

<sup>23</sup>'Li buch'u muc bu lec ta xil li c'usi ta jpase ja' chiscontrain o.

**Ja' sc'oplal ti ta soquic o li buch'utic  
mu xich'ic ta muc' li Jesuse**

(Mt. 12.43–45)

<sup>24</sup>'Jo'oxuc li li' chava'ibecun li jc'ope, más to chasoquic o ta scoj ti mu xavich'icun ta muq'ue. Ja' jech chac c'u cha'al jun vinic ti iloc' pucuj ta yo'one. Li pucuje ibat ta taqui jamaltic, ba sa' bu ta xcux yo'on, pero muc bu sta. Jech iyal ta yo'on: "Ja' lec chicha'sut batel nojtoc ta yo'on li vinique", xi.

<sup>25</sup>C'alal ic'ote, xocol c'ot sta li bu to'ox oye, yu'un li vinique muc bu yac'oj sba ta sc'ob li Diose. Stuc no'ox stuq'uibtasoj sba jutuc. <sup>26</sup>Jech li pucuje ba sa' talel jucub schi'iltac ta pucujal, ja' li bu toj ech'em chopolique. Tal ochicuc ta yo'on li vinique. Te inaquic o. Li vinique más to isoc o tajmec —xi li Jesuse.

**Ja' sc'oplal li buch'utic  
más xmuyabajique**

<sup>27</sup>C'alal ja' o yacal ta xc'opojo li Jesuse, oy jun ants li te schi'uquic li crixchanoetique tsots ic'opojo, jech laj yalbe li Jesuse:

—Ja' más xmuyabaj la ame'e yu'un ja' la svog'uesot —xut.

<sup>28</sup>Itac'av li Jesuse:  
—Scotol li buch'utic ta xa'iic schi'uc ti ta sch'unic li c'ustic ta x'albatic yu'un li Diose, ja' más xmuyabajic —xi.

**Ja' sc'oplal li buch'utic chopol  
yo'onique ti ja' no'ox tsc'an  
tsq'uelbeic sju'el li Jesuse**

(Mt. 12.38–42; Mr. 8.12)

**29** C'alal yacal ta stsob sbaic talel li crixchanoetic ta stojol li Jesuse, xi laj yalte:

—Jo'oxuc li li' oyoxuc ta balumile, chopol avo'onic. Chac'an chaq'uelic li ju'ele pero muc bu chcac' avilic. Ja' no'ox chcac' avilic jech chac c'u cha'al ic'ot ta pasel ta stojol li Jonase, ja' li buch'u iyal sc'op Dios ta vo'onee. **30** Jech chac c'u cha'al li jyanlumal crixchanoetic li te nacalic ta jteclum Nínivee isna'ic ti tacbil ba yu'un Dios li Jonase, ja' chana'ic o ti tacbilun talel yu'un li Diose, jo'on li co'ol crixchanoutique. **31** Oy to'ox jun ants ta vo'onee ti ochem ta ajvalilal ta jun balumil ta xocon vinajel ta sur. C'alal chc'ot sc'ac'alil ta xich' c'op li Diose, ja' más tsots chavich'ic vocol li jo'oxuc ti li' to oyoxuc ta balumile. Li vocol ta xich' li me'ajvalile, ja' mu sta jech. Yu'un li antse nom ital, tal ya'ibe sc'op li muc'ta ajvalil Salomone yu'un iya'i ti lec p'ije. Pero li Salomone mu tsotsuc yabetel laj yich!. Jo'on ti li' oyun ta atojolique, más to jo'on jna', pero mu xavich'icun ta muc!. **32** C'alal ta xc'ot sc'ac'alil ta xich' c'op li Diose, ja' más tsots chavich'ic vocol li jo'oxuc ti li' to oyoxuc ta balumile. Li vocol ti ta xich'ic li crixchanoetic ta Nínive ta vo'onee, ja' mu sta jech. Yu'un c'alal a yalte sc'op Dios li crixchanoetic ta Nínive li Jonase, laj yictaic ta ora li c'ustic chopol tspasique. Li Jonase mu tsotsuc

yabetel laj yich!. Jo'on ti li' oyun ta atojolique, tsots cabtel quich'oj, pero mu xavaq'uic ta venta li c'usi chacalbeique.

**Ja' sc'oplal ti ja' jech chac c'u cha'al lámpara li jsatique**

(Mt. 5.15; 6.22–23)

**33** Jech chac c'u cha'al mi oy chatsanic lámparae, muc bu chavaq'uic ti bu mu xvinaje, muc bu chanujmaquiic ta moch. Chavaq'uic ta sjoc'leb yo' ja' lec chilic o osil scotol li buch'utic ta x'ochic talel ta anaique. Ja' no'ox jechun e'uc yu'un Jamal laj cac' avilic ti tacbilun talel yu'un li Diose. **34** La asatique ja' jech chac c'u cha'al li lámparae. Mi lec ta xtil li lámparae, lec ta xquiltic o osil. Yan mi mu xtile, oyutic ta ic'al ac'ubal. Ja' no'ox jechoxuc e'uc, mi ach'unojic li c'ustic yaloj li Diose, ja' chana'ic o ti tacbilun talel yu'un li Diose. Yan mi muc bu ach'unojique, mu xana'ic ti tacbilun talel yu'un li Diose. Ja' yu'un chac aq'uelic mi oy ju'el. **35** Ja' yu'un q'uelo me abaic, mu me ta scojuc no'ox ti tsots avo'onic ti mu xana'ic ti jo'on tacbilun talel yu'un li Diose. **36** Yu'un mi ta sloq'uel avo'onic ach'unojic li c'ustic yaloj li Diose, xana'ic lec ti tacbilun talel yu'un Dios jech chac c'u cha'al lec chavilic osil mi lec xtil li lámparae —xi li Jesuse.

**Ja' sc'oplal ti laj yal Jesús ti chopol  
li c'ustic tspasic li jfariseoetique**

(Mt. 23.1–36; Mr. 12.38–40; Lc. 20.45–47)

**37** C'alal ilaj yo'on ta lo'il li Jesuse, i'lq'ue batel ta ve'el yu'un jun vinic ochem ta fariseoal. Li Jesuse

ibat, te c'ot chotluc ta mexa. <sup>38</sup>Li jfariseoe toj ch'ayel no'ox yo'on c'alal iyil ti muc bu jal la spoc sc'ob li Jesuse li c'alal ba chotluc ta mexae. <sup>39</sup>Li Cajvaltique xi laj yal:

—Jo'oxuc li jfariseooxuque ja' jechoxuc jech chac c'u cha'al li buch'u ja' no'ox ta spocbe spat xocon li vasoe schi'uc li pulatue. Yan li yute muc bu tsuq'uic, noj ta ic'ubal. Ja' no'ox jechoxuc li jo'oxuque. Lecoxuc yilel pero ja' no'ox batem ta avo'onic sc'upinel li c'ustic oy yu'un la achi'ilique. Chavalbeic ti ac'o yaq'uic ta smoton Diose pero jo'oxuc no'ox chavich'ic atuquic. <sup>40</sup>Muc bu p'ijoxuc. ¿Mi chanopic ti mu xil avo'onic li Dios ti ja' la spasoxuque? <sup>41</sup>Ja' lec c'uxubinvananic, q'uelanic li c'ustic oy avu'unique, ja' lec chayilic o li Diose.

<sup>42</sup>Jo'oxuc li jfariseooxuque ta ono'ox xavich'ic tsots vocal yu'un ja' no'ox chanopic ti persa chavatic ta lajlajuneb li c'ustic ats'unojique: ja' li tulnichime, schi'uc li lulae, schi'uc scotol li c'ustic yan ats'unojique. Chaloq'uesic jujun li ta lajlajunebe ta sventa smoton li Diose. Chanopic ti persa chavac'beic Dios li c'ustic oy avu'unique, pero mu xavaq'uic ta venta ti sc'an ti lec chameltsanic c'ope, schi'uc ti ta sloq'ueluc avo'onic chac'anic li Diose. Ja' lec ti lauc apasic nojtoc ti bu persa sc'an pasèle.

<sup>43</sup>Jo'oxuc li jfariseooxuque ta ono'ox xavich'ic tsots vocal yu'un lec chava'iic ti chachotiic li bu t'ujbil chotlebal li te ta ch'ulnaetique. Ja' lec chava'iic

ti lequil c'oponbiloxuc yu'un li jichi'iltactic li te ta ch'ivite. <sup>44</sup>Jo'oxuc li jfariseooxuque, jlo'lovanejoxuc, ja' yu'un ta ono'ox xavich'ic tsots vocal. Ja' jechoxuc jech chac c'u cha'al li ch'enal ánima li bu muc bu ac'bil senyaile jech mu xvinaj. Li buch'utic te ta xjelavic ta sbae, mu sna'ic mi oy ánima li te ta yute. Ja' no'ox jechoxuc li jo'oxuque, li buch'utic ta sch'unic li c'usi chavalique, mu sna'ic ti chamem chayilic li Diose yu'un naca chopol li c'ustic oy ta avo'onique —xi li Jesuse.

<sup>45</sup>Jech itac'av jun li buch'u sp'isoj sba ta jchanubtasvanej ta smantaltac li Diose:

—Jchanubtasvanej, ti ava'i sba chavale, yu'un chopol chaviluncutic e'uc —xi.

<sup>46</sup>Li Jesuse jech itac'av:

—Jo'oxuc ti ap'isoj abaic ta jchanubtasvanej ta smantaltac li Diose, ta ono'ox xavich'ic tsots vocal. Yu'un co'ol schi'uc chapech'ic lec icatsil ti toj ole, ti vocal ta xlic ta petele. Ja' no'ox chavac'beic scuch la achi'ilique, pero li jo'oxuque mu xlic avu'unic.

<sup>47</sup>'Ta ono'ox xavich'ic tsots vocal yu'un ja' avich'ojbeic yo'on la atot ame'ic ta vo'onee. Yu'un chacha'ach'ubtasbeic lec smuquenal li buch'utic iyalic sc'op Dios ta vo'onee, ja' li buch'utic la smilanica la atot ame'ique. <sup>48</sup>Ja' chvinaj o ti co'ol avo'onic achi'uquic la atot ame'ic ta vo'onee. Jo'oxuc to chats'acubtasic li c'usi la spasic la atot ame'ic ta vo'onee yu'un po'ot xa chapasbecun jech e'uc.

<sup>49</sup>'Li Diose sna'oj ono'ox ti jech ta xc'ot ta pasèle, ja' yu'un jech

ono'ox laj yal: "Ta jtacbeic batel li buch'utic ta xalic li jc'ope schi'uc li jchanubtasvanejetique. Oy jayvo' ta smilic, oy jayvo' ta xilbajinic", xi ono'ox. <sup>50-51</sup> Ja' yu'un jo'oxuc ta xcom ta abaic ti imileic li c'u yepal li buch'utic iyalic sc'op Dios li c'alal imeltsaj li vinajel balumile schi'uc c'alal tana. C'alal imile li Abele ti c'alal to ic'ot ta lajel li Zacarfase ti imile ta yamaq'uil li muc'ta ch'ulna ta nopol scajleb smoton li Diose, jo'oxuc icom ta abaic scotol.

<sup>52</sup> Jo'oxuc ti ap'isoj abaic ta jchanubtasvanej ta smantaltac li Diose, ta ono'ox xavich'ic tsots vocal yu'un laj xa ajelbeic smelol li smantaltac li Diose. Yu'un mu xach'un atuquic, ja' yu'un muc bu chachanubtasic lec la achi'iltaquique. Ja' yu'un jo'oxuc chamaquic li buch'utic tsc'an tsch'unique —xi li Jesuse.

<sup>53</sup> C'alal laj yal jech li Jesuse, li buch'utic ti sp'isoj sbaic ta jchanubtasvanej ta smantaltac li Diose, schi'uc li jfariseoetique, i'ilinic tajmec. Ja' yu'un lic smuc'tajac'beic li Jesuse. <sup>54</sup> Yu'un ta sq'uelic ti c'u sba chtac'av li Jesuse yo' ja' ta stabeic o smul ti yalojique.

**Ja' sc'oplal ti ta ono'ox xvinaj  
li c'usi ta mucul ta jpastique**

**12** C'alal ja' o te chlo'ilaj schi'uc li jfariseoetic li Jesuse, la stsob sbaic talel ta stojol Jesú ep ta mil crixchanoetic. Te snet'net' sbaic scotolic. Li Jesuse ba'i jech laj yalbe li yajchanbalajeltaque:  
—Q'uelo me abaic ta sventa svochesobil spanic li jfariseoetique.

Yu'un tuc' yo'onic yilel pero ja' no'ox ta xlo'llovanic. Li jo'oxuque mu me xapasic jech. <sup>2</sup> Yu'un mi oy c'usi chopol chanop ta avo'onic li avie, ta ono'ox xvinaj bu c'ac'al. <sup>3</sup> Scotol li c'ustic chavalic ta mucule ta ono'ox xvinaj bu c'ac'al te ta stojol li Diose.

**Ja' sc'oplal ti laj yal Jesús: "Ja'  
xaxi'ic li Diose", xi  
(Mt. 10.28-31)**

<sup>4</sup> Jo'oxuc ti lec chaquilique, chacalbeic ti mu me xasibtes abaic yu'un li buch'utic chac smiloxuque, yu'un mu sna' xham la ach'ulelique. <sup>5</sup> Ja' me xaxi'ic li Diose yu'un ja' xu' yu'un chastic'oxuc ta muc'ta c'oc' schi'uc ach'ulelic.

<sup>6</sup> Xana'ic ti lajuneb no'ox centavo stojol ta jo'cot li bic'tal mutetique. Pero mu jcotuc ta xch'ay ta yo'on li Diose, scotol schabioj. <sup>7</sup> Li jo'oxuque atbil scotol li jayp'ej li stsotsil ajolique. Ja' yu'un mu me xaxi'ic. Yu'un más to c'uxoxuc ta yo'on li Diose; ja' jutuc no'ox c'uxubinbilic li bic'tal mutetique.

**Ja' sc'oplal ti sc'an ti jamal ta xcaltic  
ti quich'ojtic ta muc' li Cajvaltique  
(Mt. 10.32-33; 12.32; 10.19-20)**

<sup>8</sup> Chacalbeic, li buch'utic ti jamal ta xalic ta stojol li crixchanoetic ti yich'ojicun ta muq'ue, ja' no'ox jechun e'uc li jo'on li co'ol crixchanoutique, jamal ta xcal ta stojol Jtot ti melel yich'ojicun ta muq'ue, schi'uc ta stojol li yaj'angelataque. <sup>9</sup> Yan li buch'utic ti mu jamluc ta xalic ta stojol li crixchanoetic ti yich'ojicun ta muq'ue, ja' no'ox jechun e'uc, ta

xcalbe Jtot schi'uc li yaj'angeltaque  
ti muc bu yich'ojicun ta muq'ue.

<sup>10</sup>Li buch'utic chopol ta  
xc'opojoj ta jtojol, jo'on li  
co'ol crixchanoutique, ta to  
spasbatic perton yu'un Dios ti mi  
tsc'anbeique. Ja' no'ox li buch'utic  
chopol ta xc'opojoj ta stojol li Ch'ul  
Espíritue, muc xa bu ta spasbatic o  
pertón sbatel osil.

<sup>11</sup>'C'alal cha'aq'ueic ta sc'ob  
li j'abteletic li ta ch'ulnaetique,  
mu me xc'opojoj avo'onic ti c'usi  
chavalique schi'uc li c'u sba  
chatac'avique. <sup>12</sup>Yu'un ja' tsjules  
ta ajolic li Ch'ul Espíritue —xi li  
Jesus.

**Ja' sc'oplal ti ja' no'ox  
chisch'ayutic li jc'ulejaltique**

<sup>13</sup>Oy jun vinic te cacal ta o'lol  
crixchanoetic, jech laj yalbe li  
Jesus:

—Jchanubtasvanej, albo li  
jbanquil ti ac'o svoc'bun li yosil li  
ánima jtoticutique, schi'uc nojtoc li  
c'ustic oy yu'un to'oxe —xi.

<sup>14</sup>Li Jesuse jech itac'av:  
—Tata, ma'uc cabtel ta jmeltsan  
ac'opic yu'un muc bu yacun ta  
meltsanejc'op —xut.

<sup>15</sup>Li Jesuse jech laj yalbe scotolic:  
—Q'uelo me abaic, mu me  
xapich' o avo'onic li c'ustic oy li'  
ta balumile. Manchuc mi oy c'usi  
ep chataic pero ma'uc no'ox me  
xamuybajic o —xut.

<sup>16</sup>Li Jesuse jech laj yal ta lo'il:  
—Oy jun vinic lec jc'ulej. Lec iyac'  
scotol li c'ustic la sts'une. <sup>17</sup>Jech la  
snop: “¿C'u sba ta xcut? Mu xa jna'  
bu ta jtic' li c'ustic iloc' ta cosile”,  
xi ta yo'on. <sup>18</sup>Ts'acal to jech la

snop: “Jna' xa c'usi ta jpas. Ja' ta  
jines li snail li bu cac'oj li c'ustic oy  
cu'une, ta jva'an más muc!. Ja' te ta  
jtic' scotol li c'ustic oy cu'une. <sup>19</sup>Mi  
la stsob sba cu'un scotole, ts'acal  
xu' jech ta xcal ta co'on: Oy xa  
ep jve'el ta sventa jayib jabil jech  
xu' ta jcux. Yu'un la jta xa scotol li  
c'ustic ta sc'an co'one. Xu' ta jve',  
xu' ta xcuch' jech ximuybaj no'ox,  
xichi”, xi la snop li vinique. <sup>20</sup>C'alal  
jech snopoj ta spase, jech i'albat  
yu'un li Diose: “Mu xana' snopel.  
Ta ac'ubal tanae chacham. Li  
c'ustic oy avu'une ?buch'u ta sbalin  
ya'el?” x'utat. <sup>21</sup>Ja' jech sc'oplal li  
buch'u ja' no'ox ta sc'an ta stsob ep  
sc'ulejal stuque. Ta stojol li Diose  
abol sba —xi li Jesus.

**Ja' sc'oplal ti laj yal Jesús ti ja' no'ox  
Dios chijyac'butic scotol li c'ustic ta  
xtun cu'untic li' ta balumile**

(Mt. 6.25–34)

<sup>22</sup>Li Jesuse jech laj yalbe li  
yajchanbalajeltaque:

—Chacalbeic, mu me xc'opojoj o  
avo'onic ti c'usi chacuxic o li' ta  
balumile, ja' ti bu chata ave'el  
avuch'obique, schi'uc nojtoc ti bu  
chata ac'u' apac'aliique. <sup>23</sup>Yu'un ja'  
laj yac'boxuc abec'talic acuxlejalic  
li Diose, jech nojtoc chac' ave'elic  
ac'u'ic. <sup>24</sup>Q'uelavilic li jojetique,  
mu sna'ic abtel. Mu sna' x'ovolajic,  
mu sna' xc'ajavic, mu'yuc snail  
li sve'elique. Mac'lanbilic no'ox  
yu'un li Jtotic Diose. Pero li  
jo'oxuque más to chasc'uxubinic  
li Jtotic Diose. <sup>25</sup>Altic ti chc'opojoj  
avo'oniique, ma'uc me ta xnaturb o  
ac'ac'alic avorailic li' ta balumil ti  
jehch chc'opojoj avo'oniique. <sup>26</sup>Ma'uc

jset' mu c'usi xu' avu'unic. Altic chc'opoj o avo'onic ti c'ustic ta xtun avu'unique.

**27** Q'uelavilic li nichimetic li ta xch'iic ta yaxaltique. Mu'yuc yoc sc'obic. Mu sna' x'abtejic, mu sna' spasel sc'u'ic, pero lec c'upil sbaic. Chacalbeic, li Salomón ta vo'onee toj jc'ulej, lec c'upil sba li sc'u' spac'ale, pero mu xco'olaj schi'uc jech chac c'u cha'al li nichimetique.

**28** Li ts'i'lleletique lec c'upil sba syaxal, pero ta schibal yoxibal c'ac'ale taquinic xa'ox. Ja! no'ox sventa ta stsajubtasic o sjornoal pan. Ac'o mi muc bu jal ta xch'i li ts'i'llele pero lec c'upil sba syaxal ac'bil yu'un li Diose. Li jo'oxuque más to chayac'boxuc ac'u'ic li Diose pero mu xc'ot ta avo'onic. **29** Mu me xc'opoj o avo'onic ti c'usi chalajesic, ti c'usi chavuch'lque. Mu me c'usi xc'opoj o avo'onic. **30** Li buch'utic mu to xojtaquinic li Diose ja! jech ta xc'opojo yo'onic. Pero li Jtotic Dios ta vinajele ja! sna'oj stuc scotol li c'ustic ta xtun avu'unique. **31** Ja! yu'un sc'an ti chavac' abaic ta sc'ob li Diose, jech chayac'boxuc scotol li c'ustic sc'an avu'unique.

**Ja' sc'oplal ti ac'o oyuc jc'ulejaltic li te ta vinajele**  
(Mt. 6.19-21)

**32** Ac'o mi muc bu epoxuc, ac'o mi mu c'usi xu' avu'unic pero mu me xaxi'ic. Yu'un li Diose ta slequil yo'on snopoj ti co'ol chapasic mantal schi'uhe. **33** Chonic scotol li c'ustic oy avu'unique. Li stojoles ac'beic li me'onetique jech oy ac'ulejalic te ta vinajel. Mu'yuc slajeb sbatel osil, yu'un li teye

mu'yuc j'elec' schi'uc mu'yuc chon ti chlajesune. **34** Yu'un mi te oy ac'ulejaliique, ja! te batem o avo'onic.

**Ja' sc'oplal ti sc'an ti vic'luc noj jsatic ta jmalatic li Cajvaltique**

**35** Vic'luc me asatic, aq'uic me ta ilel scotol c'ac'al ti amalaojc c'u ora chital, jo'on ti Avajvalicune. **36** Sc'an ti jechoxuc jech chac c'u cha'al li jtuneletic ti smalaojc c'u ora ta sut talel li yajvalic li batem ta sq'uinal nupunel. C'alal ta xc'ot c'opojuque, ta sjambeic ta ora sti' sna ti ac'o ochuc li yajvalique. **37** Li jtuneletic ti viq'uil sat ta xc'ot taaticuc yu'un li yajvalique xmuybajic no'ox. Melel li c'usi chacalbeique, li jtuneletic ti viq'uil satic ta xc'ot taaticuque, ta x'albatic yu'un li yajvalic ti ac'o ba chotiicuc ta mexae, ta x'ac'bat sve'elic yu'un li yajvalique. **38** Manchuc mi ta o'lol ac'ubal, mi ta po'ot sacub ta xc'ot, mi jech viq'uil o satic chc'ot taaticuc yu'un li yajvalique, lec ta x'ileic o. **39** Na'ic me, jech chac c'u cha'al yajval na ti mu sna' mi ta xtal j'elec' ta ac'ubaltique. Ti sna'ojque, mu x'och svayel ti jechuque. Mu c'usi ta xbat ta elc'anel yu'un. **40** Ja! jech li jo'oxuque, sc'an ti vic'luc asatique yu'un mu xana'ic li c'u ora chicha'tal, jo'on li co'ol crixchanoutique. Mu me ch'ayluc avo'onic chjul jtaoxuc —xi li Jesuse.

**Ja' sc'oplal li buch'u lequil jtunel schi'uc li buch'u chopol jtunel**  
(Mt. 24.45-51)

**41** Li Pedroe jech la sjac'be li Jesuse:

—Cajval, li lo'il la avale, ¿mi jtuc no'ox jc'oplalcutic, mi ja' sc'oplalic e'uc li yanetic li li' oyique? —xut.

**42** Li Cajvaltique jech laj yal:

—Ja' sc'oplal scotol li buch'utic chtunic cu'une. Li buch'u lequil jtunele jun yo'on ta x'abtej ta stojol li yajvale. Yu'un p'ij ta x'ile yu'un li yajvale, ta x'ac'bat yabetl ti ja' ta smac'l'an schi'iltac ta abtel li c'alal ta sta yora chve'iique. **43** Xmuymbaj no'ox li jtunel ti jun yo'on yacal tspasel chjul taatuc yu'un li yajvale. **44** Melel li c'usi chacalbeique, li buch'u ti jun yo'on ta x'abteje ta x'ac'bat sventain scotol li c'ustic oy yu'un li yajvale. **45** Pero mi jech chlic yal ta yo'on li jtunele: “Mu to nan xtal ta ora li cajvale”, mi xie, jech chlic yutan chlic smajan li schi'iltac ta abtel ti ac'bil sventaine. Ja' chba schi'inan ta ve'el li buch'utic jyacubeletique. **46** Li yajvale ja' o chjul talel li c'alal ch'ayal o yo'on ti c'usiu no'ox ta spasbe li schi'iltaque yu'un mu sch'un ti po'ot xa chtal li yajvale. Chjul ac'batuc yich' tsots vocal yu'un li yajvale. Ja' te chba schi'in li buch'utic co'ol mu sch'unic mantale.

**47** Li jtunel ti sna' li c'ustic ts'lan li yajvale pero mi mu spase, ta xich' tsots vocal. **48** Yan li buch'u mu sna' li c'ustic ts'lan li yajvale, schi'uc mu sna' mi ta xich' vocal ta scoj li c'ustic ta spase, ja' mu sta jech chich' vocal. Li buch'u ta x'ac'bat ep sp'ijil yu'un li yajvale, ja' yu'un ja' sc'an ti ep ac'o abtejuc yu'une.

**Ja' sc'oplal ti laj yal Jesús:** “Ta jventa jo'on chlic scontrain sbaic jchop jnaclej”, xi

(Mt. 10.34–36)

**49** Li jo'one co'ol schi'uc tal jtic' c'oc' ya'el li' ta balumile. Jech

chac c'u cha'al oy c'usi tsmeltsaj yu'un li c'oq'ue, oy c'usi chch'ay o ta j'ech'el yu'un, ja' no'ox jechun e'uc, ta jventa jo'on ta xtuq'uibic li buch'utic ta sch'unic ti jo'on Yajcoltavanejcune. Li buch'utic mu sc'an sch'unique ta soquic o. Ja' yu'un soquem o sjolic ta jtojol li avie. **50** Pero más to ep ta xquich' vocal. Ti c'otemuc xa ta pasel scotol li c'u yepal albil ta xquich'e, mu xa jnopilan ti jechuque. **51** ¿Mi chavalic ti tal jpasbeic ta jmoj yo'onic li crixchanoetic li' ta balumile? Jamal chacalbeic, muc bu tal jpasbeic ta jmoj yo'onic. Ta jventa jo'on chlic scontrain sbaic. **52** Yu'un ta xc'ot ta pasel ti tspasic ta cha'voc' li jo'vo'ic ta snailique. Mi cha'vo' lec chiyilique, oxvo' chopol chiyilic; mi oxvo' lec chiyilique, cha'vo' chopol chiyilic. **53** Ta jventa jo'on chlic scontrain snich'on. Oy nich'onil chlic scontrain stot. Oy me'il chlic scontrain stseub. Oy tseub chlic scontrain sme!. Oy me'alibal chlic scontrain yalib. Oy alibal chlic scontrain sme'alib —xi li Jesuse.

**Ja' sc'oplal ti laj yal Jesús:** “Mu xana'ic sq'uelel ti avalojic li c'ustic lec ti c'otem xa ta pasel ta atojolic li avie”, xi

(Mt. 16.1–4; Mr. 8.11–13)

**54** Li Jesuse jech laj yalbe nojtoc li epal crixchanoetique:

—C'alal chavilic ta xloc' talel toc ta smaleb c'ac'ale, jech chavalic: “Ta xtal jo' tana”, xachiic. Ta melel chtal li jo'e. **55** C'alal chava'iic chtal ic' ta xocon vinajel ta sure, jech chavalic: “Toj q'uixin tana”, xachiic. Ta melel q'uixin. **56** Jlo'lovanejoxuc.

Xana'ic sq'uelel li c'u sba ta vinajele schi'uc li ta balumile, pero ja' mu xana'ic sq'uelel ti avalojic li c'ustic lec ti c'otem xa ta pasel ta atojolic li avie.

**Ja' sc'oplad ti sc'an ta jmeltsantic  
jc'optic ta ora mi ijta jmultic ta stojol  
li jchi'iltique**  
(Mt. 5.25-26)

**57** '¿C'u cha'al mu xana'ic li c'usi lec ta pasele? **58** Mi oy ata amulic ta stojol la achi'ilique, ja' sc'an ti chameltsanbeic sc'oplad ta orae. Yu'un mi muc bu smeltsaj la ac'opique, chayac' ta sc'ob li j'abteletique. Li j'abteletique chayac' ta sc'ob mayoletic. Li mayoletique chastiq'uic ta chuquel. **59** Chacalbeic, mi mu xapasic jech chac c'u cha'al laj calboxuque, scotol chayac'beic atojic li j'abteletique —xi li Jesuse.

**Ja' sc'oplad ti persa ac'o quiqtatic  
li c'ustic chopol ta jpastique**

**13** Ta sc'ac'alil no'ox li c'alal te to stsoboj sbaique, oy buch'utic laj yalbeic Jesús li c'u sba imile jayvo' j'israelitic li liquemic talel ta Galileae. Ja' li i'aq'ueic ta miled yu'un Pilato li te ta yamaq'uil li muc'ta ch'ulna li ta Jerusalén li c'alal ja' o te yacal ta smilbeic smoton li Diose.

**2** Li Jesuse jech laj yalbe:  
—¿Mi chanopic ti mu'yuc yan jchi'iltic ta Galilea ta vo'one schi'uc c'alal to tana ti más ep smulic jech chac c'u cha'al más ep smulic ti avalojic li jchi'iltactic li imileic chavalique? **3** Chacalbeic, mu jechuc li c'usi chanopique. Co'ol ono'ox chach'ayic o sbatel osil mi

mu xavictaic e'uc li c'ustic chopol chapasique. **4** Li vaxaclajunvo' ti ichamic li c'alal ijin yael li na sventa q'uelob osil li te ta nopol stanqueal jo' Siloee, ¿mi chanopic ti mu'yuc yan jchi'iltic ta Jerusalén ta vo'one schi'uc c'alal to tana ti más ep smulic jech chac c'u cha'al más ep smulic ti avalojic li jchi'iltactic li ichamique? **5** Chacalbeic, muc bu jech li c'usi chanopique. Co'ol ono'ox chach'ayic o sbatel osil mi mu xavictaic e'uc li c'ustic chopol chapasique —x'utatic yu'un li Jesuse.

**Ja' sc'oplad ti laj yal Jesús ti tsta  
sc'ac'alil ti mu xc'anatic o yu'un  
Dios li j'israeletic mi mu sch'unique**

**6** Li Jesuse la sco'oltajes jech chac c'u cha'al jtec' higo li j'israeletic. Jech laj yal:

—Oy jun vinic sts'unoj jtec' higo ta ts'unbaltic. Ts'acal to ba sq'uel mi oy sat li te'el higo ti sts'unoje pero mu'yuc sat ista. **7** Jech laj yalbe li yajchabiejts'usube: “Li te'el higo li'i yoxibal xa jabil li' chtal jq'uelulan mi ta satine, pero mu sna' satin. Ja' lec ts'eto, yu'un altic li' smacoj balumile”, xut. **8** Itac'av li yajchabiejts'usube: “Cajval, li' to oyuc junuc jabile. Ta jlocbe lec sjoyobal li yoque. Ta xcac'be lec syaxal. **9** Mi jech ta jpase, ta nan xllic satinuc. Mi mu satine, ja' to xu' ta xich' ts'etel”, xi li yajchabiejts'usube —xi li Jesuse.

**Ja' sc'oplad ti la scolta jun ants  
Jesús li ta sc'ac'alil ta xcuxique**

**10** Ta yan o c'ac'al ichanubtasvan Jesús ta yut jun ch'ulna. Ja'

sc'ac'alil o ta xcuxic li j'israeletique.  
**11** Te oy jun ants vaxaclajuneb  
 (18) xa jabil tsacbil ta chamel  
 yu'un isocbat sbaquil yu'un pucuj.  
 Xpatpun chanav, mu xu' stuq'uibtas  
 sba. **12** Li Jesuse iyil li antse, laj yic'  
 talel ta stojol. Jech laj yalbe:

—Yaa, chacol —xut.

**13** Li Jesuse laj yac'be sc'ob ta  
 sba li antse, ituq'uib ta ora li  
 sbaquile, lic yal coliyal Dios. **14** Li  
 banquilar li te ta ch'ulnae i'ilin li  
 c'alal icoltavan Jesús ta sc'ac'alil  
 ta xcuxique. Jech lic yalbe li  
 schi'iltaque:

—Oy vaquib c'ac'al xu'  
 chij'abtejutic. Ta sc'ac'alil ti xu'  
 chij'abtejutique ja' o xatalic mi  
 chac'anic coltaele. Mu me xatalic li  
 ta sc'ac'alil ta jcuxtique —xut.

**15** Itac'av li Cajvaltique:

—Jlo'lovanejoxuc. Li jujunoxuque  
 ¿mi mu xajitun batel avacax, mi  
 acaa! c'usi, ta sc'ac'alil ta jcuxtic  
 yo' ac'o ba yuch'ic jo'? **16** Li ants li'i  
 ti svaxaclajunebal xa jabil tsacbil  
 ta chamel yu'un li Satanase, ja'  
 jchi'iltic, pero chopol ava'iic ti  
 ijcolta ta sc'ac'alil ta jcuxtique —  
 x'utatic yu'un li Jesuse.

**17** C'alal jech laj yal li Jesuse,  
 iq'uemavic scotol li buch'utic  
 chopol chilic li Jesuse. Pero ep  
 crixchanoetic xmuybajic no'ox  
 yu'un iyilic ti toj lec scotol li c'ustic  
 la spas li Jesuse.

### Ja' lo'il sventa bec' mustasa

(Mt. 13.31–32; Mr. 4.30–32)

**18** Li Jesuse jech laj yal jun lo'il:  
 —Chacalbeic li c'u sba ta  
 sventainan crixchanoetic li Diose.  
**19** Ac'o mi muc bu ep li buch'utic ta

xventainatic li avie pero ta ts'acale  
 ta x'epaj. Ja' jech chac c'u cha'al li  
 bec' mustasa ti la sts'un ta yosil jun  
 vinique ti toyol ibate. Laj yac' ep  
 sc'ob. Ital mutetic, la spas stasic ta  
 sc'obtac —xi li Jesuse.

### Ja' lo'il sventa svochesobil pan

(Mt. 13.33)

**20** Laj yal yan lo'il li Jesuse. Jech  
 laj yal:

—Chacalbeic li c'u sba ta  
 sventainan crixchanoetic li Diose.  
**21** Oy lec stsatsal jech chac c'u  
 cha'al svochesobil pan. Li jucub  
 cuartia harinae, manchuc mi jutuc  
 no'ox chac'be scap li antse, pero lec  
 ta xvoch o sp'ejel —xi li Jesuse.

### Ja' sc'oplal ti laj yal Jesús ti ja'

biq'uit li sbelel vinaje

(Mt. 7.13–14, 21–23)

**22** Li Jesuse ixanavic batel ta  
 be schi'uc yajchanbalajeltac  
 yu'un ta xbatic ta Jerusalén.  
 Ech' chanubtasvanuc ta scotol  
 jteclumetic schi'uc ta coloniaetic li  
 bu ijelave. **23** Oy buch'u jech la sjac':  
 —Cajval, ¿mi atbil no'ox li  
 buch'utic ta xcolique? —xi.

Itac'av li Jesuse:

**24** —Ja' biq'uit li sbelel li cuxlejal  
 sventa sbatel osile. Ep li buch'utic  
 tsc'an tstamique pero chacalbeic  
 ti mu xu' yu'unique. Yu'un ja'  
 no'ox xu' ta stamic li buch'utic ta  
 sbic'tajes sbaic ta stojol li Diose. Ja'  
 yu'un bic'tajeso me abaic. **25** Jech  
 chac c'u cha'al mi la smac xa ti'ná  
 li yajval nae, mi ts'acal to chtal  
 atijic li ti'nae, jech chavalbeic:  
 “Cajval, Cajval, jambuncutic  
 li ti'nae”, xavutic. Pero jech

chayalbeic li yajval nae: “Ma'uc jnich'naboxuc”, xayutic. <sup>26</sup>Jech chavalbeic: “La jchi'lnotcutic ta ve'el, la achanubtasuncutic ta jteclumalcutic”, xavutic. <sup>27</sup>Jech chayalbeic: “Laj calboxuc xa ti ma'uc jnich'naboxuque. Batanic, mu xajc'anic yu'un naca chopol li c'ustic la apasique”, xayutic.

<sup>28-29</sup>Chavilic ti te xa ochemic li yo' bu ta spas mantal Dios li jtotic jme'tic ta vo'onee, ja' li Abrahame, schi'uc li Isaaque, schi'uc li Jacove, schi'uc scotol li buch'utic iyalic sc'op Dios ta vo'onee, schi'uc ep jyanlum crixchanoetic li liquemic talel ta sp'ejel balumile. Xmuyabaj no'ox. Li jo'oxuque te xa'oq'ueletic o, te xc'uxuxet o aveic ta scoj ti mu xa xu' cha'ochique. <sup>30</sup>A'iic, oy buch'utic its'inal ta x'ileic li avie, ja' banquilar chcomic yu'un la sbic'tajes sbaic. Pero oy buch'utic banquilar sp'isoj sbaic li avie, ja' its'inal chcomic yu'un la stoy sbaic —xi li Jesuse.

**Ja' sc'opla! ti laj yat yo'on Jesú斯 ta scoj ti muc bu sch'unic li buch'utic te nacalic ta Jerusalene**

(Mt. 23.37-39)

<sup>31</sup>Ital ta ora jayvo' jfariseoetic. Jech laj yalbeic li Jesuse:  
—Loc'an batel yu'un chac smilot li Herodese —xutic.

<sup>32</sup>Li Jesuse jech laj yalbe:  
—Li Herodese ja' jech chac c'u cha'al jcot vet yu'un chti'ven ya'el. Batanic, jech xc'ot avalbeic:  
“Li avie schi'uc oc'obe ta to jloq'ues pucujetic, ta to jcolta jchamelajeletic. Cha'ej ta xlaj co'on. <sup>33</sup>Persa chixanav batel li

avie schi'uc oc'ob cha'ej. Yu'un te chimile ta Jerusalén jech chac c'u cha'al te imileic li buch'utic yan iyalic sc'op Diose, xijyutcutic talel”, utic c'otel.

<sup>34</sup>‘Jo'oxuc schi'uc scotol la achi'iltac li te ta Jerusalene, atalelic o ti chamilic li buch'utic challic li sc'op Diose. Chavac'beic ton li buch'utic tacbilic talel yu'un Dios li' ta atojolique. Pero ep xa ta velta la jc'an jtsoboxuc jech chac c'u cha'al ta stsob yol ta yolon xic' jcot me'caxlane, pero mu xac'anic. <sup>35</sup>A'iic, toj abol abaic chacomic. Muc xa bu li' achi'uquic li Diose. Jech chacalbeic, muc xa bu chavilicun o. Ja' to mi ic'ot sc'ac'alil ti jech chavalique: “Toj lec li buch'u tacbil talel yu'un li Cajvaltic Diose”, mi xachiique, ja' to chavilicun nojtoc —x'utatic yu'un li Jesuse.

**Ja' sc'opla! ti icol yu'un Jesú斯  
jun vinic situbem sbec'tale**

**14** C'alal ja' o sc'ac'alil ta xcuxic li j'israelétique, li Jesuse i'iq'ue batel ta ve'el yu'un jun banquilar jfariseo. Li yan schi'iltac ta fariseoale te italic e'uc yu'un ta sq'uelic li c'ustic ta spas li Jesuse. <sup>2</sup>C'alal i'och ta na li Jesuse, te ista jun vinic situbem sjunul sbec'tal. <sup>3</sup>Li Jesuse jech la sjac'be li buch'utic sp'isoj sbaic ta jchanubtasvanej ta smantaltac li Diose schi'uc li jfariseoétique:  
—¿Mi xu' ta jcoltatic jchamelajeletic ta sc'ac'alil ta jcuxtique? —xut.

<sup>4</sup>Muc bu xtac'avic. Li Jesuse la scolta li vinic ti situbem sbec'tale. Laj yalbe nojtoc ti ac'o sutuc

batele. <sup>5</sup>Li Jesuse jech la sjac'be li jfariseoetique:

—Li jo'oxuque, mi oy bu its'uj ta ch'en jcotuc aburroic, mi jcotuc avacaxic ta sc'ac'alil ta jcuxtique, ɬmi muc chba aloq'uesic talel ya'el? —xut.

<sup>6</sup>Muc bu xtac'avic li c'alal jech laj yal li Jesuse.

**Ja' sc'oplal ti laj yal Jesús ti sc'an ti ac'o jbic'tajes jbatique**

<sup>7</sup>C'alal iyil Jesús ti buch'utic ic'bilic ta ve'ele ta sc'an ta xchotiiic li bu t'ujbil chotlebale, jech laj yal ta lo'il:

<sup>8</sup>—Mi oy buch'u chayiq'uic ta sq'uinal nupunele, mu me xba achotan abaic li bu t'ujbil chotlebale yu'un naca me oy buch'u ich'bil lec ta muc' ti ic'bil talel ta q'uine. <sup>9</sup>Ja' chlic yalboxuc li buch'u i'ic'veane: “Loc'an, yu'un ja' li' ta xchoti li jchi'iltic li'i”, xayutic. Jech xaq'uexetic xa li c'alal chba chotlanic ta slajeb li chotlebale. <sup>10</sup>C'alal cha'iq'ueic ta ve'ele, ja' lec ba chotlanic ta slajeb chotlebal. C'alal chtal li buch'u laj yic'oxuque, jech chayalbeic: “Tata, li' xatal ta t'ujbil chotlebale”, xayutic. Jech scotol li buch'utic te chotolic ta mexa achi'uque ta xilic ti ich'biloxuc ta muq'ue. <sup>11</sup>Yu'un li buch'utic ta sc'an ti ich'bilic ta muq'ue, ta xbic'tajeseic yu'un li Diose. Yan li buch'utic ta sbic'tajes sbaique ja' ta x'aq'ueic ta ich'el ta muc' yu'un li Diose —xi li Jesuse.

<sup>12</sup>Li Jesuse jech laj yalbe e'uc li buch'u i'ic'van ta ve'ele:

—C'alal cha'ic'van ta ve'ele, mu me ja'uc no'ox xavic' li buch'utic

lec xac'opon aba achi'uque, schi'uc la achi'iltac ta voq'uele, schi'uc la avuts' avalaltaque, schi'uc la alac'natac ti jc'ulejique. Oy me yic'al chayic' ta ve'el e'uc, chaspacbe ti laj avic' ta ve'ele. <sup>13</sup>C'alal cha'ic'van ta ve'ele, ja' xavic' li me'onetique, schi'uc li mu'yuc sc'obique, schi'uc li pec'aetique, schi'uc li coxoetique, schi'uc li ma'satetique. <sup>14</sup>Jech chayac'be slequilal yutsilal li Diose yu'un mu xu' ta spaquic sutel. Chavich' atojolic nojtoc li c'alal co'ol chacha'cuxiic achi'uc li buch'utic lec tuc' yo'onique —xi li Jesuse.

**Ja' sc'oplal ti laj yal Jesús ti ep yan crixchanoetic ta x'iq'ueic yu'un Dios mi mu sc'anic li j'israelétique**

(Mt. 22.1–10)

<sup>15</sup>C'alal jech iya'iic li buch'utic te ta xve'ic e'uc ta mexa schi'uc li Jesuse, oy buch'u jech laj yalbe li Jesuse:

—Xmuyabajic no'ox li buch'utic jech ta schi'inic ta ve'el li c'alal chtal spas mantal li buch'u t'ujbil yu'un li Diose —xi.

<sup>16</sup>Li Jesuse jech laj yal ta lo'il:

—Oy jun vinic iyac' ve'el. La stac ta iq'uel ep crixchanoetic ac'o tal ve'icuc. <sup>17</sup>C'alal ista yora ta xve'ique, la stac batel yajtunel ac'o ba yic'an talel li buch'utic yalanojbe xa ono'oxe. Jech laj yalbe batel: “Ba albo li buch'utic calanojbee ac'o taluc scotolic yu'un imeltsaj xa li ve'lile”, xut batel li yajtunele. Ja' jech c'ot yal li yajtunele. <sup>18</sup>Pero scotolic iyalic ti oy bu chbatique. Li june jech laj

yal: "Mu xu' chibat yu'un ja' to la jman cosil jech persa chba jq'uel. Avocoluc albo ac'o spasbun perton", xi. <sup>19</sup>Li yane jech laj yal: "Mu xu' chibat yu'un ja' to la jman lajuncot j'abtel vacax. Ja' chba jq'uel mi lec x'abtejic. Avocoluc albo ac'o spasbun perton", xi. <sup>20</sup>Li yane jech laj yal: "Mu xu' chibat yu'un ja' to linupun", xi. <sup>21</sup>C'alal isut talel li yajtunele, laj yalbe yajval li c'u sba itac'av li jujunique. Li yajval ve'lile i'ilin. Jech laj yalbe li yajtunele: "Batan ta anil ta ch'ivit schi'uc ta cayaetic li li' ta jteclume. Ja' ba ic'ano talel li me'onetique, schi'uc li pec'aetique, schi'uc li mu'yuc sc'obique, schi'uc li coxoetique, schi'uc li ma'satetique", xi. <sup>22</sup>Li jtunele la sch'un li c'usi i'albat yu'un li yajvale. Ts'acal to jech tal yalbe li yajvale: "Cajval, ijch'un xa scotol li c'usi la ayalbune. Italic xa li crixchanoetique, pero oy to ep xocol li ve'lile", xi. <sup>23</sup>Li vinique jech laj yalbe li yajtunele: "Batan xa ta bebetic schi'uc ta sbelel trigotic. Ba ic'ano talel ta persa li buch'utic chatae. Ja' lec mi inoj li jnae. <sup>24</sup>Chacalbe, scotol li buch'utic ba'i laj calbe ti ac'o tal ve'icuque, mu junuc chcac'be xa ya'ibeic smuil li ve'lile", xi li yajval ve'lile —xi li Jesuse.

**Ja' sc'oplad ti sc'an ti mu c'usi más ta jc'antic mi ta jchi'intic li Jesuse**  
(Mt. 10.37-38)

<sup>25</sup>C'alal ixanav batel li Jesuse, ichi'inat batel yu'un epal crixchanoetic. Li Jesuse ijoyp'ij, jech laj yalbe:

<sup>26</sup>—Li buch'u chischi'ine ja' sc'an ti jo'on más c'uxun ta yo'one. Ja' sc'an ti mu másuc c'ux ta yo'on li stot sme'e, schi'uc yajnil, schi'uc snich'nab, schi'uc sbanquiltac, schi'uc yits'inabtac, schi'uc svixobtac, schi'uc yixleltac. Sc'an nojtoc ti mu másuc ta snop li c'u sba ta xcuxi li' ta balumile. Ja' jech xu' chischi'in. <sup>27</sup>Li buch'u junucal ti mu sc'an xich' vocol jech chac c'u cha'al ta xquich' vocole, mu xu' chtal ta jtojol. <sup>28</sup>Jech chac c'u cha'al mi oy buch'u ta spas smuc'ta na ti ep ta coje, ba'i ta snop li c'u yepal taq'uin ta xlaj yu'un scotole. Ta snop nojtoc jaycoj ta spas, yu'un ta snop mi stsuts yu'un li c'u smuc'ul ta spase. <sup>29</sup>Yu'un mi mu snop lec ba'ie, c'alal mi la sliquesbe xa yoque, ta ts'acal ta xil ti mu stsuts yu'une, ta squechan. Ta xlic labanatuc yu'un scotol li buch'utic ta xilique. Jech ta xalic: <sup>30</sup>"Q'uelavil li vinique, la sliquesbe sva'anel li snae pero muc bu stsuts yu'un", xi sc'oplad. <sup>31</sup>Jech nojtoc, mi oy jun ajvalil chba spasic c'op schi'uc yan ajvalile, ba'i ta snop mi xu' ta spas ta canal li buch'u ta spasic c'op schi'uque ti ta lajunmil no'ox yajsaltaro ti ja' jtob ta mil yajsaltaro li yajcontrae. <sup>32</sup>Mi iyil ti mu xu' yu'une, c'alal nom to xtal li yajcontrae, ta stac batel schi'il ta abtel ac'o ba slequic'opon li yajcontrae, yo' ac'o pasuc ta jmoj yo'onic. <sup>33</sup>Ja' no'ox jech e'uc li jo'oxuque, mi oy buch'u mu sc'an xicta scotol li c'ustic oy yu'une, mu xu' chischi'in o.

**Ja' sc'oplal li buch'u mu ta j'ech'eluc  
ta sch'une, mu c'usi xtun o jech  
chac c'u cha'al li ats'am mi ich'ay xa  
schi'ile**

(Mt. 5.13; Mr. 9.50)

**34**'Jech chac c'u cha'al li ats'am  
ti lec ta xtun cu'untique, pero mi  
ich'ay xa schi'ile, mu xa c'usi xtun  
o yu'un mu xa xcha'chi'ub nojtoc.  
**35**Pero mi chi' toe, ta xtun ta sventa  
ve'lil. Ta xtun nojtoc ta sventa  
syaxal balumil. Pero mi ich'ay xa  
schi'ile, mu xa c'usi xtun o. Ac'o  
mi ta syaxal balumil mu xa xtun.  
Ta xich' jipel batel o. Ja' no'ox jech  
e'uc li buch'utic chischi'inique,  
mi mu ta j'ech'eluc jun yo'onic  
ta jtojole, mu xtunic o cu'un. Li  
jo'oxuc ti ava'iique nopbeic lec  
smelol —xi li Jesuse.

### **Ja' lo'il sventa jch'ayel chij**

(Mt. 18.10-14)

**15** La stsob sbaic talel ta  
stojol Jesús jtsobpatanetic  
schi'uc yan crixchanoetic ti  
chopol sc'oplalic e'uhe, yu'un ta  
sc'an ta xa'ibeic sc'op li Jesuse.  
**2**Li buch'utic ti sp'isoj sbaic ta  
jchanubtasvanej ta smantaltac  
li Diose schi'uc li jfariseoetique,  
chopol iyilic. Jech laj yalic:

—Li vinic li'i ja' ta xic'an ta stojol  
li buch'utic chopol li c'ustic ta  
spasique. Ta schi'in ta ve'el nojtoc  
—xiic.

**3**Li Jesuse jech laj yalbe jun lo'il:  
**4**—¿C'usi chanopic? Mi oy  
jun vinic ti oy jo'vinic (100) ta  
cot schije, pero mi ich'ay comel  
jcotuque, ¿mi mu teuc lamal  
chicta li yo' bu oy lec sve'elic li

balunlajuneb yo'vinic (99) ta cote  
ti chba sa' talel li jcot ti ich'aye?  
**5**C'alal mi la sta li jcate, xmuybaj  
xa, ta scajan talel ta snequeb.

**6**C'alal chjul ta snae, ta xic' talel  
scotol li yuts' yalaltaque schi'uc  
li slac'nataque, jech chalbe:  
“Muybajanic me yu'un ijta xa li  
jcot jchij ti ich'ay to'ox”, xut.  
**7**Chacalbeic, ja' no'ox jech e'uc li  
Diose, xmuybaj no'ox ta sventa li  
c'u yepal oy ta stojole. Pero más to  
xmuybaj schi'uc li yaj'angeltac mi  
oy jun crixchano ta xicta li c'ustic  
chopol tspase.

### **Ja' lo'il sventa li taq'uin ti ich'aye**

**8**Mi oy jun ants ti oy lajunsep  
saquil taq'uinie, mi ich'ay jsepuc  
yu'une, ¿mi mu stsan stoj schi'uc  
mi mu smes lec sna yo' ta sa' lec  
li jsep saquil taq'uin ti ich'ay  
yu'une? **9**Mi istae, ta xic' talel  
scotol li yuts' yalaltaque schi'uc  
li slac'nataque, jech chalbe:  
“Muybajanic me yu'un ijta xa li  
jsep saquil taq'uin li ch'ayem to'ox  
cu'une”, xut. **10**Chacalbeic, ja' no'ox  
jech e'uc li Diose, xmuybaj schi'uc  
li yaj'angeltac mi oy jun crixchano  
ta xicta li c'ustic chopol tspase —xi  
li Jesuse.

### **Ja' lo'il sventa jun ch'ayem querem**

**11**Li Jesuse jech laj yal nojtoc:  
—Oy jun vinic cha'vo' snich'on.  
**12**Li its'inaljech laj yalbe li stote:  
“Tata, ac'bun li c'u yepal anopoj  
ti chavac'bune”, xut. Li totile la  
svoc'be li c'u yepal snopoj chac'be  
li jujun snich'one. **13**C'alal i'ech'  
chib oxib c'ac'ale, li its'inaljech la  
stsob scotol li c'ustic oy yu'une,

iloc' batel, ibat ta yan o balumil. Te la slajes scotol li c'ustic oy yu'une yu'un ja' ibat ta yo'on li c'ustic ta sc'an yo'one. <sup>14</sup>C'alal ilaj scotol li staq'uine, i'ech' tsots vi'nal li bu nacale. Iya'i vi'nal e'uc. <sup>15</sup>Ja' yu'un ibat ta jtunel ta sna jun vinic li te no'ox nopol nacale. Li vinique la spas ta mantal li quereme, la stac batel ac'o ba chabibatuc schitom. <sup>16</sup>Li quereme ta xvi'naj tajmec jech chac slo' e'uc li vaxe, ja' li sve'el li chitometique. Pero mu c'usi i'ac'bat slajes yu'un li yajvale. <sup>17</sup>C'alal jech oy svocol ta vi'nale, jech la snopilan: "Oy ep yajtunel li jtote pero lec noj sch'utic scotolic. Oy to ta xcom yu'unic. Li jo'one chicham xa ta vi'nal. <sup>18</sup>Ja' más lec chisut batel nojtoc ta sna li jtote. Jech chc'ot calbe: Tata, ijta xa jmul ta stojol li Diose schi'uc ijta xa jmul ta atojol e'uc. <sup>19</sup>Ja' lec mu xa xap'isun ta anich'on. P'isun ta avajtunel no'ox, xcut c'otel", xi la snop ta yo'on li quereme. <sup>20</sup>Isut batel ta sna stot.

'C'alal nom to'ox xtale, i'ile yu'un li stote. Li totile iyil ti isut to talel li snich'one. Xmuybaj xa tajmec ba snup ta be ta ora, la smey, la sts'uts'un. <sup>21</sup>Jech i'albat yu'un li snich'one: "Tata, ijta xa jmul ta stojol li Diose schi'uc ijta xa jmul ta atojol e'uc. Ja' lec mu xa xap'isun ta anich'on", xut. <sup>22</sup>C'alal jech i'albat yu'un li snich'one, muc bu jech la snop li totile. Jech laj yalbe li yajtunel que: "Ich'ic talel ta ora li c'u'il li bu toj leque, ac'beic slap. Ac'beic yaniyoal sc'ob schi'uc xonob. <sup>23</sup>Iq'uic talel li ch'iom vacax li bu lec xa yup'eme. Milic jti'tic. Yu'un ta

jpastic q'uin. <sup>24</sup>Ical ti chamem xa li jnich'one. Li avie icha'cuxi xa ya'el. Yu'un vo'one xa ich'ay. Li avie ijta xa", xi. Lic spasic li q'uine.

<sup>25</sup>'C'alal ic'ot li its'inal, muc to'ox bu te oy li banquilale yu'un batem ta abtel. C'alal isut talele, te xa nopol xtal ta sts'el sna, iya'i ti ta spasic q'uin li stote. Iya'i ti yacal ta x'ac'otajique. <sup>26</sup>Laj yic' loq'uel jun yajtunelic, la sjac'be c'usi sventa li q'uin ta spasique. <sup>27</sup>Jech i'albat: "Yu'un isut talel la avits'ine. La atote la smil li ch'iom vacax li bu lec xa yup'em cu'untique, ja' sventa ti lec isut talel la avits'ine", x'utat. <sup>28</sup>C'alal iya'i jech li banquilale, i'ilin. Mu sc'an x'och ta sna. C'alal iya'i li stote, loc' yalbe ti ac'o ochuque. <sup>29</sup>Li banquilale jech laj yalbe li stote: "Ep xa jabil li'abtej avu'un. Muc bu la jp'aj amantal. Pero mu c'usi avac'ojbun. Mu jcotuc tentsun avac'ojbun ti jech ta jpas o q'uin jchi'uc li bu lec xa yup'em cu'untique, la apasbe o sq'uinal ta sventa ti isut talele. Pero ep jmulivajel antsetic imulivaj schi'uc, ja' te ilaj o scotol li c'usi la avac'bee. Pero ja' c'ux ta avo'on", xut li stote. <sup>30</sup>Itac'av li stote: "Jnich'on, li jo'ote scotol c'ac'al li" jchi'uc jbatique. Scotol li c'ustic oy cu'une, ja' avu'un e'uc. <sup>32</sup>Ja' sc'an ti jech ta jpastic q'uine schi'uc ti xijmuybajtique yu'un icha'cuxi xa talel ya'el la avits'in ti chamem to'ox ti caloxtique. Yu'un vo'one xa ich'ay pero isut xa talel", xut —xi li Jesuse.

**Ja' lo'il sventa li jchabiejna ti ja' no'ox ta sc'an ti lec ta x'ile yu'un li crixchanoetique**

**16** Li Jesuse jech laj yalbe yan lo'il li yajchanbalajeltaque:  
 —Oy jun vinic, lec jc'ulej. Oy yajchabiejna, ja' yac'ojbe sventain scotol li c'ustic oy yu'un schi'uc staq'uin. Oy buch'u ba tic'batuc smul li jchabiejnae ta stojol li yajvale. Li smul ti i'albate ja' ti la slajesbe li c'ustic oy yu'un li yajvale. <sup>2</sup>Li vinique laj yapta talel li yajchabiejnae, jech laj yalbe:  
 “Ica'i ti chopol li c'usi chapase. Albuñ c'u yepal la achon schi'uc c'u to yepal te oy avu'un li c'ustic laj cac'bot achabie, yu'un mu xa xu' chachabibun jna”, xut. <sup>3</sup>Li jchabiejnae jech la snop ta yo'on: “¿C'uxi chive' mi chisnutes loq'uel li cajvaled? Mu xu' cu'un abtel. Chiq'uevav nojtoc mi chic'anolaje. <sup>4</sup>Jna' xa c'usi ta jpas c'alal mi iloc' ta chabiejnae yo' jech oy buch'u chisc'uxubinic chiyotesic ta snaic”, xi la snop. <sup>5</sup>Laj yic' tal ta jujuntal li buch'utic oy yilic schi'uc li yajvale. La sjac'be li buch'u ba'i itale: “¿C'u yepal avil schi'uc li cajvaled?” xut. <sup>6</sup>Itac'av: “Jo'vinic (100) barril asete quich'oj”, xi. Li jchabiejnae jech laj yalbe: “Jato li sjunal avile. Chotlan, ts'ibao ta ach'. Lajuneb no'ox yoxvinic (50) barril xats'iba”, xut. <sup>7</sup>Ta ts'acale la sjac'be li yane: “Li jo'ote ¿c'u yepal la avile?” xut. Itac'av: “Jo'vinic (100) coxtal trigo quich'oj”, xi. Li jchabiejnae jech laj yalbe: “Jato li sjunal avile, ts'ibao ta ach'. Chanvinic (80) no'ox coxtal xats'iba”, xut. <sup>8</sup>Li yajvale jech laj

yal: “Li chopol vinique p'ij. Sna' snopel li c'u sba ta xich' c'uxubinel li c'alal mi iloc' li' ta jnae”, xi li yajvale. Ja' no'ox jech li buch'utic ja' no'ox batem ta yo'onic li c'u sba lec ta x'ech'ic li' ta balumile, ja' más sna'ic snopel li c'u sba ta sc'uxubin schi'ilic yo' jech ta xc'uxubinatic e'uhe. Yan li buch'utic yich'ojic ta muc' Dios ti yalojique, ja' mu sna'ic snopel c'u sba ta sc'uxubin schi'ilic yo' jech ta xc'uxubinatic yu'un Dios e'uc.

<sup>9</sup>Li jo'oxuque chacalbeic, li c'ustic oy avu'unique naca no'ox ac'biloxuc, jech sc'an chacoltavanic o. Mu me ja' no'ox batem ta avo'onic ti lec cha'ech'ic li' ta balumil schi'uc li c'ustic oy avu'unique yu'un xlaj no'ox. Mi chacoltavanique, jech cha'iq'ueic ochel ta vinajel sbatel osil.

<sup>10</sup>Li buch'u lec ta schabi li c'usi ti jutuc no'ox ac'bil sventaine, ja' no'ox jech lec ta schabi mi ep li c'usi ac'bil sventaine. Yan li buch'u mu schabi li c'usi ac'bil sventain ti jutuc no'oxe, ja' no'ox jech e'uc mu schabi mi ac'bil sventain epe. <sup>11</sup>Mi jech mu xachabiic li c'ustic oy avu'unic ti ja' no'ox ac'biloxuc yu'un Dios sventa chapasic o li c'usi ta sc'ane, jech mu xayac'beic li c'usi sventa sbatel osile. <sup>12</sup>Yu'un li c'ustic oy avu'unic li' ta balumile naca no'ox yac'oj ach'amunic li Diose. Pero mi mu xavaq'uic tunuc yu'un li Diose, jech mu xayac'beic li c'usi ja' avu'unic atuquic ti ja' sventa sbatel osile.

<sup>13</sup>Jech chac c'u cha'al jun jtunel ti mu stac' ti cha'vo' yajvale. Ti cha'vo'uc yajvale, li june chopol

chil; li june lec chil. Lec ta xtun yu'un li june; ja' mu xtun yu'un li june. Ja' no'ox jech e'uc li jo'oxuque, mu xu' chatunic yu'un Dios mi ja' noj batem ta avo'onic la ataq'uinique —xi li Jesuse.

<sup>14</sup>C'alal jech iya'iic li jfariseoetique, la sna'leic li Jesuse yu'un stalelic ti xpich'et o yo'onic yu'un li taq'uine. <sup>15</sup>Li Jesuse jech laj yalbe:

—Ta stojol li crixchanoetique chavaq'uic ta ilel ti tuc' avo'onic ti avalojique. Li Diose sna' ti muc bu lec la avo'onique. Yu'un li buch'u ta xac' sba ta ich'el ta muc' ta stojol li crixchanoetique, ja' muc bu lec ta x'ile yu'un li Diose.

**Ja' sc'oplal ti laj yal Jesús ti mu xch'ay sc'oplal li c'ustic yaloj li Diose**

<sup>16</sup>C'alal muc to'ox bu talem li Juan li iyac' ta ich'el jo'e, ja' no'ox ava'iic li c'usi yaloj Dios ti la sts'iba Moisés schi'uc li buch'utic yan iyalic sc'op Dios ta vo'onee. Ts'acal to laj yalboxuc li Juan ti ista xa sc'ac'alil chasventainic li Diose. Li avie oy xa ep li buch'utic ta sloq'uel yo'onic chac' sbaic ta sc'ob li Diose.

<sup>17</sup>Ac'o mi la sjel li c'usi laj yal li Diose pero ta ono'ox xc'ot ta pasel li c'usi ba'i laj yale. Li c'ustic yaloj li Diose mu xch'ay sc'oplal, ta ono'ox xc'ot ta pasel scotol. Ja' xlaj to li vinajel balumile.

**Ja' sc'oplal li buch'u chicta yajnile**

(Mt. 19.1-12; Mr. 10.1-12)

<sup>18</sup>Li buch'u chicta yajnile, mi chic' yan antse, chmulivaj. Schi'uc nojtoc li buch'u chic' li suteem antse chmulivaj nojtoc —xi li Jesuse.

**Ja' lo'il sventa jun jc'ulej vinic schi'uc jun jc'anolajel, Lázaro sbi**

<sup>19</sup>Li Jesuse jech laj yal nojtoc: —Oy jun vinic lec jc'ulej. Toj lequic scotol li sc'u' spac'ale. Naca toyolic stojol. Scotol c'ac'al naca lec c'ustic ta slajes. <sup>20</sup>Oy jun vinic nojtoc, Lázaro sbi. Ep c'a'al chinetic iloc' ta sbec'tal. Te chc'ot schotan sba ta sti' sna li jc'ulej vinique yu'un chc'anolaj. <sup>21</sup>Li Lázaro e chac sve' li c'ustic ta sts'uj yalel ta yolon smexa li jc'ulej vinique, pero mu x'ac'bat. Li bu c'a'em li sbec'tale te ta xlec'ulanbat ta ts'i'etic. <sup>22</sup>Ik'ot sc'ac'alil ti icham li jc'anolajele. Li sch'ulele i'ic'bat batel yu'un li yaj'angeltac li Diose. Te ba ac'atuc li yo' bu oy li Abrahame schi'uc li buch'utic co'ol lec tuc' yo'onic. Icham e'uc li jc'ulej vinique, imuque. <sup>23</sup>Li sch'ulele te ibat li yo' bu oy li sch'ulelic li buch'utic muc bu xich'ic ta muc' li Diose. C'alal te ta xich' tsots vocole, la sq'uel batel ta nom li bu oy li Abrahame. Iyil ti te oy e'uc li Lázaro. <sup>24</sup>Li jc'ulej vinique tsots iyapta li Abrahame: "Tata, c'uxubinun. Taco talel li Lázaro. Ac'o sts'aj talel sbic'tal sc'ob ta jo', ac'o tal sicubtasbun li coq'ue yu'un toj tsots ta xquich' vocol li' ta c'oq'ue", xi. <sup>25</sup>Li Abrahame jech laj yalbe: "Jmom, juleso ta ajol li c'u sba la'ech' ta balumile, ti lec jc'ulejote. Li Lázaro ja' me'on tajmec, pero li' xa oy ta lequilale, xmuabaj no'ox. Li jo'ote te chavich' o vocal. <sup>26</sup>Mu xu' xtal li Lázaro yu'un oy muc'ta xab ta o'lol. Muc buch'u xu' ta xjelav batel te li yo' bu oyote, jech muc

buch'u xu' ta xjelav talel li'i e'uc", xi.

**27** Itac'av li jc'ulej vinique: "Mi mu xu' chtal scoltaune, avocoluc taco batel ta sna li jtote. **28** Yu'un oy to jo'vo' quits'inab te comemic ta jna. Ac'o ba yalbe ti mu me xtalic li'i yu'un toj tsots ich' vocol li'i", xi. **29** Li Abrahame jech laj yalbe: "Te ono'ox yich'ojbeic sjunic li Moisese schi'uc li buch'utic yan iyalic sc'op Dios ta vo'onee. Xu' ja' ac'o sch'unic li c'ustic yalojique", xut.

**30** Itac'av li vinique: "Tata, mu sc'an sch'unic. Pero ti oyuc jun buch'u xojaquinic ti ta xcha'cuxi ti te chba c'oponaticue, ja' to ta sch'unic o, ja' to te chictaic o li c'ustic chopol ta spasique", xi. **31** Li Abrahame jech laj yalbe: "Mi mu sc'an sch'unic li c'usi yalojic li Moisese schi'uc li buch'utic yan iyalic sc'op Dios ta vo'onee, ac'o mi che'ot c'oponaticuc yu'un li buch'u cha'cuxieme, mu sch'unic nojtoc", xut —xi li Jesuse.

**Ja' sc'oplal ti sc'an ti mu jsocbetic yo'on li jchi'iltique schi'uc sc'an ti ta jpasbetic pertone**

(Mt. 18.6–7, 21–22; Mr. 9.42)

**17** Li Jesuse jech laj yalbe li yajchanbalajeltaque:

—Scotol c'ac'al oy buch'u ta sc'an chasocboxuc avo'onic. Pero toj abol sba li buch'u ta socvane. **2** Ja' lec ac'o chucbatuc jun cho' ta snuc', ac'o jipeuc ochel ta nab, ac'o chamuc o. Jech mu xa bu tsocabat yo'onic li buch'utic ti jech yo'onic jech chac c'u cha'al li unetic ti sch'unojic ti jo'on Yajcoltavanejecune.

**3** P'ijanic me. Mi oy ista smul ta atojol junuc li buch'u co'ol

avich'ojicun ta muq'ue, ja' sc'an ti chavalbe ti mu me spas jeche. Mi iyicta li c'usi chopol ta spase, pasbo perton. **4** Mi ta sta smul ta atojol ep ta velta ta jun no'ox c'ac'ale, mi jech chtal yalulanbot jujun velta ti c'alal ta sta smule: "Muc xa bu ta jpas jech", mi xayute, pasbo perton —xi li Jesuse.

**Ja' sc'oplal ti tsc'anic ac'beel más ta sjol ta yo'onic ti ac'o sch'unic ti chcoltaatic yu'un li Cajvaltic li yajchanbalajeltaque**

**5** Li yajtacbalalataque jech laj yalbeic li Cajvaltique:  
—Ac'bun más ta jol ta co'oncutic ti ta jch'uncutic ti jo'ot chacolatauncutique —xutic.

**6** Li Cajvaltique jech laj yalbe:  
—Manchuc mi jutuc no'ox ach'unojic ti jo'on chajcoltaique, mi ja' no'ox jech chac c'u cha'al jp'ej bec' mustassae, pero xu' xa chapasic li c'ustic tsots ta pasele. Jech chac c'u cha'al mi chavalbeic ti ac'o buluc loq'uel li jtec' higo li'i, ti ac'o ba ch'iuc ta nabe, ja' ta xc'ot ta pasel avu'unic.

**Ja' sc'oplal ti sc'an ti mu jtoy jbatic ta sventa li c'ustic ta jpastique**

**7** Mi oy avajtunel ti i'ay ta sloquel avosil, mi ta schabiel achij c'uxi, c'alal chjul ta anae, muc bu jech chavalbe: "La' me, la' chotlan li' ta mexae", muc bu xavut. **8** Jech chavalbe: "Ac'o smac ach'ut, meltsanbun talel jve'el. Ja' to chavez'e'uc mi ilaj co'on ta ve'ele", xavut nojtoc. **9** C'alal mi la sch'unbot la amantale, muc bu chavalbe coliyal ti la sch'un la amantale yu'un

ja' yabtel o ti jech ta spase. <sup>10</sup>Ja' no'ox jech e'uc li jo'oxuque, mi la ach'unic scotol li c'ustic chayalbeic li Diose, mu me xatoy abaic yu'un mu c'usi xu' avu'un apas atuquic. Ja' no'ox la apasic li c'usi avabtel yac'objoxuc li Diose. Ti laj yac'oxuc li Diose yu'un tsc'an ti chatunic yu'une —xi li Jesuse.

Ja' sc'oplal ti icol yu'un  
Jesús lajunvo' viniuetic ti  
tsacbilic ta c'a'el chamele

<sup>11</sup>C'alal ibat ta Jerusalén li Jesuse, te ijelav ta sts'aquil li Galilea balumile schi'uc li Samaria balumile. <sup>12</sup>Te i'och ta jun colonia. Te italic ta be lajunvo' viniuetic tsacbilic ta c'a'el chamel. Nom la sva'an sbaic li yo' bu oy li Jesuse. <sup>13</sup>Tsots laj yaptaic li Jesuse: —Jesús, jchanubtavanej, avocoluc c'uxubinuncutic —xiic.

<sup>14</sup>C'alal iyil li viniuetic li Jesuse, jech laj yalbe:

—Batanic, ba ac' abaic ta ilel ta stojol li paleetique —xut.

La sch'unic, ibatic. Jech icol o scotolic.

<sup>15</sup>Pero oy jun ti c'alal iyil ti icol xae, isut talel ta ora ta stojol li Jesuse. Tsots ic'opoj talel, laj yalbe coliyal Dios ta sventa ti icol xae.

<sup>16</sup>La spatan sba ta balumil ta stojol li Jesuse, jech laj yalbe:

—Colaval ti la acoltaune —xut.

Li vinic ti jech laj yale liquem talel ta Samaria balumil. <sup>17</sup>Li Jesuse jech laj yalbe li buch'utic te schi'uque:

—Lajunvo' ti la jcoltaic li ta schamelique. Q'uelavil, muc bu sutic xa talel li balunvo' jchi'iltic

ta israelale, muc bu xtal yalbeic coliyal Dios. <sup>18</sup>Ja' no'ox isut talel li jyanlumal vinic li'i, ja' tal yalbe coliyal Dios —xi.

<sup>19</sup>Li Jesuse jech laj yalbe li vinique:

—Lican, batan. Yu'un la ach'un ti oy ju'ele ja' yu'un lacol —xi li Jesuse.

Ja' sc'oplal ti staoj yav ta spasic li c'u sba stalelic ono'ox li crixchanoetic li c'alal ta xcha'tal li Cajvaltique

(Mt. 24.23-28, 36-41)

<sup>20</sup>Li jfariseoetique la sjac'lbeic Jesús c'u ora chtal ich'vanuc ta venta li Diose. Itac'av li Jesuse:

—C'alal chlic ich'vanuc ta venta li Diose, mu'yuc senyail. <sup>21</sup>Muc buch'u xu' jech chal: “Li' xa ta spas mantal li Diose”, “Le' xa ta spas mantal li Diose”, muc buch'u xu' xi. Yu'un li ich'el ta venta yu'un li Diose li' xa oy ta atojolique —xi li Jesuse.

<sup>22</sup>Li Jesuse jech laj yalbe li yajchanbalajeltaque:

—Ta sta sc'ac'alil ti jech chavalique: “Taluc ta ora li Cajvaltique”, xachiic, pero mu to xu' xital, jo'on li co'ol crixchanoutique. <sup>23</sup>Jech chlic yalic li crixchanoetique: “Li' xa oy li Cajvaltique”, xayutic. Oy yan jech ta xalic: “Le' xa oy li Cajvaltique”, xayutic. Mu me xach'unic, mu me xabatic li bu chayalbeique. <sup>24</sup>Yu'un ja' jech chac c'u cha'al li chauc ti xleblajet ta xquiltic ti butic xa oyutique, ja' jech scotol crixchanoetic chiyilic c'alal chicha'tal, jo'on li co'ol crixchanoutique. <sup>25</sup>Pero persa

ba'i chquich' ep vocal yu'un mu xisc'anic li jchi'iltactic ta israelale. <sup>26</sup>Jech chac c'u cha'al la spasic li crixchanoetic ta vo'one li c'alal li' to'ox oy li Noee, ja' no'ox jech ta spasic e'uc li c'alal ta sta sc'ac'alil chicha'tal, jo'on li co'ol crixchanoutique. <sup>27</sup>C'alal muc to'ox bu talem li nojelale, ja' no'ox batem ta yo'onic ta sa'el sve'elic schi'uc yuch'obic, ta xnupunic schi'uc ta xac' ta malijel stseubic. Ja' to ipajic li c'alal ital li nojelale schi'uc i'och ta barco li Noee yu'un icham scotolic. <sup>28</sup>Ja' jech la spasic e'uc li crixchanoetic ta vo'one li c'alal li' to'ox oy li Lote. Ja' no'ox batem ta yo'onic ta sa'el sic, ta xmanolajic, ta xp'olmajic, ta x'ovolajic, ta sva'an snaic. <sup>29</sup>Ja' to ipajic li c'alal iyal talel c'oc' ta vinajel schi'uc azufree, iloc' batel ta Sodoma li Lote yu'un icham scotolic. <sup>30</sup>C'alal chicha'tal, jo'on li co'ol crixchanoutique, ja' jech ta spasic e'uc li crixchanoetique.

<sup>31</sup>'C'alal chicha'tal, jo'on li co'ol crixchanoutique, mu me ja'uc no'ox batem ta avo'onic li c'ustic oy avu'unic li' ta balumile. Li buch'utic ti te oyic ta sjol snaic ti pach'ale, c'alal ta xyalic talele, mu xa me x'och sloq'uesic li c'ustic oy ta yut snaique. Li buch'utic ti te oyic ta yabtelique, mu xa me sutic talel ta snaic. <sup>32</sup>Na'ic me li c'usi ic'ot ta pasel ta stojol li yajnil Lot ta vo'onee. <sup>33</sup>Mi ja' avac'ojic tajmec ta venta li c'u sba chacuxiic li' ta balumile, chach'ayic o. Yan mi mu xavaq'uic más ta venta li c'u sba chacuxiic li' ta balumile, ja' chacuxiic o sbatel osil.

<sup>34</sup>'Chacalbeic, mi ta ac'ubaltic chitale, mi oy cha'vo' ta xvayic ta jun teme, jun ta xquic' ba, jun ta xcom. <sup>35</sup>Mi oy cha'vo' antsetic co'ol ta xjuch'unique, jun ta xquic' ba, jun ta xcom. <sup>36</sup>Mi oy cha'vo' viniquetic ti co'ol ta x'abtejic ta yabtelique, jun ta xquic' ba, jun ta xcom —xi li Jesuse.

<sup>37</sup>Jech ijac'bat yu'un li yajchanbalajeltaque:  
—Cajval, ¿bu ta xc'ot ta pasel taje?  
—xutic.

Itac'av li Jesuse:  
—Jech chac c'u cha'al mi oy c'usi chameme ta ono'ox xlaj ta xulem, ja' jech ta ono'ox xtal tsots vocal ta stojolic li buch'utic ti mu xiyich'ic ta muq'ue —xi.

Ja' lo'il sventa jun me'anal ants ti ep ta velta a sc'opon li jmeltanejc'ope

**18** Li Jesuse laj yalbe ta lo'il li yajchanbalajeltaque ti ac'o me mu xlaj yo'onic ta stael ta na'el li Diose. <sup>2</sup>Xi laj yalbe:

—Oy jun jmeltanejc'op ta jun jteclum mu xich' ta muc' li Diose, mu xac' ta venta nojtoc li crixchanoetique. <sup>3</sup>Oy jun me'anal ants ti te nacal e'uhe. Li antse ep ta velta a sc'opon li jmeltanejc'ope, jech laj yalbe: "Avocoluc coltaun yu'un oy buch'u chiscontrain", xut. <sup>4</sup>Li jmeltanejc'ope ep c'ac'al mu sc'an smeltsanbe sc'op li me'anal antse. Ts'acal to jech la snop: "Mu xixi' yu'un li Diose, mu xixi' yu'un e'uc li crixchanoetique. <sup>5</sup>Ja' no'ox ta scoj ti li' xtantun li me'anal antse ta jmeltsanbe li sc'ope. Yu'un mu jc'an ti li' no'ox xtantune", xi li jmeltanejc'ope —xi li Jesuse.

**6** Jech laj yal nojtoc li Cajvaltique:  
—La ava'iic li c'u sba iyal li  
jmeltsanejc'op ti chopol yo'one.  
**7** Yan li Dios ti tuc' yo'one, mi  
jech chac'anbeic ta c'ac'al ac'ubal  
ti ac'o scoltaoxuc ti c'usi vocalol  
chava'iic, jo'oxuc li t'ujbiloxuc  
yu'une, persa ta spas yu'un mu xlaj  
yo'on ta ya'iel la ac'opique. **8** C'alal  
mi ista sc'ac'alile, chascoltaic ta  
ora. Pero c'alal chicha'tal, jo'on li  
co'ol crixchanoutique, ¿mi yoquel  
to'ox avich'ojicun ta muc' li' chjul  
jtaoxuque? —xi li Jesuse.

**Ja' lo'il sventa jun jfariseo  
schi'uc jun jtsobpatan**

**9** Li Jesuse laj yal jun lo'il yo' jech  
ac'o ya'ibec smelol li buch'utic tuc'  
yo'onic ti yalojique, ti ta sp'ajic li  
schi'iltaque. Jech laj yal:

**10**—Oy cha'vo' viniuetic co'ol  
ba staic ta na'l Dios ta yamaq'uil  
li muc'ta ch'ulnae. Li june ja'  
jfariseo; li june ja' jtsobpatan. **11** Li  
jfariseoe te va'al ista ta na'l li  
Diose, stoyoj no'ox sba. Jech laj  
yal: “Dios, colavalbun ti muc bu  
jechun jech chac c'u cha'al li yan  
jchi'iltaque. Yu'un li stuquique  
ta x'elc'ajic, chopol yo'onic, ta  
xmulivajic. Muc bu jechun nojtoc  
jech chac c'u cha'al li jtsobpatan li  
li' chasta ta na'ele. **12** Li jo'one chib  
velta ta xquicta quixim ta jujun  
xemana. Scotol li c'ustic ta jtae ta  
xcat ta lajlajuneb. Jujun ta jloq'ues  
ta lajlajuneb sventa amoton”, xut  
li Diose. **13** Pero li jtsobpatane  
nomnom no'ox va'al icom yu'un  
ta xi' li Diose. Mu sc'an stoy sat ta  
vinajel nojtoc. Yu'un sna' ti chopol  
li yo'one, ja' no'ox la smajulan sti'

yo'on, jech la sc'opon Dios: “Dios,  
c'uxubinun yu'un jpasmulilun”,  
xut li Diose. **14** Chacalbeic, li  
jtsobpatane pasbil xa perton yu'un  
smul li c'alal isut batel ta snae. Yan  
li jfariseoe muc bu spasbat perton  
yu'un smul. Yu'un li buch'utic  
ta stoy sbaique ja' ta xbic'tajese  
yu'un li Diose. Yan li buch'utic ta  
sbic'tajes sbaique, ja' ta x'aq'ueic ta  
ich'el ta muc' yu'un li Diose —xi li  
Jesuse.

**Ja' sc'oplal ti laj yac'be slequilal  
yutsilal Dios li unetic li Jesuse**

(Mt. 19.13–15; Mr. 10.13–16)

**15** Ilic'bat talel unetic ta stojol li  
Jesuse yo' ac'o yac'anbe sc'ob ta  
sjolic yo' jech ta xich'ic slequilal  
yutsilal Dios. C'alal iyilic li  
yajchanbalajeltaque, la spajesic li  
buch'utic laj yiq'uic talel li unetique.  
**16** Li Jesuse laj yic' ta stojol li  
unetique schi'uc li stot sme'ique.  
Jech laj yalbe li yajchanbalajeltaque:  
—Ac'o talicuc ta jtojol li unetique,  
mu me xapajesic. Yu'un li buch'utic ja'  
jehic jech chac c'u cha'al li unetique,  
lec to cha'iic pasel ta mantal yu'un li  
Diose. **17** Melel chacalbeic, li buch'utic  
mu sco'oltajes sbaic jech chac c'u  
cha'al li unetique, mu xu' x'ochic  
li yo' bu ta spas mantal li Diose —  
x'utatic yu'un li Jesuse.

**Ja' sc'oplal ti ic'oponat yu'un jun  
jc'ulej vinic li Jesuse**

(Mt. 19.16–30; Mr. 10.17–31)

**18** Oy jun jmeltsanejc'op yu'un li  
j'israelétique jech ijac'bat li Jesuse:  
—Lequil jchanubtasvanej, ¿c'usi  
ta jpas yo' chicuxi o sbatel osile?  
—xut.

**19** Itac'av li Jesuse:

—¿C'u cha'al chavalbun ti lequil jchanubtasvanejune? Yu'un ja' no'ox jun ti leque, ja' li Diose. **20** Xana' ti jech chal li mantaletique: “Mu me xamulivaj, mu me xamilvan, mu me xa'elc'aj, mu me xasa'be smul achi'il, ich'o ta muc' atot ame!”, xi —x'utat yu'un li Jesuse.

**21** Itac'av li vinique:

—Scotol li c'ustic la avale ta jbic'tal ono'ox lic jch'un —xi.

**22** C'alal iya'i Jesús ti jech itac'ave, jech laj yalbe:

—Pero oy to c'usi sc'an xapas. Ba chono scotol li c'ustic oy avu'une. Li stojole q'uelananbo li me'onetique ja' oy o ac'ulejal ta vinajel. Ts'acal to xtal achi'inun —xut.

**23** C'alal iya'i jech li vinique, iyat tajmec yo'on yu'un toj ep c'ustic oy yu'un. **24** C'alal iyil Jesús ti chat yo'one, jech laj yal:

—Li jc'ulejetique toj vocol chac' sbaic ta sc'ob li Diose. **25** Jech chac c'u cha'al mu xjelav jcot cameyo ta chac acuxae, ja' no'ox jech mu xu' ta x'och li yo' bu ta spas mantal Dios li buch'utic ja' no'ox batem ta yo'onic li sc'ulejalique —xi li Jesuse.

**26** Li buch'utic iya'iic ti jech laj yal li Jesuse, jech lic sjac'beic:

—Mi mu xolic li jc'ulejetique, ¿buch'u ma ti chcol ya'ele cha'a?  
—xutic.

**27** Li Jesuse itac'av:

—Li crixchanoetique mu xu' ta scolta sba stuquic sventa sbatel osil. Ja' no'ox xu' ta xolic ta sventa li Diose, yu'un scotol xu' yu'un —xut.

**28** Li Pedroe jech laj yal:

—Li jo'oncutique laj xa  
quictacutic scotol li c'ustic oy to'ox

cu'uncutique. Li' xa jchi'ucotcutique —xut.

**29-30** Itac'av li Jesuse:

—Melel li c'usi chacalbeique, li buch'utic laj xa yicta snaic, mi stot, mi sme', mi sbanquiltac, mi yits'inabtac, mi svixobtac, mi yixleltac, mi smucobtac, mi yajnil, mi snich'nab yu'un cha'iic ti persa tspasic li c'ustic tsc'an li Diose, ta stabe más sq'uemexol li c'ustic oy to'ox yu'une schi'uc ta xcuxiic o sbatel osil —xi li Jesuse.

**Ja' sc'oplal ti yoxibal xa velta laj yal  
Jesús ti ta xmilee**

(Mt. 20.17-19; Mr. 10.32-34)

**31** Li Jesuse la sq'uej sbaic ech'el jutuc schi'uc li lajchavo' yajchanbalajeltaque. Jech laj yalbe:

—Xana'ic ti te chijbat ta Jerusalene. Jo'on li co'ol crizchanoutique, te chc'ot ta pasel scotol li jc'oplal li la sts'ibaic comel li buch'utic iyalic sc'op Dios ta vo'onee. **32** Chi'aq'ue ta sc'ob li buch'utic ma'uc jchi'iltic ta israelale. Chislabanic, chismajic, chistubtaic. **33** Chistsitsic ta nucul, chismilic, chimuque, pero ta yoxibal c'ac'al chicha'cuxi loq'uel ta jmuquenal —xi li Jesuse.

**34** Li yajchanbalajeltaque muc bu xa'ibeic smelol ti jech laj yale. Mu sna'ic mi jech ta xc'ot ta pasel.

**Ja' sc'oplal ti la sjambe sat jun  
ma'sat te ta nopol Jericó li Jesuse**

(Mt. 20.29-34; Mr. 10.46-52)

**35** C'alal nopolic xa'ox batel ta jteclum Jericó li Jesuse, te chotol ta ti'be istaic jun ma'sat. Ja' j'israelal vinic. Te ta xc'anolaj.

**36** C'alal iya'i li ma'sat ti te ch-ech'ic ep schi'iltaque, la sjac'be ti bu chbatique. **37** I'albat yu'un schi'iltac ti ja' te schi'uquic ech'el li Jesúz li liquem talel ta Nazarete. **38** C'alal iya'i li ma'sate, tsots laj yapta li Jesuse:

—iJesús, jo'ot snitilulot David ti sc'oplal ono'ox cha'och ta ajvalilal cu'uncutique, ich'un ta c'ux! —xut.

**39** Li buch'utic sbabeic batele la spajesic:

—iAnchan! —xutic.

Pero más to tsots ic'opoj li vinique:

—iJo'ot snitilulot David, ich'un ta c'ux! —xi.

**40** Iva'i li Jesuse. Laj yalbe ti ac'o snitic talel ta stojole. C'alal ic'ot li yo' bu oye, la sjac'be:

**41** —¿C'usi chac'an chajpasbe? —xut.

Itac'av li vinique:

—Cajval, avocoluc jambun li jsate —xi.

**42** Itac'av li Jesuse:

—Ijam xa la asate yu'un la ach'un ti oy ju'e! —xut.

**43** Ijam ta ora li sate, la schi'in batel li Jesuse, ep laj yal coliyal Dios. C'alal iyilic li crixchanoetique, laj yalic coliyal Dios e'uc.

**Ja' sc'oplal ti ijeltabat yo'on jun jtsobpatan, Zaqueo sbi**

**19** Li sbelel Jerusalene te x'ech' ta yut jteclum Jericó, te i'ech' batel li Jesuse. **2** Oy jun vinic te ta jteclum Jericó, Zaqueo sbi. Yich'oj tsots yabel. Ja' banquilar yu'un li jtsobpatanetique. Jc'ulej. **3** Li Zaqueoe tsc'an ta sq'uel li c'u sba li Jesuse. Tsc'an chojtaquin.

Pero muc bu xil yu'un toj ep li crixchanoetique. Yu'un c'alal vinic no'ox li Zaqueoe. **4** Ja' yu'un ijelav ta anil, imuy ta jtec' higo te ta nopol ti'be li yo' bu chjelav li Jesuse yo' xil o chjelav teye. **5** C'alal ic'ot ta yolon li te' li Jesuse, la sq'uel muyel. Iyil ti te luchul li Zaqueoe, jech laj yalbe:

—Zaqueo, yalan talel ta ora yu'un te chibat ta ana —xut.

**6** Iyal ta ora li Zaqueoe. Xmuyabaj xa laj yic' batel ta sna li Jesuse.

**7** C'alal iyil li crixchanoetic ti ibat ta sna Zaqueo li Jesuse, chopol iya'iic. Te x'up'etic no'ox liquel yu'un sna'ojic ti ja' jlo'lovanej li Zaqueoe. Iyalic ti ba schi'in jpasmulil li Jesuse. **8** Li Zaqueoe iva'i, jech laj yalbe li Cajvaltique:

—Cajval, ta xcac'be j'o'loluc li c'ustic oy cu'un li me'onetique. Mi oy buch'u la jlo'lobe staq'uine, más to ep ta jsutesbe. Mi la jlo'llo jo'vinique (100), chanib ciento chcac'be —xi.

**9** Li Jesuse jech laj yal:

—Li avie lacol xa acotolic li ta anae. Co'ol xa avo'on achi'uc li jtotic jme'tic Abraham ta vo'onee yu'un la ach'un xa ti jo'on Avajcoltavanejune. **10** Jo'on li co'ol crixchanoutique tal jcoltaoxuc acotolic yu'un ch'ayemoxuc —xi li Jesuse.

**Ja' lo'il sventa lajunvo' jtuneletic ti i'ac'bat sjolintasbeic staq'uin li yajvalique**  
(Mt. 25.14–30)

**11** C'alal te cha'iic li c'usi chal Jesúz li crixchanoetique, li Jesuse laj yal jun lo'il yu'un po'ot xa'ox

chc'otic ta Jerusalén. Ja' laj yal ta lo'il ti ma'uc to sc'ac'alil ta x'och ta ajvalilale. Yu'un la snop li j'israeletic ti ja' xa ta x'och ta ajvalilal yu'unic li te ta Jerusalene, ti ja' li buch'u t'ujbil yu'un li Diose.

<sup>12</sup>Li Jesuse jech laj yal:

—Oy snich'on jun muc'ta ajvalil. Lec jc'ulej li nich'onile. Ibat ta nom ta yan o balumil, ba sch'am talel yabtel yu'un ta x'och ta ajvalilal. Ja' chlic sventain scotol li schi'iltaque.

<sup>13</sup>C'alal muc to'ox bu bateme, laj yic' talel lajunvo' yajtuneltac. Ta jujuntal laj yac'be jujusep taq'un ti ep ta cien yich'oe. Jech laj yalbe: "Ba jolintasic. C'alal mi lisut talele, ja' to chjul quich'", xut comel.

<sup>14</sup>Li crixchanoetique chopol iya'iic ti ja' ta x'och ta ajvalilal li schi'ilique. Ja' yu'un la staucic batel buch'u chba yal li bu ba sch'am talel yabtele. Jech c'ot yalic: "Mu jc'ancutic ti ja' ta x'och ta ajvalilal cu'uncutic li jchi'ilcutic taje", xiic c'otel.

<sup>15</sup>C'alal laj yich' yabtel sventa ajvalil li vinique, isut batel. C'alal ic'ote, la stakan ta iq'uel li yajtuneltaque yu'un tsc'an cha'i c'u yepal ijolin yu'unic jujunice li staq'uine.

<sup>16</sup>Li buch'u ba'i itale jech laj yal: "Cajval, lajunsep ijolin cu'un la ataq'uin li la avac'bun comele", xut li yajvale.

<sup>17</sup>Itac'av li yajvale: "Lec oy. Jo'ote lequil jtunelot. Yu'un jun avo'on la ajolintas li jtaq'uine, ja' yu'un chcac' aeventain lajuneb jteclum", x'utat.

<sup>18</sup>Ital nojtoc li yane, jech laj yal: "Cajval, jo'sep ijolin cu'un la ataq'uin li la avac'bun comele", xut li yajvale.

<sup>19</sup>Itac'av li yajvale: "Jo'ote jo'ob jteclum chcac' aeventain", xut.

<sup>20</sup>'Ital nojtoc li yane, jech laj yal: "Cajval, ilo li jsep ataq'uin li la avac'bune. La jpix lec ta panyo, la jnac' lec.

<sup>21</sup>Yu'un lixi' avu'un. Jna'oj ono'ox ti toj tsots avo'one. Jna'oj ti chavich' sutel schi'uc sjol la ataq'uine, chavich' li bu ma'uc avabtele", xi la spoj sba.

<sup>22-23</sup>Jech i'albat yu'un li yajvale: "Mu xatun, ch'ajil jtunelot. Mu junuc avo'on ta jtojol ja' yu'un mu xac'an xa'abtej. Ta xquich' ac'op li c'u sba la avale. Mi xana' ti toj tsots co'one ta sventa ti ta xquich' li bu ma'uc cabtel chavale, èc'u cha'al muc x'a atic' ta sjolintasobil taq'un ti ac'o xjolin li jtaq'uine? C'alal litale, iquich' sutel schi'uc sjol ti jechuque", xut.

<sup>24</sup>Jech laj yalbe li yan li te oyique: "Pojbeic li jsep jtaq'uin ti cac'ojbee, ja' ac'beic li buch'u laj yich' talel li lajunsepe", xut.

<sup>25</sup>Jech laj yalic: "iCajval, pero yich'oj xa lajunsep!" xutic.

<sup>26</sup>Itac'av li ajvalile: "Chacalbeic, scotol li buch'utic ta x'abtejic cu'une ta sta li c'usi ta xtun yu'unique. Ta to xcac'be más nojtoc. Yan li buch'utic mu sc'an x'abtejic cu'une mu c'usi ta staic o. Ta jpojbe ta j'ech'el li c'ustic cac'ojbeique.

<sup>27</sup>Jech nojtoc li buch'utic chiscontrainique, ti mu sc'anic ti jo'on ta jventainique, iq'uc talel scotolic li'i. Li' ta jsat xamilique", xi li ajvalile —xi li Jesuse.

**Ja' sc'opla! ti laj yich'ic ta muc' Jesús  
li c'alal i'och ta Jerusalene**

(Mt. 21.1-11; Mr. 11.1-11; Jn. 12.12-19)

<sup>28</sup>C'alal jech laj yal lo'il li Jesuse, ja' sbabe batel yu'un chbat ta Jerusalén schi'uc li

yajchanbalajeltaque. <sup>29</sup>Te ic'otic ta nopol colonia Betfagé sbi, schi'uc ta jteclum Betania, te ta yoc vits Olivatic. Li Jesuse la stac jelavel cha'vo' yajchanbalajeltac. <sup>30</sup>Jech laj yalbe:

—Batanic le' ta coloniae. C'alal cha'ochique, te chucul chataic jcot burro muc to bu cajlebinbil. Jitunic, nitic talel. <sup>31</sup>Mi oy buch'u chasjac'beic ti c'u cha'al chajitunic li burroe, albeic: "Yu'un ta xtun yu'un li Cajvaltique", utic —xi li Jesuse.

<sup>32</sup>Ibatis li cha'vo'i que. Li c'u sba i'albatic batel yu'un li Cajvaltique ja' jech c'ot staic. <sup>33</sup>C'alal ja' o te ta sjitunic li burroe, jech i'albatic yu'un li yajvale:

—¿C'u cha'al chajitunic li jburroe?  
—x'utatic.

<sup>34</sup>Itac'avic:

—Yu'un ta xtun yu'un li Cajvaltique —xutic.

<sup>35</sup>La snitic talel li yo' bu oy li Jesuse. Laj yac'beic spuychijic sventa staspat, la scajlebin li Jesuse. <sup>36</sup>C'alal cajal xa batel ta burro li Jesuse, li j'israelétique la sq'uianic spuychijic ta be li bu ch-ech' ba li Jesuse. <sup>37</sup>C'alal nopol xa batel ta Jerusalén li yo' bu vits Olivatique, tsots lic c'opojojic scotol li buch'utic ti scotol c'ac'al te schi'uquic li Jesuse. Xmuyabajic no'ox laj yalbeic coliyal Dios ta sventa ti iyilbeic ep stsatsal sju'el ti iyac' ta ilel li Jesuse. <sup>38</sup>Jech laj yalic:

—iToj lec li ajvalil li la stacbutic talel li Cajvaltic Diose! iLec xa chijyilutic li Diose! iAc'o quich'tic ta muc! —xiic.

<sup>39</sup>Oy jayvo' jfariseoetic te schi'uquic. Jech laj yalbeic li Jesuse:

—Jchanubtasvanej, pajeso li buch'utic yich'ojicot ta muq'ue yu'un x'avetic tajmec —xutic.

<sup>40</sup>Li Jesuse jech laj yalbe:

—Chacalbeic, mi ta xpajic li buch'utic yich'ojicun ta muq'ue, ja' chlic c'opojojic li tonetique —xut.

<sup>41</sup>C'alal nopolic xa'ox ba ta Jerusalén li Jesuse, la sq'uel li jteclume, laj yoq'uita li schi'iltac li te nacalique. <sup>42</sup>Jech laj yal:

—Xana'icuc ti yorail xa chacolique, lec, pero mu xana'ic.

<sup>43</sup>Yu'un chc'ot sc'ac'alil chtal sjoy sbaic li' ta jteclum li buch'utic chascontrainoxuque, chasmaquic ta jujot. <sup>44</sup>Chtal sjinesic la ateclumalique. Mu jp'ejuc ton latsal chcom, scotol ta sjinesic. Chasmilic acotolic nojtoc. Ja' ta scoj ti mu xach'unic ti jo'on tacibilun talel yu'un Dios sventa chajcoltaique —xi li Jesuse.

Ja' sc'opjal ti la snutsan loq'uel jp'olmaletic li te ta yamaq'uil li muc'ta ch'ulna li Jesuse

(Mt. 21.12-17; Mr. 11.15-19; Jn. 2.13-22)

<sup>45</sup>Li Jesuse i'och ta yamaq'uil li muc'ta ch'ulna li te ta Jerusalene. La snutsan loq'uel scotol li jp'olmaletic li te oyique. <sup>46</sup>Jech laj yalbe:

—Jech ts'ibabil ta sc'op Dios: "Li jnae ja' snail li bu chataicun ta na'ele", xi li Diose. Pero li jo'oxuque apasic xa ta snailch'en j'eleq'uetic —xi.

<sup>47</sup>Li Jesuse scotol c'ac'al te ichanubtasvan ta yamaq'uil li

muc'ta ch'ulna li te ta Jerusalene.  
 Li banquilar paleetique schi'uc  
 li buch'utic sp'isoj sbaic ta  
 jchanubtasvanej ta smantaltac li  
 Diose, schi'uc li j'abteletique, la  
 snopilanic c'u sba xu' ta smilic li  
 Jesuse. <sup>48</sup>Pero muc bu staic, yu'un  
 scotol crixchanoetic ta sloq'uel  
 yo'on laj ya'ibeic sc'op li Jesuse.

**Ja' sc'oplal ti ijac'bat Jesús ti buch'u  
 i'ac'bat sju'ele**

(Mt. 21.23–27; Mr. 11.27–33)

**20** Ta yan o c'ac'al te  
 ichanubtasvan ta yamaq'uil  
 li muc'ta ch'ulna te ta Jerusalén li  
 Jesuse. Laj yalbe ti ista xa sc'ac'alil  
 ta xventainatic yu'un li Diose. Te  
 italic jayvo' banquilar paleetic  
 schi'uc li buch'utic sp'isoj sbaic ta  
 jchanubtasvanej ta smantaltac li  
 Diose, schi'uc li j'abteletique. <sup>2</sup>Jech la  
 sjac'beic li Jesuse:

—Albun ca'licutic ti buch'u laj  
 yac'bot aju'el yo' chapas li c'ustic  
 chapase —xutic.

<sup>3</sup>Itac'av li Jesuse:

—Oy c'usi chajac'beic e'uc.  
 Albecun. <sup>4</sup>Li ich'jo' ti iyac' li Juane,  
 ¿buch'u i'ac'bat yabetel ti jech la  
 spase? ¿Mi ja' Dios i'ac'bat, mi  
 crixchano no'ox i'ac'bat? —xut.

<sup>5</sup>Te lic yalulanbe sbaic:

—Mi chalcitic ti ja' i'ac'bat yabetel  
 yu'un li Diose, jech chijyalbutic:  
 “¿C'u cha'al muc bu xach'unic cha'a?”  
 xijyututic. <sup>6</sup>Mi icaltic ti i'ac'bat  
 yu'un crixchanoe, chijya'betic ton li  
 jchi'liltactique. Yu'un scotolic sch'unojic  
 ti ja' iyal sc'op Dios li Juane —xut sbaic.

<sup>7</sup>Jech laj yalbeic Jesús ti mu  
 sna'lic buch'u i'ac'bat yabetel li Juan  
 li laj yac' ta ich'el jo'e.

<sup>8</sup>Li Jesuse jech laj yalbe:  
 —Ja' jechun e'uc, muc bu  
 chacalbeic ti buch'u liyac'be ju'el ti  
 jech ta jpase —xi.

**Ja' lo'il sventa jchabiejts'usubtic ti  
 chopol li c'usi la spasique**  
 (Mt. 21.33–44; Mr. 12.1–11)

<sup>9</sup>Li Jesuse lic sc'opon li  
 jisraeletique, laj yalbe lo'il. Jech laj  
 yal:

—Oy jun vinic la sts'un ep ts'usub  
 ta yosil. La sa'be comel yajval  
 buch'utic ta schabiic li ts'usubtique.  
 Ibat ta nom li yajvale, te ijoc'tsaj.

<sup>10</sup>C'alal ista yora ta xta'aj li sat  
 ts'usube, la stac batel jun yajtunel  
 yu'un ba yich' talel li c'u ono'ox  
 yepal yaloj chich'e. C'ot sc'anbe  
 li buch'utic ta schabiique. Pero li  
 jchabiejts'usubtique la stsaquic li  
 yajtunel li yajval osile, la smajic.  
 Mu c'usi xac'beic ech'el. <sup>11</sup>Li  
 yajval li osile la stac batel yan  
 yajtunel nojtoc. Pero la smajic, laj  
 yilbajinic nojtoc. Mu jset'uc laj  
 yac'beic ech'el nojtoc. <sup>12</sup>Li yajval  
 li osile la stac batel yan yajtunel  
 nojtoc. Ja' yoxibal xa velta. Pero li  
 jchabiejts'usubtique la smajic nojtoc.  
 La syaintasic, la snutsic loq'uel.

<sup>13</sup>Li yajval li osile jech la  
 snop: “¿C'usi ta jnop? Ja' lec ta  
 jtac batel li jnich'on ti toj c'ux ta  
 co'one. Mi iyilic ti ja' jnich'one,  
 ja' to nan chaq'uc ta venta”, xi  
 ta yo'on. <sup>14</sup>Pero c'alal iyilic li  
 jchabiejts'usubtic ti ja' xa snich'on  
 li yajval osile, jech laj yalbe sbaic:  
 “Le'e ja' chich'be comel li yosil li  
 stote. Ja' lec ta jmiltic yo' jech  
 jo'otic chquich'getic o comel li  
 yosile”, xut sbaic. <sup>15</sup>La sloq'uesic

ta pat moc, te la smilic. C'alal ta sut talel li yajval ts'usubtique, èc'usi chjul spasbe xana'ic li jchabiejs'usubtique? <sup>16</sup>Chacalbeic, li jchabiejs'usubtique chlaj smilan. Yan xa o buch'utic ta xac'be schabiic li ts'usubtique —xi li Jesuse.

C'alal iya'llic jeche, jech laj yalic:  
—¿Mi jech nan chispasbutic li Diose? —xiic.

<sup>17</sup>Li Jesuse la sq'uelbe sat li crixchanoetique, jech laj yalte:  
—Nopic mi mu jechuc xloc' smelol ti jech ts'ibabil ta sc'op li Diose:

Jech chac c'u cha'al li yajval na  
ti la st'uj jp'ej ton sventa ta  
xac' ta chiquin nae,  
pero li svinictac ta va'anejnae  
mu sc'anic.

Li ton li la sp'ajique ja' ono'ox  
i'och ta chiquin na.

Ja' no'ox jech e'uc li buch'u  
t'ujbil yu'un li Diose, ac'o mi  
mu xc'anee,  
pero ta ono'ox x'ac'bat tsots  
yabtel,

xi ts'ibabil. <sup>18</sup>Li buch'utic chopol  
chiyilique ja' chopol chbatic o. Ta  
ono'ox xquich'be sc'opic. Mi ical ti  
ta ch'ayel ta xbatique, ta xch'ayic o  
sbatel osil —xi li Jesuse.

**Ja' sc'oplal ti la sjac'beic Jesús mi xu'  
ta stojbeic spatanic li Césare**

(Mt. 21.45–46; 22.15–22; Mr. 12.13–17)

<sup>19</sup>Li banquilal paleetique  
schi'uc li buch'utic sp'isoj sbaic ta  
jchanubtasvanej ta smantaltac li  
Diose, ta'ox stsaquic ta ora li Jesuse  
yu'un ijul ta sjolic ti ja' sc'oplalique.  
Pero muc buch'u itsacvanic yu'un  
ixi'ic o li schi'iltaquique.

<sup>20</sup>Ja' no'ox la smalaic mi oy c'u  
ora xocol li Jesuse. C'alal iyilic ti  
xocol xae, la staquic batel ta ora  
jayvo' li buch'utic jun yo'onic ta  
stojol Jesús yilele yu'un oy c'usi  
chba sjac'beic. Mi muc bu lec  
chtac'av li Jesuse, ja' te tstabeic  
o smul ti yalojique, jech xu' ta  
stsaquic, ta xiq'uic batel ta stojol  
li gobernadore. Te chc'ot stic'beic  
smul ti yalojique. <sup>21</sup>Jech la sjac'beic  
li Jesuse:

—Jchanubtasvanej, jna'ojcutic  
ti melel scotol li c'usi chavale, ti  
jamal chaval li c'usi tsc'an Dios  
ti ac'o jpascutique, ti mu t'ujbiluc  
chacha'le li buch'u chavalbee.

<sup>22</sup>Alo ca'icutic mi lec chil Dios ti ta  
jtojbecuteic jpatancutic li Césare, mi  
mo'oj —xutic.

<sup>23</sup>Li Jesuse sna'oj ti yu'un no'ox  
chq'uelbat yo'one, jech la stac'be:

<sup>24</sup>—Ac'becun quil junuc  
li taq'uin sventa ta jtojtic o  
jpatantique —xut.

Laj yac'beic. C'alal iyil li Jesuse,  
jech laj sjac'be:

—¿Buch'u sloc'ol li'i? ¿Buch'u sbi  
li'i? —x'utatic.

Itac'avic:

—Ja' César —xiic.

<sup>25</sup>I'albatic yu'un li Jesuse:

—Sc'an ta jpasbetic li yabtel ti  
chal li Césare yu'un ja' muc'ta  
ajvalil. Jech nojtoc sc'an ta  
jpasbetic li c'usi chal li Diose  
—x'utatic.

<sup>26</sup>Ac'o mi chac sa'beic smul Jesús  
li te ta stojol li schi'iltaquique pero  
muc bu stabeic smul. Toj ch'ayel  
no'ox yo'onic ti c'u sba itac'av li  
Jesuse, jech mu xa c'usi más la  
sjaq'uic.

**Ja' sc'oplad ti la sjaq'uic li  
jsaduceoetic ta sventa ti chcha'cuxiic  
li á animaetique**

(Mt. 22.23–33; Mr. 12.18–27)

**27** Ts'acal to italic ta stojol  
Jesús jayvo' jsaduceoetic e'uc,  
ja' li buch'utic ta xalic ti mu'yuc  
cha'cuxesele. Jech la sjac'beic li  
Jesus:

**28**—Jchanubtasvanej, jech la  
sts'iba comel li Moisese: “Mi icham  
jun vinic, mi mu'yuc snich'on  
ta xcome, li its'inal ti mu'yuc  
to yajnile, ja' ac'o yic'be yajnil  
li á anima sbanquile. C'alal ta xil  
sch'amale, ja' ac'o yac'be sbiinbe  
sbi li á anima sbanquile ja' yo' mu  
xch'ay o li sbi li á anima sbanquile”,  
xi li Moisese. **29** Oy jucvo' jchi'iltic  
ta israelal sbanquil yits'in no'ox  
sbaic. Li banquile la sa' yajnil,  
pero icham, mu'yuc snich'on  
icom. **30** Li its'inalaj yic'be yajnil  
li á anima sbanquile pero icham  
nojtoc. Mu'yuc snich'on icom e'uc.  
**31** Ja' jech la spasulan sjucva'alic.  
Xcholet sjucva'alic laj yiql'uiic li  
antse yu'un laj chamicuc. **32** Ts'acal  
to icham e'uc li antse. **33** C'alal ta  
xcha'cuxiique, ¿buch'u junucal ta  
xic' o li antse yu'un scotolic laj  
yic'ulanic? —xiic.

**34** Itac'av li Jesuse:

—Ti c'alal li' to oyic ta balumile  
xu' chnupunic li vinic antsetique.  
**35** Li buch'utic ta xcha'cuxiique,  
mu xa bu ta xnupunic. **36** Yu'un  
mu xa sna' xchamic e'uc jech chac  
c'u cha'al li ch'ul ángeletique.  
Snich'nab xa Dios o yu'un  
icha'cuxesatic xa yu'un li Diose.  
**37** Li Moisese iyal e'uc ti cuxulic

li buch'utic vo'one xa ichamique.  
Yu'un ja' la sts'ibabe comel sc'oplad  
li c'alal i'albat yu'un Dios li te yo'  
bu itil li jtec' biq'uit ch'ixe. Ac'o mi  
vo'one xa chamemic li Abrahame,  
schi'uc li Isaaque, schi'uc li Jacove,  
pero te to ch-albat sc'oplalic: “Jo'on  
Diosun yu'un li Abrahame, schi'uc  
li Isaaque, schi'uc li Jacove, xi li  
Diose”, xi li Moisese yu'un cuxulic.  
**38** Ti lajemicuc o schi'uc sch'ulelic  
jech chac c'u cha'al chavalique,  
mu'yuc Dios yu'unic ya'el. Li Diose  
ja' Dios yu'unic li buch'utic cuxulic  
o sbatel osile. Jech ich'bil o ta muc'  
sbatel osil li Diose —xi li Jesus:

**39** Li buch'utic itac'avique ja'ic  
jayvo' li buch'utic sp'isoj sbaic ta  
jchanubtasvanej ta smantaltac li  
Diose. Jech laj yalbeic li Jesus:  
—Jchanubtasvanej, toj lec li c'usi  
la avale —xutic.

**40** Yan li jsaduceoetique mu xa  
c'usi yan la sjac'beic li Jesus.

**Ja' sc'oplad ti ma'uc no'ox snitilul  
David li Cristoe yu'un “Cajval”, xi li  
Davide**

(Mt. 22.41–46; Mr. 12.35–37)

**41** Li Jesuse jech laj yal sc'oplad stuc:  
—¿C'u cha'al ta xalic ti ja' smitilul  
David li Cristo li t'ujbil yu'un Dios  
ti chventainvane? **42–43** Yu'un li  
Davide jech la sts'ibabe sc'oplad ta  
sjunal Salmose:

Li Cajvale jech i'albat yu'un li  
Diose:  
“Chachoti ta jbats'ic'ob, chapas  
mantal  
ja' to mi la jpas ta canal scotol  
la avajcontrataque”,  
x'utat li Cristoe, xi li Davide. **44** Li  
Davide “Cajval”, xut li buch'u t'ujbil

yu'un Dios ti chventainvane. ¿C'u cha'al "Cajval", xut mi ja' snitilul no'oxe? —xi li Jesuse.

**Ja' sc'oplal ti laj yal Jesús ti chopol li c'usi tspasic li buch'utic sp'isoj sbaic ta jchanubtasvanej ta smantaltac li Diose**

(Mt. 23.1–36; Mr. 12.38–40; Lc. 11.37–54)

**45** Scotol li j'israeletic li te tsobolique iya'iic ti c'alal jech laj yalbe yajchanbalajeltac li Jesuse:

**46** —Q'uelo me abaic yu'un chopol li c'usi tspasic li buch'utic sp'isoj sbaic ta jchanubtasvanej ta smantaltac li Diose. Ja' lec cha'iic ti nat sc'u'ic ta slapique. Lec cha'iic ti lequil c'oponbilic yu'un li jchi'iltactic li te ta ch'ivite. Lec cha'iic ti ta xchotiic li bu t'ujbil chotlebal ta ch'ulnaetic schi'uc li ta jujun q'uine. **47** Jech nojtoc ta slo'lobeic li c'ustic oy yu'un li me'anal antsetique. Ja' yu'un altic ti jal ta staic ta na'el li Diose. Ta ono'ox xich'ic tsots vocal —xi li Jesuse.

**Ja' sc'oplal ti laj yac'be smoton Dios jun me'anal ants**  
(Mr. 12.41–44)

**21** Li Jesuse te sq'ueloj li c'alal la stic'beic smoton Dios li ta scaxail li te ta muc'ta ch'ulna li jc'ulejetique. **2** Iyil nojtoc ti te ital jun me'anal ants ti mu c'usi oy yu'une. Ja' no'ox cha'sep cinco la stic'. **3** Li Jesuse jech laj yalbe li yajchanbalajeltaque:

—Melel chacalbeic, ja' más ep laj yac' li me'anal ants le'e. Ja' mu sta jech yepal laj yaq'uic li yanetic ta xil li Diose. **4** Yu'un naca scomenal

xa staq'uinic laj yaq'uic. Yan li me'anal antse laj yac' scotol li c'u yepal oy yu'un sventa ta to'ox sman o li c'ustic ta xtun yu'une —xi li Jesuse.

**Ja' sc'oplal ti laj yal Jesús ti che'ot sc'ac'alil chich' jinesel li muc'ta ch'ulnae**

(Mt. 24.1–2; Mr. 13.1–2)

**5** Oy jayvo'ic laj yalbeic Jesús ti toj c'upilic sba li stanal li muc'ta ch'ulna, schi'uc li c'ustic sloc'taojic li te snap'anojic ta c'al ch'ulna ti ja' la stojic li buch'utic ta sloq'uel yo'onic tsc'an chac'beic smoton li Diose.

**6** Li Jesuse jech laj yal:

—Li ch'ulna li'i ti toj c'upil sba ta xquilitic li avie, chc'ot sc'ac'alil ta xich' jinesel scotol. Mu jp'ejuc ton latsal chcom, scotol ta xich' jinesel —xut.

**Ja' sc'oplal li c'ustic chc'ot ta pasel li c'alal po'ot xa slajeb c'ac'ale**  
(Mt. 24.3–28; Mr. 13.3–23)

**7** Jech la sjac'beic li Jesuse:

—Jchanubtasvanej, ¿c'u ora chc'ot ta pasel ti chjinesat li muc'ta ch'ulna li la avale? ¿C'u sba chavac'be svinajeb ba'l ti yo' chquicutic o ti po'ot xa chc'ot ta pasale? —xutic.

**8** Li Jesuse itac'av:

—Q'uelo me abaic, mu me buch'u xaslo'loic. Yu'un oy ep buch'utic chalic ti ja' sbi li jbie, jech chalic: “Jo'on Cristoun ti t'ujbilun yu'un Dios ti chajventainique”, xiic. Oy yan jech chalic: “Ja' xa sc'ac'alil ta xtal li Cristoe”, xiic. Pero mu me xach'unic. **9** C'alal chava'iic ti oy

c'op li'i schi'uc c'alal chava'iic ti oy  
c'op ta nome, mu xaxi'ic. Ta ono'ox  
xc'ot ta pasel pero ma'uc to'ox  
slajeb c'ac'al —xi.

<sup>10</sup>Jech laj yal nojtoc:

—Chlic sa'ic c'op li crixchanoetic  
ta yantic o balumile. Chlic sa'ic c'op  
li ajvaliletic nojtoque. <sup>11</sup>Schi'uc oy  
bu tsots ch-ech' niquel ta balumil.  
Schi'uc oy bu tsots ch-ech' vi'nal  
schi'uc chamel. Chavilic ep senyail  
stsatsal sju'el Dios ta vinajel, ja' toj  
xi'elic sba.

<sup>12</sup>C'alal muc to'ox bu chc'ot ta  
pasele, chastesquic, chasmajic,  
chayaq'uc ta sc'ob li buch'utic oy  
yabetelic ta ch'ulnaetique, chasti'uc  
ta chuquel. Ta sventa ti avich'ojicun  
ta muq'ue, chayiq'uc batel ta stojol li  
ajvaliletique. <sup>13</sup>Ja' yu'un xu' xavalic  
li jc'op ta stojolique. <sup>14</sup>Na'ic me, mu  
me xal avo'onic li c'usi chavalique.  
<sup>15</sup>Yu'un jo'on chajcoltaic ta c'op.  
Chcac' ap'ijilic jech mu xaspasic ta  
canal li buch'utic chascontrainique.

<sup>16</sup>Oy atot ame'ic no'ox chayaq'uc  
ta c'abal, oy achi'iltaquic no'ox ta  
voq'uel chayaq'uc ta c'abal, oy  
avuts' avalalic no'ox chayaq'uc ta  
c'abal. Oy ja' no'ox chayaq'uc ta  
c'abal li buch'utic lec chac'opon aba  
achi'uquique. C'alal te xa oyoxuc ta  
sc'obique, oy no'ox buch'u chlaj ta  
miley avu'unic. <sup>17</sup>Ep buch'utic chopol  
chayilic ta sventa ti avich'ojicun ta  
muq'ue. <sup>18</sup>Pero ja' no'ox mi sc'an stuc  
Dios ti chasmilique, chasmilic. Mi mu  
jechuc ta sc'an li Diose, mu c'usi xu'  
chaspasbeic. <sup>19</sup>Li buch'utic chcuch  
yu'un scotol li vocole, mi mu schibajes  
yo'onique, ja' chcolic o sbatel osil.

<sup>20</sup>C'alal chavilic ti li' joyolic  
yajsoltarotac li yan ajaval ta spat

xocon smacol li jteclum ti pasbil  
ta tone, na'ic me ti yu'un ic'ot  
xa sc'ac'alil ti ta xich' jinesele.  
<sup>21</sup>Acotolic ti li' nacaloxuc ta Judea  
balumile, jatavanic batel ta anil  
ta vitstic. Li buch'utic li' oy ta yut  
jteclume ac'o loq'uicuc batel. Li  
buch'utic loq'uemic batele mu xa  
me xcha'ochic talel. <sup>22</sup>Yu'un ic'ot  
xa sc'ac'alil ti chavich'ic vocal jech  
chac c'u cha'al ts'ibabil ono'ox  
comel yu'un li buch'utic iyalic sc'op  
Dios ta vo'onee. <sup>23</sup>Toj abol sbaic  
li buch'utic schi'uc yolique schi'uc  
li buch'utic ta to xchu'un yolique  
yu'un toj tsots chavich'ic vocal  
yu'un li Diose. <sup>24</sup>Oy no'ox buch'u  
avu'unic chamileic ta machita. Oy  
no'ox buch'u avu'unic chachueic,  
cha'lq'ueic batel ta yosilal jyanlum  
crixchanoetic. Jech lach'ayic o,  
jo'oxuc ti li' to'ox nacaloxuc ta  
jteclume Jerusalene. Li jyanlum  
crixchanoetique i'och xa ta sbaic li  
jteclume, ja' xa ti c'usi tspasbeique.  
Ja' to mi its'aqui li c'u sjgil ta  
x'ac'bat yich'ic ta venta yu'un li  
Diose, ja' to chjeltaj yajval.

**Ja' sc'opla! li c'u sba ta xcha'tal li  
Cajvaltique**

(Mt. 24.29–35, 42–44; Mr. 13.24–37)

<sup>25</sup>Li c'alal po'ot xa'ox chicha'tale,  
oy c'usi ta xvinaj ta vinajel ti toj  
xi'el sba, toj labal sbae. Yu'un  
ta xc'ataj li c'ac'ale, schi'uc li ue,  
schi'uc li c'analetique. Jech nojtoc  
ta xjeltaj li c'u sba ta xnic li nabe.  
Más to tsots ta xyuq'uilan sba jech  
ta xi'ic o li crixchanoetic ta sp'ejel  
balumile. <sup>26</sup>Li crixchanoetique  
mu'yuc xa stsatsal yo'onic ta scoj  
li xi'ele yu'un ta xi'ic mi oy c'usi ta

xc'ot ta pasel li' ta balumile. Yu'un scotol li c'ustic te oy ta vinajele chlaj nicuc scotol. <sup>27</sup> Ja' xa o ta xilic scotol li crixchanoetique ti chiyal talel ta toc ta vinajel schi'uc jtsatsal schi'uc ju'el, jo'on li co'ol crixchanoutique. <sup>28</sup> C'alal chavilic chlic c'otuc ta pasel scotol li c'ustic laj calboxuque, muybajanic no'ox me yu'un xana'ic ti po'ot xa chacolic o sbatel osile —xut li yajchanbalajeltac li Jesuse.

<sup>29</sup> Laj yalbe yan lo'il nojtoc:  
—Na'ic me li c'u sba ta xch'i li te'el higo schi'uc scotol li yan te'etique. <sup>30</sup> C'alal ta x'unenaje, ja' chana'ic o ti po'ot xa yora jo'tique.  
<sup>31</sup> Ja' no'ox jech li c'alal chavilic ti chc'ot ta pasel scotol li c'usi laj cale, ja' chana'ic o ti po'ot xa sc'ac'alil chistacun talel li Diose yo' chtal jpas mantal li' ta balumile.

<sup>32</sup> Melel chacalbeic, li buch'utic iya'iic li c'u sba chlic li tsots vocal li laj calboxuc li'i, oy to'ox cuxuloxuc li c'alal chlique. <sup>33</sup> Li c'ustic caloje mu xch'ay sc'opla, ta ono'ox xc'ot ta pasel scotol. Ja' xlaj to li vinajel balumile.

<sup>34-35</sup> Q'uelo me abaic, ma'uc noj me batem ta avo'onic li c'ustic oy li' ta balumile, schi'uc li c'ustic chac'an atuquique, schi'uc li c'u sba chacuxiic li' ta balumile. Mi yu'un ja' no'ox te batem o avo'onique, ch'ayem avo'onic chjul jtaoxuc li c'alal chicha'tale. Jech chac c'u cha'al jcot ts'i! ti mu sq'uel li bu ta x'ech'e, c'alal ta xa'ie ochem ta pets!, ja' no'ox jech e'uc li crixchanoetique, mu sna'ic c'u ora ta xtal li ich' vocal ta sp'ejel balumile. <sup>36</sup> Pero li jo'oxuque vic'luc

me asatic, taic ta na'el Dios scotol c'ac'al ti ac'o cuchuc avu'unic li vocal li ta xtale. Ja' mu'yuc amulic chac'otic ta jtojol, jo'on li co'ol crixchanoutique —xi li Jesuse.

<sup>37</sup> Li Jesuse ta c'ac'altic te ichanubtasvan ta yamaq'uil li muc'ta ch'ulna li te ta Jerusalene. Yan li ta jujun ac'ubale iloc' batel, te ba vayuc ta vits Olivatic.  
<sup>38</sup> Ta jujun sob italic scotol li crixchanoetic li te ta yamaq'uil li muc'ta ch'ulnae, yu'un cha'ibeic sc'op li Jesuse.

**Ja' sc'opla ti la spas trato Judas ti chac' ta c'abal li Jesuse**  
(Mt. 26.1-5, 14-16; Mr. 14.1-2, 10-11; Jn. 11.45-53)

**22** Po'ot xa'ox q'uin yu'un li j'israelétique c'alal ta sve'ic pan ti muc bu yich'oj svochesobile. Ja' q'uin Coltael sbi. <sup>2</sup> Li banquilal paleetique schi'uc li buch'utic sp'isoj sbaic ta jchanubtasvanej ta smantaltac li Diose, la snopic li c'u sba xu' tsmilic li Jesuse yu'un ta xi'ic o li ta schi'iltaquique mi x'ac'batic ton, yu'un scotolic lec iyilic li c'ustic tspas li Jesuse.

<sup>3</sup> Li Satanase, ja' li banquilal pucuje, i'och ta yo'on li Judase, ja' li Iscariote i'ac'bat yan sbie. Ja' jun li lajchavo' yajchanbalajeltac li Jesuse. <sup>4</sup> Li Judase ba sc'opon li banquilal paleetique schi'uc li banquilal mayoletic ti schabiojic li smuc'ta ch'ulnaic li te ta Jerusalene. Ja' ba yalbe ya'iic ti ta spas trato ti chac' ta c'abal li Jesuse. <sup>5</sup> C'alal iya'iique, xmuybajic tajmec. Laj yalic c'u yepal taq'uin ta xac'beic li Judase. <sup>6</sup> C'alal iya'i Judas li c'u

yepal taq'uin ta x'ac'bate, xmuyabaj xa. Isnop c'u ora xu' chac' ta c'abal li Jesuse yo' ja' mu xllic o c'op yu'unic li schi'iltac ta israelale.

**Ja' sc'oplal li sna'obil ti icham ta jcojtic li Cajvaltique**

(Mt. 26.17-29; Mr. 14.12-25;

Jn. 13.21-30; 1 Co. 11.23-26)

<sup>7</sup>Ista sc'ac'alil ta sve'ic pan ti muc bu yich'oj svochesobile, schi'uc ta slajesic li cheixel chijetic ta sventa q'uin Coltael jech chac c'u cha'al yaloj ono'ox li Diose. <sup>8</sup>Li Jesuse la stac batel Pedro schi'uc li Juane. Jech laj yalbe batel:

—Batanic, ba meltsanic li cheixel chij li ta jti'tic ta sventa li q'uin Coltaele —xut.

<sup>9</sup>Jech laj sjaq'uic:

—¿Bu chac'an chba jmeltsancutic?  
—xutic.

<sup>10</sup>Itac'av li Jesuse:

—Chacalbeic. C'alal cha'ochic ta Jerusalene, te chanupic ta be jun vinic scuchoj jp'ej q'uib ya'al. Ja' te tijil xabatic, te xa'ochic e'uc li ta na li bu ta x'oce. <sup>11</sup>Jech xc'ot avalbeic li yajval nae: “Jech laj yal talel li Jchanubtasvaneje: ¿Bu jc'olucal ana li yo' bu ta jti'cutic chij ta sventa q'uin Coltael jchi'uc li cajchanbalajeltaque? xi laj yal talel”, utic c'otel. <sup>12</sup>Te chac' avilic jc'ol sna ta scha'cojol sna ti lec jamal yute. Te xa schapanoj li c'ustic ta xtun cu'untique. Ja' te xameltsanic li chije —xut.

<sup>13</sup>Ibatic li cha'vo'i que. Ja' jech istaic jech chac c'u cha'al i'albatic batel yu'un li Jesuse. Ja' te la smeltsanic li chij sventa li q'uin Coltaele.

<sup>14</sup>C'alal yora xa chve'i que, ital li Jesuse. Te ichoti ta mexa schi'uc li yajchanbalajeltaque. <sup>15</sup>Li Jesuse jech lic yalbe li yajchanbalajeltaque:

—Ta sloq'uel co'on li' chajch'iinic ta slajesel li chij ta sventa li q'uin Coltael li c'alal muc to'ox bu smilojicune. <sup>16</sup>Chacalbeic ti ja' to ta jlajes nojtoc li chije ti c'alal te xa tsobolutic jcotoltic li yo' bu ta jpas mantal yu'un li Diose —xi li Jesuse.

<sup>17</sup>Li Jesuse la stsac jun vaso ya'llel ts'usub, laj yalbe coliyal Dios. Jech laj yalbe li yajchanbalajeltaque:

—Ilo, uch'anic acotolic.

<sup>18</sup>Chacalbeic ti ja' to chchuch' nojtoc li ya'llel ts'usube ti c'alal te xa tsobolutic jcotoltic li yo' bu ta jpas mantal yu'un li Diose —xi.

<sup>19</sup>La stam nojtoc jp'ej pan, laj yalbe coliyal Dios, la xut li pane, laj yac'be li yajchanbalajeltaque. Jech laj yalbe:

—Li'i ja' jbec'tal yu'un chcac' jba ta milel ta acojic. Jech me xapasulanic yo' jech chana'ic o ti jo'oxuc ta acojic ti lichame —xut.

<sup>20</sup>C'alal ilaj yo'onic ta ve'ele, la stsac nojtoc li vasoe, jech laj yalbe li yajchanbalajeltaque:

—Li ya'llel ts'usub li li' chavuch'i que, ja' svinajeb ti mu xlaj sc'oplal ti c'usi yaloj ono'ox li Jtot ti ta sventa jch'ich'el ta j'ech'el ta xch'ay o la amulique. Yu'un jtuc chcac' jba ta milel, ta jmal jch'ich'el, ja' jech ta xtoj o la amulique. Ja' yu'un mu xa c'usi chavaq'uic ta stojol li Diose. <sup>21</sup>Chacalbeic, li buch'u chiyac' ta c'abale, ja' li' co'ol oyutic ta mexa jchi'uctique. <sup>22</sup>Yu'un jech ono'ox yaloj Dios ti chismilique, jo'on li co'ol crixchanoutique. Pero toj abol sba li buch'u chiyac' ta c'abale —xi li Jesuse.

**23**Li yajchanbalajeltaque lic sjac'be sbaic buch'u junucal yu'unic ti ta xac' ta c'abal li Jesuse.

**Ja' sc'oplad “¿buch'u chcom ta más banquilar cu'untic?” xut sbaic li yajchanbalajeltac li Jesuse**  
(Mt. 20.25–28; Mr. 10.42–45)

**24**Li yajchanbalajeltac li Jesuse la svulilan sbaic ta sventa buch'u chcom ta más banquilar yu'unic.

**25**Li Jesuse jech lic yalbe:

—Li ajvaliletic yu'un li jyanlum crixchanoetique ja' no'ox ta spasic mantal. Tstoy sbaic ta stojol ti svinictaquique. Ac'o mi jech tspasic, pero ta sc'anic “lec ta xc'uxubinvanic le'e”, tsc'anic ti xi sc'oplalique. **26**Pero li jo'oxuque mu me xapasic jech. Li buch'u junucal avu'unic ti tsc'an chcom ta banquilar avu'unique, ti tsc'an ich'bil ta muq'ue, ac'o sbic'tajes sba ta atojolic, ac'o tunuc avu'unic. **27**Nopic li c'u sba li buch'u banquilaetic li' ta balumile ti naca no'ox tspasic mantale, muc bu ch-abtejic. Yan li jo'one mu jechuc ta jpas. Yu'un jo'on tal tuncun avu'unic li' ta balumile.

**28**Li jo'oxuque jun avo'onic la achi'inicun li c'alal laj quich'ulan contrainele. **29–30**Ja' yu'un chacac'be avabtelic. Yu'un laj xa yac'bun cabtel li Jtotique ta xc'ot sc'ac'alil ta jpas mantal. Ja' yu'un ta jchil'in jbatic ta pasmantal. Muybajanic no'ox c'alal chc'ot sc'ac'alile —xi li Jesuse.

**Ja' sc'oplad ti i'albat yu'un**  
**Jesús li Pedro: “Chaval ti mu xavojtaquinune”, x'utat**  
(Mt. 26.31–35; Mr. 14.27–31; Jn. 13.36–38)

**31**Li Cajvaltique jech laj yalbe li Simone:

—Simón, a'io, li Satanase a xa sc'an ta stojol Dios ti ta sq'uelboxuc avo'onic li avie. Yu'un ta sc'an ti ac'o chibajuc avo'onique. **32**Pero li jo'ote laj xa jc'oponbot Dios yo' jech mu xchibaj o avo'on. C'alal chlic asutes avo'on nojtoque, tsatsubtasbo yo'onic li buch'utic co'ol chavich'icun ta muq'ue —xut.

**33**Li Pedroe jech laj yal:

—Cajval, ac'o mi chistiq'uic ta chuquel, ac'o mi chismilic, li jo'one muc bu chaquicta —xut.

**34**Itac'av li Jesuse:

—Pedro, chacalbe, tana c'alal muc to'ox bu oq'uem jcotse, oxib xa'ox velta avaloj ti mu xavojtaquinune —xut.

**Ja' sc'oplad ti i'albat li**  
**yajchanbalajeltac Jesús li c'u sba xu' chcuch yu'unic li contrainele**

**35**Li Jesuse jech lic yalbe scotolic: —C'alal la jtacoxuc batel ta yael li jc'ope, mu'yuc ataq'uinic, mu'yuc ave'elic, mu'yuc axonobic batel. ¿Mi oy c'usi muc xataic? —xut.

Itac'avic:

—Mo'oj, la jtacutic scotol —xiic.

**36**Li Jesuse jech laj yalbe:

—Jech chac c'u cha'al soltaroetic ti ta schapan sbaic lec yu'un ta sc'an ta spasvanic ta canal ta c'ope, ta xich' batel staq'uinic schi'uc sve'elic. Mi mu'yuc smachitae, ta schon spuychijic yo' ta sman o li smachitae. Ja' no'ox jech e'uc li jo'oxuc li avie, ja' sc'an ti chach'unic ti chascoltaic li Diose jech chcuch avu'unic li c'alal chavich'ic contrainele. **37**Yu'un persa ta xc'ot ta pasel scotol ti jech ono'ox ts'ibabil jc'oplale: “Ta sp'ise

ta jpasmulil”, xi ono’ox ts’ibabil — xi li Jesuse.

<sup>38</sup>Li yajchanbalajeltaque jech lic yalic:

—Cajval, li’ oy chib machitae —xutic.

Itac’av li Cajvaltique:

—Teque! —xi. (Ti jech itac’av li Cajvaltique, yu’un iya’i ti muc bu xa’lbeic smelol li c’usi laj yale.)

**Ja’ sc’oplal ti ba sta ta na’el Dios ta Getsemaní li Jesuse**

(Mt. 26.36–46; Mr. 14.32–42)

<sup>39</sup>Iloc’ batel li Jesuse, ibat ta vits Olivatic yu’un te ono’ox ta xc’otilan. Ichi’ine batel yu’un li yajchanbalajeltaque. <sup>40</sup>C’alal ic’otique, li Jesuse jech laj yalbe li yajchanbalajeltaque:

—Taic ta na’el Dios yo’ jech mu xaspasic ta canal li pucuje —xut.

<sup>41</sup>Li Jesuse ijelav batel jutuc.

Ja’ jech snamal ibat jech chac c’u cha’al snamal chc’ot xijtenobaj ta tone. Te la squejan sba, la sta ta na’el Dios. <sup>42</sup>Jech laj yal:

—Tata, ti jech la xac’an ti mu xichame, lec chca’i. Pero ma’uc me xc’ot ta pasel li c’usi ta jc’an jtuque. Ja’ ac’o jpas li c’usi chac’an atuque —xi.

<sup>43</sup>Li Jesuse iyil jun ch’ul ángel tacbil talel. Tal ac’batuc stsatsal sbec’tal stacupal li Jesuse. <sup>44</sup>Yu’un mu xa xcuch cha’i li svocole ja’ yu’un ep ista ta na’el Dios. Ep ichiq’uin. Li schiq’ue ja’ jech chac c’u cha’al ch’ich’ xp’ajlajet iloc’.

<sup>45</sup>C’alal ilaj yo’on ta stael ta na’el li Diose, isut talel li yo’ bu oyic li yajchanbalajeltaque. Vayalic c’ot sta yu’un toj ech’em chat yo’onic.

<sup>46</sup>Jech c’ot yalbe:

—¿C’u cha’al chavayic? Ja’ lec licanic, taic ta na’el Dios yo’ jech mu xaspasic ta canal li pucuje —xut.

**Ja’ sc’oplal ti la stsaquic li Jesuse**

(Mt. 26.47–56; Mr. 14.43–50; Jn. 18.2–11)

<sup>47</sup>C’alal ja’ o yacal ta lo’il li Jesuse, ital ep crixchanoetic. Ja’ sbabe talel li Judase, ja’ li yajchanbalajel to’ox li Jesuse. Li Judase te ic’ot li yo’ bu oy li Jesuse, c’ot sts’uts’un li Jesuse. <sup>48</sup>Li Jesuse jech laj yal:

—Judas, mu junuc avo’on ta jtojol ti chats’uts’unune, ja’ no’ox ta sventa li c’u sba chavac’un o ta c’abal, jo’on li co’ol crixchanoutique —xut.

<sup>49</sup>C’alal iyilic li yajchanbalajeltac Jesús ti ja’ tal stsaquic li Jesuse, jech lic yalbeic li Jesuse:

—Cajval, mi chac’ane, chcac’becutic machita —xiic.

<sup>50</sup>Oy jun buch’u la sloq’ues smachita. La sjaxbe ta bojel jun schiquin li yajtunel li más banquilal palee. Li schiquin li iboj loq’uele ja’ sbats’ichiquin. <sup>51</sup>Li Jesuse jech laj yalbe li yajchanbalajeltaque:

—Mu me xapajesic li crixchanoetique. Ac’o spasbecun li c’usi ta sc’anique —xut.

Li Jesuse la spicbe li syaijemal schiquin li jtunele, lec xa icom schiquin. <sup>52</sup>Li Jesuse jech laj yalbe li jchucvanejetique, ja’ li banquilal paleetique, schi’uc li banquilal mayoletic ti schabiojic li smuc’ta ch’ulnaique, schi’uc li j’abteletique:

—¿C’u cha’al tal atsaquicun jech chac c’u cha’al jun j’elec’, ts’aclomoxuc xa talel ta amachitaic, ta ate’ic? <sup>53</sup>Yu’un scotol c’ac’al te

oyun ta atojolic ta yamaq'uil li muc'ta ch'ulnae. ¿C'u cha'al mu teuc no'ox la atsaquicun? Ti jech la atsaquicune, yu'un i'ac'bat yu'un Dios la avajvalique, ja' li Satanás li sventainoj li mulile —xut li jchucvanejetique.

**Ja' sc'opla ti laj yal li Pedro ti mu xojtaquin li Jesuse**

(Mt. 26.57–58, 69–75; Mr. 14.53–54, 66–72; Jn. 18.12–18, 25–27)

<sup>54</sup>C'alal la stsaquic li Jesuse, laj yiq'uic batel ta sna li más banquilar palee. Li Pedroe nomnom tijil batel ta spat li Jesuse. <sup>55</sup>Te la snop'ic c'oc' ta yamaq'uil sna li más banquilar palee yu'un ta xc'atinic. Te ichotiiic ta ti' c'oc'. Li Pedroe te la schi'in ta chotlej li yanetique. <sup>56</sup>Oy jun criara iyil ti te chotol ta xc'atin li Pedroe. Yu'un lec tilem li c'oq'ue ja' yu'un i'ilie. La sq'uelbe lec sat, jech lic yal:  
—Li'i ja' schi'il sbaic schi'uc li buch'u le' tsacibile —xi.

<sup>57</sup>Li Pedroe laj yal ti mu xojtaquine. Jech laj yal:  
—Mu xcojtaquin li vinic chavale, yaa —xut.

<sup>58</sup>Ta jliquel te i'ojaquine yu'un yan nojtoc. Jech i'albat:  
—Jo'ote ja' achi'il e'uc li vinic le'e —x'utat.

Itac'av li Pedroe:

—Tata, mu jo'cun —xut.

<sup>59</sup>Oy xa'ox nan ta jun ora oy buch'u yan jech i'albat sc'opla li Pedroe:

—Ta melel ja' schi'il li Jesuse yu'un ja' te liquem talel ta Galilea e'uc —xi.

<sup>60</sup>Itac'av li Pedroe:

—Tata, mu jna' li c'usi chavale —xi.

Ja' o i'oc' jcots. <sup>61</sup>Li Jesuse la sq'uelbe sat li Pedroe. Ijul ta sjol li Pedroe ti jech ono'ox i'albat yu'un li Cajvaltique: “C'alal muc to'ox bu oq'uem jcotse, oxib xa'ox velta avaloj ti mu xavojtaquinune”, x'ute ono'ox yu'un li Jesuse. <sup>62</sup>Iloc' batel li Pedroe, toj ech'em laj yoq'uita sba.

**Ja' sc'opla ti ina'leat li Jesuse**

(Mt. 26.67–68; Mr. 14.65)

<sup>63</sup>Li jayvo' li i'ac'bat schabiic li Jesuse lic sna'leic, la smajic. <sup>64</sup>La smacbeic sat ta poc'. La sleg'beic ta majel xocon sat, jech laj yalbeic:  
—Alo buch'u li la smajote —xutic.

<sup>65</sup>Ep la slabanic. Ep c'usi chopol laj yalbeic.

**Ja' se'opla ti laj yiq'uic batel Jesús ta stojol li j'abteletic yu'unic li j'israeletique**

(Mt. 26.59–66; Mr. 14.55–64; Jn. 18.19–24)

<sup>66</sup>C'alal isacub osile, la stsob sbaic scitol li j'abteletic yu'unic li j'israeletique, ja' li banquilar paleetique schi'uc li buch'utic sp'isoj sbaic ta jchanubtavanej ta smantaltac li Diose. Laj yiq'uic batel Jesús li bu ta stsob sbaique. Jech laj yalbeic:

<sup>67</sup>—Albuncutic ta jamal mi jo'ot Cristoot ti t'ujbilot yu'un Dios ti chaventainuncutique —xutic.

Itac'av li Jesuse:

—Mi chacalbeic ti jo'on li Cristoune, mu xach'unic. <sup>68</sup>Mi oy c'usi chajac'beique, mu xatac'avic.

<sup>69</sup>Jo'on li co'ol crixchanoutique ista xa sc'ac'alil ti chba chotlucun ta sbats'ic'ob li Diose. Ja' te chlic jpas mantal —xut.

**7<sup>0</sup>**Scotolic jech laj yalic:  
—¿Mi jo'ot Snich'onot Dios ap'isoj  
aba? —xutic.  
—Jo'on —xi li Jesuse.  
**7<sup>1</sup>**Jech laj yalbe sbaic:  
—¿C'u cha'l ta jsa'tic yan  
textico? Laj xa ca'itic ti ta stoy sba  
ta stojol li Diose —xut sbaic.

**Ja' sc'oplal ti ba yac'beic ta sc'ob Pilato  
li Jesuse**

(Mt. 27.1–2, 11–14; Mr. 15.1–5; Jn. 18.28–38)

**23** Ilic scotolic, laj yiq'uic batel  
ta stojol Pilato li Jesuse. **2<sup>Te</sup>** lic stic'beic smul. Jech laj yalic:  
—Li vinic li'i ta xal ti mu xu' ta  
xcac'becuteic jpatancutic li muc'ta  
ajvalil Césare, yu'un ta xal ti ja' ajvalil  
stuque. Ta xal ti ja' t'ujbil yu'un Dios  
ti chisventainuncutique. Ta stsob  
svinictac yu'un ta sc'an ta sliques c'op  
li' ta cosilalcutique —xiic.

**3<sup>Li</sup>** Pilatoe la sjac'be li Jesuse:  
—¿Mi jo'ot ajvalilot yu'un la  
achi'iltaq ta israelale? —xut.  
Itac'av li Jesuse:  
—Jo'on —xi.  
**4<sup>Li</sup>** Pilatoe jech lic yalbe li  
banquilar paleetique schi'uc scotol  
li crixchanoetique:  
—Muc bu la jtabe smul li vinic  
li'i —xi.

**5<sup>Jech</sup>** tsots lic c'opojoicuc nojtoc:  
—Mu me xacolta batel yu'un ja' ta soc  
li jchi'iltacutique. Ta xchanubtasvan  
ta scotol cosilalcutic li' ta Judeae. Ta  
sliquebe te ichanubtasvan ta Galilea.  
Li avie li' xa itale —xiic.

**Ja' sc'oplal ti laj yiq'uic batel  
ta stojol Herodes li Jesuse**

**6<sup>C'alal</sup>** iya'i Pilato ti ja' ba'i te lic  
chanubtasvanuc ta Galilea li Jesuse,

la sjac'be li crixchanoetic mi ja' te  
liquem talel ta Galileae. **7<sup>C'alal</sup>**  
iya'i ti te liquem talel ta Galilea li  
Jesuse, ijul ta sjol Pilato ti ja' ich'bil  
ta venta yu'un li ajvalil Herodese.  
Ja' yu'un la stac batel li yo' bu oy li  
Herodese yu'un te talem ta paxyal  
ta Jerusalén. **8<sup>C'alal</sup>** iyil Jesús li  
Herodese, xmuybaj xa. Yu'un vo'one  
caj chac yojtaquin yu'un ya'iojbe  
sc'oplal ti oy c'ustic tspas li Jesuse.  
“Ti oy la bu chquil ti c'u sba chac'  
ta ilel stsatsal sju'el li Jesuse”, xi  
ono'ox ta yo'on li Herodese. **9<sup>Li</sup>**  
Herodese lic sjac'ulanbe li c'u sba  
xu' yu'un chac' ta ilel li stsatsal  
sju'ele. Li Jesuse mu jp'eluc bu itac'av.  
**10<sup>Te</sup>** oyic li banquilar paleetique  
schi'uc li buch'utic sp'isoj sbaic ta  
jchanubtasvanej ta smantaltac li  
Diose. Soquem sjolic ta stojol li Jesuse.  
Ta sloq'uel yo'onic la stic'beic smul  
ta stojol li Herodese. **11<sup>Li</sup>** Herodese  
schi'uc li yajsoltarotaque muc bu  
xich'ic ta muc' li Jesuse. Ja' no'ox la  
slabanic, la slapbeic natil c'u'il sventa  
ajvaliletic. Ts'acal to la staquic sutel  
ta stojol li Pilatoe, te slapoj batel li  
c'u'ile. **12<sup>Li</sup>** Pilatoe scontrainoj sbaic  
to'lox schi'uc li Herodese, pero c'alal  
la stac batel ta stojol Herodes li  
Jesuse, te ilaj o yo'onic.

**Ja' sc'oplal ti imeltsaj sc'oplal ti  
chmile li Jesuse**

(Mt. 27.15–26; Mr. 15.6–15; Jn. 18.39–19.16)

**13<sup>Li</sup>** Pilatoe laj yic'an talel scotol  
li banquilar paleetique, schi'uc li  
j'abteletic yu'unic li j'israeletic,  
schi'uc scotol li crixchanoetique.  
**14<sup>Jech</sup>** laj yalbe:  
—La achi'ilic li'i la avalic ti ja' ta  
soc scotol la achi'iltaquique, ja'

yu'un la aviql' uic talel li' ta jtojole. Pero laj xa quich'be sc'op li' ta atojolique. Mu jset'uc la jtabe smul. Mu meleluc li c'usi la avalique.

**15** Jech nojtoc li Herodese muc bu stabe smul e'uc. Ti lauc stabe smule, muc bu stac sutel li' ta jtojol ti jechuque. Jech mu'yuc smul ti chavaq'l uic ta milele. **16** Ja' no'ox chcal ti ac'o yich' tsitsele, ta jcolta batel —xi.

**17** Li Pilatoe ta persa ta scolta batel jun jchuquel ta jujun q'unin Coltael li bu junucal tsc'anbeic scodel li j'israelaetique. **18** Jech scotol li crixchanoetique tsots lic c'opojicuc:

—Le'e ac'o ba yich' joc'anel ta cruz. Ja' ac'o coluc li Barrabase —xiic.

**19** (Li Barrabase itiq'ue ta chuquel ta scoj ti la stsob svinictac yu'un la scontrain li ajvalil li te ta Jerusalene, schi'uc imilvan nojtoc. Ja' j'israelal vinic.) **20** Li Pilatoe la scha'c'opon li j'israelaetique yu'un chac scolta batel li Jesuse. **21** Tsots lic c'opojicuc nojtoc li crixchanoetique:

—iJoc'ano ta cruz! iJoc'ano ta cruz! —xiic tajmec.

**22** Li Pilatoe jech la scha'jac'be yoxibal velta li crixchanoetique:

—Pero ¿c'usí smul avu'unic? Li jo'one muc bu jtabe smul ti ta xmilee. Ja' no'ox chcal ti ac'o yich' tsitsel ta nucule, ta jcolta batel —xut.

**23** Pero más to tsots ic'opoic:

—iJoc'ano ta cruz! —xiic.

C'alal jech la sujic Pilato li crixchanoetique schi'uc li banquilar paleetic yu'unique, ich'unbatic li

c'usi iyalique. **24** Li Pilatoe laj yal mantal ti ac'o ba joc'anatuc ta cruz li Jesuse yu'un jech la sc'anic li crixchanoetique. **25** Ja' la scolta batel li buch'u la sc'anbeic scolele, ja' li itiq'ue ta chuquel ta scoj ti la stsob svinictac yu'un la scontrain li ajvalile, schi'uc ti imilvan nojtoque. Li Pilatoe laj yac' ta c'abal li Jesuse yo' ac'o spasbeic li c'usi ta sc'anique.

**Ja' sc'oplal ti ijoc'anat ta cruz li Jesuse**

(Mt. 27.32–44; Mr. 15.21–32; Jn. 19.17–27)

**26** Li soltaraoetique laj yiq'uiic batel li Jesuse. C'alal sq'uechoj xa batel scrusal li Jesuse, te la snupic ta be jun j'israelal vinic, Simón sbi. Cirene sbi li slumale. Te ta x'och batel ta Jerusalén. La stsaquic, iyac'beic ech'el sq'uechbeel scrusal li Jesuse. Ja' sbabe batel li Jesuse, ja' tijil batel li Simone.

**27** Oy ep viniquetic schi'uc ep antsetic la schi'inic batel li Jesuse. Li antsetique toj ech'em laj yoq'uitaic li Jesuse. Toj ech'em iyat yo'onic. **28** Li Jesuse la sc'opon:

—Antsetic, jo'oxuc li li' nacaloxuc ta Jerusalene, mu me xavoq'uitaicun. Oq'uita aba atuquic schi'uc oq'uitaic la avalabique.

**29** Yu'un ta xc'ot sc'ac'alil ta xtal ich' vocol. Jech chavalic: “Ja' lec li buch'utic mu ono'ox sna' x'alajique yu'un mu sta jech chich'ic vocol jech chac c'u cha'al chquich'tic, jo'otic ti oy coltique”, xachiic. **30** Jo'oxuc li li' oyoxuc ta Jerusalene jech chlic avalic: “Ti oy la c'uxi jinuc talel li vitse ti ac'o snet'utique”, xachiic yu'un toj

tsots li ich' vocol chtale. <sup>31</sup>Li jo'one ta jch'un scotol li c'ustic yaloj li Diose pero ep chiyac'beic quich' vocol. Li jo'oxuc li mu xach'unic li c'ustic yaloj li Diose, ic'uxi ta xcuch avu'unic li vocol ta xtal ta atojolique! —xi li Jesuse.

<sup>32</sup>Oy cha'vo' j'israelal viniquetic i'iq'ueic batel e'uc ti tsots smulique, co'ol ba yich'lic joc'anel ta cruz schi'uc li Jesuse. <sup>33</sup>C'alal ic'otic li yo' bu Baquil Jolil sbi li balumile, te la sjoc'anic ta cruz li Jesuse schi'uc li cha'vo' viniquetic ti tsots smulique. Jun cruz ta sbats'ic'ob, jun ta sts'etc'ob li scruzal li Jesuse. <sup>34</sup>Li Jesuse lic sc'oponbe Dios li crizchanoetique:

—Tata, pasanbo perton yu'un mu sna'ic li c'usi tspasique —xi.

Li soltaroetique la spasic canal tajimol yo' jech chilic bu jlicucal li sc'u' spac'altac Jesús ti ta xich'beic jujunique. <sup>35</sup>Li crizchanoetic li te va'alic ta xq'uelvanique, la sna'leic li Jesuse. Te va'alic e'uc li jmeltsanejc'opetique, la sna'leic e'uc li Jesuse. Jech laj yalic:

—La scoltaan li crizchanoetique. Mi melel ti t'ujbil yu'un Dios ti chisventainutique, ac'o scolta sba stuc —xiic.

<sup>36</sup>Li soltaroetique ti naca jromail viniquetique ilabanvanic e'uc. Inopojic talel, laj yac'beic yuch' pajal ya'lel ts'usub li Jesuse. <sup>37</sup>Jech laj yalbeic:

—Mi melel ti jo'ot muc'ta ajvalilot yu'un la achi'ilta ta israelale, colta aba atuc —xutic.

<sup>38</sup>Oy jpech te' te bajbil ta sjol scruzal li Jesuse ts'ibabil ta griego c'op, schi'uc ta latin c'op, schi'uc

ta hebreo c'op. Jech chal: “Li'li ja' li muc'ta ajvalil yu'un li j'israelaetique”, xi ts'ibabil li ta te'e.

<sup>39</sup>Li viniquetic ti tsots smulic li te co'ol joc'olic ta cruz schi'uc li Jesuse, jun la stoy sba ta stojol li Jesuse, jech laj yal:

—Mi melel ti jo'ot Cristoot ti t'ujbilot yu'un Dios ti chaventainuncutique, colta aba atuc. Jech coltauncutic e'uc —xut.

<sup>40</sup>Li june la spajes li schi'ile, jech laj yalbe:

—¿Mi mu xaxi' li Dios ti chatoy aba ta stojol li vinic li li' co'ol chijmileutique? <sup>41</sup>Li jo'otique oy jmultic ja' yu'un ta xquich'tic vocol. Yu'un ja' chij'ac'bat jtojtic li c'ustic chopol la jpastique. Li vinic li'i mu c'usi chopol spasoj —xut.

<sup>42</sup>Li vinic ti la spajes li schi'ile jech laj yalbe li Jesuse:

—Cajval, na'un me ti c'alal chtal apas mantal li' ta balumile —xut.

<sup>43</sup>Itac'av li Jesuse:

—Melel chacalbe, li avie chachi'inun batel ta vinajel —xut.

**Ja' sc'oplal ti iloc' sch'ulel li Jesuse**  
(Mt. 27.45–56; Mr. 15.33–41; Jn. 19.28–30)

<sup>44</sup>C'alal jech laj yal li Jesuse, o'lol xa'ox c'ac'al. Ja' o icom ta ic'al ac'ubal ta sp'ejel balumil c'alal to ta oxib ora ta mal c'ac'al. <sup>45</sup>Imac sat li c'ac'ale. Li muc'ta poc' li te lich'il ta yut li muc'ta ch'ulna ta Jerusalene ijat ta o'lol. <sup>46</sup>Li Jesuse tsots ic'opoj, jech laj yal:

—Tata, chcac' ta ac'ob li jch'ulele —xi.

Ja' xa o iloc' sch'ulel.

<sup>47</sup>C'alal iyil li banquilal soltaro li c'ustic ic'ot ta pasele, iyich' ta muc' li Diose, jech laj yal:

—Ta melel mu'yuc smul li vinic li'i —xi.

**48** Scotol li crixchanoetic li te tsobolique c'alal iyilic scotol li c'ustic ic'ot ta pasele, isutic batel ta snaic. La smajulan batel sti' yo'onic yu'un ixi'ic mi ch-ac'bat yich'ic vocol yu'un Dios ta scoj ti la smilic li Jesuse. **49** Scotol li buch'utic lec la sc'opon sbaic schi'uc li Cajvaltique, schi'uc li yajchanbalajeltac li Cajvaltique, schi'uc li antsetic li liquemic talel ta Galilea li la schi'inic talel li Jesuse, nomnom va'alic la sq'uelic scotol li c'ustic ic'ot ta pasele.

**Ja' sc'oplal ti la smuquic li Jesuse**  
(Mt. 27.57–61; Mr. 15.42–47; Jn. 19.38–42)

**50-51** Te oy jun vinic, José sbi, liquem talel ta jteclum Arimatea ta Judea balumil. Ja' jmeltsanejc'op li te ta muc'ta ch'ulna ta Jerusalene. Ja' lequil vinic. Smalaoj chtal ventainaticuc yu'un li Diose. Lec tuc' yo'on, muc bu la stic' sba li c'alal la sa'beic smul Jesús li yan jmeltsanejc'opetique. **52** Ba sc'opon Pilato, ba sc'anbe li sbec'tal stacupal li Jesuse. **53** Li Pilatoe laj yal mantal ti ac'o yac'beel batele. Li Josee ba syalesbe ta cruz li sbec'tal stacupal li Jesuse. La spix ta saquil poc', te ba smuc ta jombil ch'ut ch'en. Ach' ch'en to, mu'yuc to buch'u mucbil tey. **54** Mal xa'ox c'ac'al ti la smuquique. Ja' xa o sc'ac'alil ta schapan sbaic sventa ta xcuxic mi ich'ay c'ac'ale.

**55** Li antsetic li liquemic talel ta Galilea li la schi'inic talel li Jesuse, ibatic ta muquenal e'uc. Iyilic bu la smucbeic comel sbec'tal stacupal li

Jesuse. **56** C'alal iyilique, isutic batel ta snaic. C'alal ic'otic ta snaique, la smeltsanic ta ora muil vomoletic yu'un ja' chba yac'beic ta sbec'tal stacupal li Cajvaltique yo' jech mu xtuib o ta ora. Yu'un ja' jech stalelic o li j'israeletique. Pero muc bu xba yaq'uic ta ora yu'un ja' xa sc'ac'alil ta xcuxic jech chac c'u cha'al ta xal li mantaletic yu'unique.

**Ja' sc'oplal ti icha'cuxi li Jesuse**  
(Mt. 28.1–10; Mr. 16.1–8; Jn. 20.1–10)

**24** Ta sba sc'ac'alil li xemanae, ja' li romincoe, ibatic ta muquenal li antsetique. Sc'an to'ox sacub osil li c'alal ibatique. Yich'ojic batel li muil vomoletic li la smeltsanique. **2** C'alal ic'otique, tseleinbil xa'ox loq'uel c'ot staic li muc'ta ton li macbil o sti' li ch'en. **3** I'ochic ta yut li ch'en pero muc xa bu te oy istaic li sbec'tal stacupal li Cajvaltique Jesuse. **4** C'alal te ta xc'opojo yo'oneque, te va'alic iyilic ta sts'elic cha'vo' co'ol schi'uc viniquetic yilel. Toj sac li sc'u'ique ta xtup' o tajmec jsatic. **5** Ixi'ic tajmec li antsetique, la squejan sbaic. Jech i'albatic yu'un li viniquetique:

—¿C'u cha'al tal aq'uelic li' ta muquenal li buch'u euxul o sbatel osile? **6** Muc xa bu li'i, icha'cuxi xa loq'uel. Na'ic me ti jech ono'ox laj yalboxuc li c'alal te to'ox oyoxuc ta Galileae. **7** Jech laj yal: “Ta persa chi'aq'ue ta sc'ob jpasmuliletic, jo'on li co'ol crixchanoutique. Chisjoc'anic ta cruz, te chismilic. Chismuquic, pero ta yoxibal c'ac'al chicha'cuxi loq'uel ta jmuquenal”, xayutic ono'ox —x'utatic li antsetique.

<sup>8</sup>Li antsetique ijul ta sjolic ta ora ti jech ono'ox albilibique. <sup>9</sup>Iloq'uin ta yut li ch'ene, isutic batel. Li c'ustic i'albatique ba yalbe ya'iic li buluchvo' yajchanbalajeltac li Jesuse schi'uc li yanetique. <sup>10</sup>Li antsetic li ba yalbeic li yajtacbalaltac li Jesuse, ja' li María li liquem talel ta Magdalae, schi'uc Juana, schi'uc otro jun Marfa, ja' li sme' Jacoboe, schi'uc yan antsetic li te schi'uquique. <sup>11</sup>Li jtacbalaletique la snopic ti altic li c'usi ta xalic li antsetique, jech muc bu sch'unic li c'usi laj yalique.

<sup>12</sup>Yan li Pedroe ta ora ibat ta anil ta smuquenal li Jesuse. C'alal ic'ote, la snach'ta ochel li yut ch'ene. Iyil ti ja' xa no'ox te oy li saquil poc' li la spixbeic o sbec'tal stacupal li Cajvaltique. Mu xa bu te oy li sbec'tal stacupale. Jech ep ic'opoj batel yo'on li c'alal isut batele.

**Ja' sc'oplal ti laj yac' sba ta ilel Jesús ta stojol cha'vo'ic li c'alal te ta xanavic batel ta sbelel Emáuse**

(Mr. 16.12-13)

<sup>13</sup>Ta sc'ac'alil c'alal icha'cuxi loq'uel ta ch'en li Cajvaltique, ta mal c'ac'al oy cha'vo' ti yich'ojic ta muc' li Jesuse, iloq'uin batel ta Jerusalén, te ibatic ta sbelel li colonia Emáus sbie. Oy nan chibuc reva xil sbaic schi'uc li Jerusalene. <sup>14</sup>Te tslabanic batel li c'u sba la smilic li Jesuse. <sup>15</sup>C'alal ja' o tslabanique, te ital ta spatic li Jesuse. Te schi'uquic batel ta xanbal. <sup>16</sup>Pero imacbat static yu'un li Diose jech muc bu xojtaquinic mi ja' Jesús li te schi'uquic batel ta bee. <sup>17</sup>Jech ijac'batic yu'un li Jesuse:

—¿C'usi li yacal chavalique?

—x'utatic.

Te ipajic. Li Jesuse iyil ti toj ech'em ta xat yo'onique. <sup>18</sup>Itac'av li june, ja' Cléofas sbi:

—Li jchi'iltactic li te talemic ta q'uelq'uin ta Jerusalene iya'iic scotolic li c'usi ja' to no'ox ic'ot ta pasel li te ta Jerusalene. ¿C'u cha'al muc bu xava'i li jo'ote? —xut.

<sup>19</sup>Itac'av li Jesuse:

—¿C'usi ic'ot ta pasel? —xi.

Itac'avic:

—Yu'un la smilic li Jesús li liquem talel ta Nazarete. Ja' li buch'u iyal sc'lop Diose. Lec icoltaat yu'un Dios jech iyac'ulan ta ilel stsatsal sju'el. Schi'uc lec ichanubtasvan, ic'ot ta co'oncutic li sc'ope. Lec i'ile yu'un jchi'iltactic ta israelal. <sup>20</sup>Ja' no'ox li banquilar paleetic schi'uc li jmeltsanejc'opetic cu'untique i'ac'vanic ta c'abal. Ta stojol li ajvalile imeltsaj sc'oplal yu'unic ti ta persa ta xchame. La sjoc'anic ta cruz. <sup>21</sup>Li jo'oncutique jpatoj co'oncutic ti ja' ta x'och ta ajvalilal cu'untique, jo'otic li j'israelutique.

Pero yoxibal xa c'ac'al ti imilee.

<sup>22</sup>Pero oy c'usi yan ica'icutic sob nax. Toj ch'ayel o co'oncutic ta sventa li c'usi laj yalbuncutic li antsetic li co'ol la jchi'incutic li Jesuse. Yu'un i'ayic sob nax ta smuquenal li Jesuse. <sup>23</sup>Pero muc xa bu te oy istaic li sbelel stacupal li Jesuse. C'alal iyilic ti muc xa bu te oye, isutic batel, ba yalbuncutic. Te la iyilic ch'ul ángeletic ti laj yalic ti cha'euxiem xa li Cristoe. <sup>24</sup>Ibatic jayvo' jchi'iltac e'uc, a sq'uelbeic li smuquenale. Li c'u sba laj yalic li antsetique ja' jech iyilic e'uc. Pero

muc bu xilic e'uc li Jesuse —xutic li Jesús li cha'vo'ique.

**25** Jech i'albatic yu'un li Jesuse:

—Muc bu p'ioxuc. Vocol chach'unic scotol li c'ustic yalojic li buch'utic iyalic sc'op Dios ta vo'onee. **26** ¿Mi mu jechuc ts'ibabil ti ta persa ba'i ta xich' vocal li Cristoe, ti ts'acal to ta x'och ta ajvalilale? —xi li Jesuse.

**27** Li Jesuse i'albat ya'iic scotol li bu ts'ibabil sc'oplal ta sc'op li Diose. Ja' ba'i laj yal li bu la sts'iba comel li Moisese, xchapet laj yal li c'usi la sts'ibaic li yan li buch'utic iyalic sc'op Dios ta vo'onee.

**28** C'alal ic'otic ta Emáuse, li Jesuse j'ech'el ox ch-ech' batel yilel.

**29** Li cha'vo' viniquetique la spajesic. Jech laj yalbeic:

—Pajan li'i, och chi'inuncutic yu'un ic' xa osil —xutic.

Isch'un li Jesuse. **30** C'alal te schi'uquic ta chotlej ta mexae, la stam jp'ej pan li Jesuse, laj yalbe coliyal Dios, la xut li pane, laj yac'anbe. **31** C'alal jech la spas li Jesuse, te lic ac'batus yojtaquinic yu'un Dios. Pero ta ora te isac-ch'ay li Jesuse. **32** Jech laj yalbe sbaic:

—¿C'u cha'al muc bu jna'tic mi ja' li Cajvaltique yu'un toj lec laj ca'itic li c'alal laj yalbutic talel ta be li smelol li sc'op Diose? —xut sbaic.

**33** Isutic batel ta ora ta Jerusalén, ba yalbeic li schi'iltaquic li co'ol yich'ojic ta muc' li Cajvaltique. Te tsobolic c'ot staic li buluchvo' yajchanbalajeltac li Jesuse schi'uc oy yan schi'iltaquic li te oyique. **34** Jech i'albatic yu'un li schi'iltaquic li te ta Jerusalene:

—Ta melel cha'cuxiem xa li Cajvaltique. Laj xa yac' sba ta ilel ta stojol li Simón Pedroe —x'utatic.

**35** Li cha'vo'ique lic yalic e'uc li c'u sba ilo'ilajic batel ta be schi'uc li Jesuse, schi'uc ti muc bu xojtaquinique, ti ja' to laj yojtaquinic li c'alal la xut li pane.

**Ja' sc'oplal ti laj yac' sba ta ilel Jesús ta stojol li yajchanbalajeltac li c'alal cha'cuxiem xa'oxe**

(Mt. 28.16–20; Mr. 16.14–18; Jn. 20.19–23)

**36** C'alal ja' o te chlo'ilajic scotolique, te va'al ijul ta ora ta stojolic li Jesuse. Jech laj yal: —Junuc me avo'onic —xi.

**37** Ixi'ic tajmec. Iyalic ti ch'ulelale.

**38** Li Jesuse jech laj yalbe:

—¿C'u cha'al chaxi'ic? ¿C'u cha'al chanopic ti mu jo'cune?

**39** Q'uelavilic li jc'ob schi'uc li coque. Jo'on. La' picbecun. Ti ch'ulelalucune, mu'yuc jbec'tal, mu'yuc jbaquil ti jechuque —xi.

**40** C'alal laj yal jech li Jesuse, laj yac' ta ilel li sc'obe schi'uc li yoque. **41** C'alal iyiliki, toj ech'em xmuyabajc xa. Pero mu sna'lic lec mi ta melel ti cha'cuxiem xae yu'un ich'ay yo'onic. Ijac'batic yu'un li Jesuse:

—¿Mi oy jset'uc ve'lil avich'ojic talel? —xi.

**42** Laj yac'beic jset' vobil choy schi'uc laj yac'beic jset' spom muc'ta pom. **43** Scotolic te sq'uelojic li c'alal la stsac li ve'lil li Jesuse, schi'uc li c'alal la slajese. **44** Jech lic albaticuc:

—C'alal jchi'ucoxuc to'oxe, laj ono'ox calboxuc ti persa ta xc'ot ta pasel scotol li c'u sba ts'ibabil comel jc'oplal ta sjun Moisés, schi'uc ta sjunic li yan li buch'utic iyalic sc'op Dios ta vo'onee, schi'uc ta sjunal Salmoetic —x'utatic yu'un li Jesuse.

**45** Te i'ac'bat sp'ijilic yu'un li Jesuse yo' jech ta sch'unic o ti jech ono'ox ts'ibabil sc'opla ta sc'op li Diose. **46** Jech laj yal nojtoc li Jesuse:

—Ts'ibabil ta sc'op Dios nojtoc ti ta ono'ox xquich' vocol schi'uc chimile, jo'on ti sc'opla ono'ox chtal ventainvancune, schi'uc ti ta ono'ox xicha'cuxi ta yoxibal c'ac'ale. **47** Schi'uc ti ta ono'ox x'albatic scotol crixchanoetic ti ac'o yictaic li c'ustic chopol ta spasique, ti ac'o sch'unic ti jo'on Yajcoltavanejicune, jech ta spasbatic perton yu'un smulic. Ja' ba'i ta x'albatic li buch'utic li' nacalic ta Jerusalene. Ts'acal to chlic albaticuc scotol li crixchanoetic ta sp'ejel balumile, xi ono'ox ts'ibabil. **48** Jo'oxuc texticoxuc yu'un jo'oxuc avilic ti laj quich' vocole schi'uc ti cha'cuxiemun xae. **49** A'iic, chajtacbeic yalel li Ch'ul Espíritu ti yaloj ono'ox Jtot ti chayac'beique. Li' to me oyanic ta Jerusalén ja'

to mi ital li Ch'ul Espíritue. Ja' ta x'och ta avo'onic jech ta x'ayan o stsatsal avo'onic, ja' xu' o avu'unic chapuquic batel li jc'ope —xi li Jesuse.

**Ja' sc'opla ti imuy batel ta vinajel li Jesuse**

(Mr. 16.19–20)

**50** Ta yan o c'ac'al laj yic' loq'uel ta Jerusalén li yajchanbalajeltac li Jesuse. Ja' te ibatic ta sbelel jteclum Betania. C'alal ic'otic ta nopol Betaniae, la stoy schibal sc'lob li Jesuse yu'un iyac' comel slequilal yutsilal. **51** C'alal yacal ta xac' comel slequilal yutsilale, ja' xa o imuy ba ta vinajel li Jesuse. **52** C'alal iyilic ti imuy batel ta vinajele, más laj yich'ic ta muc!. Xmuyabajic tajmec c'alal isutic batel ta Jerusalene. **53** Scotol c'ac'al ibatic ta yamaq'uil li muc'ta ch'ulna li te ta Jerusalene. Xmuyabajic no'ox laj yalbeic coliyal Dios ta sventa ti icoltaatic xae.